

سرى للغاية

اجتماعات مجلس الرئاسة
القاهرة - قصر القبة فى ٣١ أكتوبر ١٩٦٢
(الاجتماع السابع)

الحاضرون

الرئيس جمال عبد الناصر، عبد اللطيف البغدادى، عبد
حسن ابراهيم، على صبرى.. رئيس المجلس التنفيذى،
الحكيم عامر، زكريا محى الدين، حسين الشافعى، كمال
نور الدين طراف، أحمد عبده الشرباصى، كمال الدين
الدين حسين.. نواب رئيس الجمهورية، أنور السادات،
رفعت.

المحتويات

| الصفحة | الموضوع |
|---------|---|
| ٢ | ١- تطور الموقف فى اليمن |
| ٢٤ | ٢- مدى تهديد عدن والخليج العربى للنشاط العسكرى المصرى فى اليمن |
| ٢٧ | ٣- التهديد المتوقع للقوات المصرية من الامام البدر والملك سعود وكيفية مواجهته |
| ٣٦ | ٤- موقف مصر من النزاع بين الهند والصين |
| ٥٧ | ٥- معركة كوبا بين الشرق والغرب |
| ٦١ | ٦- مناقشة قطاع المقاولات بعد تأميم ٥٠٪ منه |
| ٨٣ | ٧- موقف محصول القطن والأرز |
| ٨٤ | ٨- عبد الناصر.. اعادة النظر فى جميع مجالس المحافظات ورؤساء المدن |
| ٨٧ | ٩- مناقشة موضوع بدل طبيعة العمل |
| ٩٠ | ١٠- رئيس الجمهورية هو الذى يمنح الأنواط والنياشين |
| | ١١- توزيع الاختصاصات والعمل بين لجنة السياسة الخارجية والمجلس التنفيذى ومجلس الرئاسة |
| ٩١ | ١٢- عبد الناصر.. حريص على الانتقال من النظام الرئاسى الى القيادة الجماعية |
| ١٠٩ | الكاملة، وتفاصيل تحقيق ذلك |
| ١٣٠-١٢٨ | ١٣- الوضع فى اليمن |

سرى للغاية

قرارات مجلس الرئاسة

فى ٣١/١٠/١٩٦٢

استمع المجلس الى بيان عن زيارة المشير عبد الحكيم عامر الأخيرة الى جمهورية اليمن، وعلى ضوء هذا البيان اتضح أن الثورة اليمنية قد وطدت أقدامها فى جميع أنحاء اليمن وأن الشعب يؤيدها تأييدا تاما.

وقد زار المشير عبد الحكيم عامر قوات الجمهورية العربية المتحدة وقوات الجمهورية اليمنية فى صروح على الحدود الشرقية كما زار كذلك الحدود الشمالية، وأن هذه القوات اليمنية والعربية مستعدة استعدادا تاما لملاقاة أى عدوان خارجى. وواضح من هذا الموقف أن ما دأبت على اذاعته اذاعات سعود وعمان خلال الشهر الماضى وأن ما أسموها قوات الامام المتقدمة الى صنعاء لا أساس لها من الصحة.

كما بحث المجلس النزاع القائم بين الهند والصين وأصدر البيان التالى:

كانت الجمهورية العربية المتحدة تتابع باهتمام وقلق بالغين أنباء الخلاف بين الهند والصين حول مسألة الحدود. وكانت ترجو ألا تتطور الأمور بين الدولتين الى حد الخطورة أى استخدام القوة، إلا أن حوادث الصدام والاشتباكات التى وقعت على الحدود الهندية - الصينية فى ٢٠ من أكتوبر سنة ١٩٦٢ ساعدت على اتساع الخلاف فأخذ شكل النزاع المسلح؛ مما كان له وقع أليم فى نفوس أبناء الجمهورية العربية المتحدة الذين تربطهم بالشعبين الهندى والصينى روابط الصداقة والتعاون الوثيق.

ولم يكن فى وسع الجمهورية العربية المتحدة ازاء خطورة الموقف بين الدولتين أن تقف فى صفوف المتفرجين، بل لقد أملت روح باندونج ومبادئ التضامن الافريقى - الآسيوى على الجمهورية العربية المتحدة أن تسارع وتقوم بدورها فى العمل الايجابى لاتخاذ الخطوات اللازمة من أجل وقف هذه الاشتباكات المسلحة وازالة شبح الخطر المتزايد؛ حتى يساعد ذلك على ايجاد حل سلمى للمشكلة والقضاء على أسباب النزاع بين الهند والصين، ولكل منهما مكانتها الطيبة وأثرها الكبير لدى مجموعة الدول الافريقية - الآسيوية.

وكان أن أبرق الرئيس جمال عبد الناصر فى ٢١ من أكتوبر الماضى برسالة الى كل من شواين لاي رئيس وزراء الصين، والبانديت جواهر لال نهرو رئيس وزراء الهند؛ يناشدهما قبول جهود التوفيق بين الدولتين، ويعرض عليهما وضع كل امكانياته متعاوننا مع رؤساء دول عدم الانحياز فى افريقيا وآسيا فى خدمة السلام بين البلدين.

سرى للغاية

وفى الوقت ذاته وعملا بسياسة تبادل الرأى والمشورة بين الدول الصديقة فى كل ما يطرأ من أحداث، فقد بعث الرئيس جمال عبد الناصر الى رؤساء دول وحكومات كل من: أفغانستان واندونيسيا والجزائر والسودان والمملكة المغربية وسيلان وغانا وغينيا وكمبوديا ومالى؛ بغية القيام بجهد مشترك تقوم به دول ميثاق الدار البيضاء ودول عدم الانحياز فى افريقيا وآسيا لدرء الخطر القائم على حدود الهند والصين، وتبديد شبح الحرب المائل هناك حتى يحل السلام فى القارة الآسيوية.

ومما ضاعف الأمل عند الجمهورية العربية المتحدة والدول الافريقية والآسيوية، ما يدل من روح الاستعداد التى وضحت فى رد كل من شواين لاي وجواهر لال نهرو الى الرئيس جمال عبد الناصر؛ فقد رحب كل منهما بجهود الدول الصديقة لحل هذا النزاع، كما شرح كل من الزعيمين الهندى والصينى وجهة نظره ازاء المشكلة القائمة بين البلدين حول الحدود. ودرست الجمهورية العربية المتحدة الأمر من كل نواحيه على ضوء الرسائل التى بعثت بها الصين والهند، ورسائل رؤساء الدول الافريقية والآسيوية ودول عدم الانحياز الى السيد رئيس الجمهورية العربية المتحدة أساسا لحل هذه المشكلة، ويتلخص هذا الاقتراح فيما يلى:

أولا: إيقاف القتال فورا.

ثانيا: عودة قوات كل من الجانبين الهندى والصينى الى المواقع التى كانت تحتلها قبل الاشتباكات المسلحة الأخيرة التى بدأت يوم ٢٠ أكتوبر الجارى، عند الخط الذى كانت تعسكر فيه قوات الجانبين يوم ٨ سبتمبر الماضى.

ثالثا: تحديد منطقة حرام تفصل بين الجانبين لتسوية جميع المسائل المتعلقة بالنزاع على الحدود بالوسائل السلمية.

وأبرق الرئيس جمال عبد الناصر بهذه المقترحات الى رؤساء دول وحكومات البلاد غير المنحازة فى افريقيا وآسيا، التى تشارك بالرأى والجهد فى احلال السلام بين الصين والهند محل القتال.

وإن رئيس الجمهورية العربية المتحدة وأعضاء مجلس الرئاسة وهم يرقبون التطورات ويدرسون كل الخطوات التى تتخذ فى هذا السبيل، يرون أن المقترحات التى تقدم بها الرئيس جمال عبد الناصر الى كل من الطرفين المتنازعين تعتبر أساسا صالحا للوصول الى حل سلمى لدرء خطر الحرب المتزايد بين الدولتين، ولوقف القتال الناشب على حدودهما، وايجاد سبيل لحل المشكلة عن طريق المفاوضات السلمية بدلا من سفك الدماء بين أبناء شعبين صديقين ربطت بينهما أعمق الصلات منذ قديم الزمن، ويقومان اليوم بدور كبير فى الكيان الآسيوى - الافريقى.

سرى للغاية

وإذا كانت الجمهورية العربية المتحدة تؤمن بأن مبادئ باندونج التى تدعو دول العالم الى حل المشاكل الدولية من غير طريق القوة، فإن الجمهورية العربية المتحدة تقف أشد ايمانا بضرورة تطبيق هذه الدعوة خاصة بالنسبة لمشكلة تقوم بين دولتين من دول ميثاق باندونج نفسها هى الصين والهند، وقد ساهمت كل منهما بنصيب كبير وجهد عظيم فى اقرار هذه المبادئ واعتاقها.

وتؤكد الجمهورية العربية المتحدة أنها لن تألو جهدا فى سبيل بذل كل المحاولات للبقاء على الصورة الرائعة للتضامن الافريقى - الآسيوى؛ حتى لا تشوبها قطرات الدم ومعارك القتال بين دول من مجموعة الأمم الساعية الى السلام.

كما بحث المجلس الموقف الدولى المترتب على مشكلة كوبا، والجمهورية العربية المتحدة تقدر الجهود التى بذلها جميع الأطراف لتخفيف هذا التوتر فى هذه المنطقة التى كانت تهدد بقيام حرب عالمية، كما أشاد المجلس بموقف وجهود الذين قاموا بجهد ايجابى للمحافظة على السلام العالمى.

وبحث المجلس أيضا وسائل تطبيق الميثاق فى مختلف الميادين الاقتصادية والاجتماعية، كما طلب المجلس من رئيس المجلس التنفيذى التقدم فى خلال ٣ أسابيع بتقارير متابعة خطة السنة الثانية التى انتهت فى يوليو الماضى وكذلك مشروع الخطة للسنة الرابعة التى تبدأ فى يوليو القادم؛ على أن تكون جاهزة للمناقشة أمام مجلس الرئاسة فى فبراير القادم. كما أعطى المجلس توجيهها للمجلس التنفيذى أن يبدأ فى وضع الخطة الخمسية الثانية التى تبدأ من عام ١٩٦٥ - ١٩٧٠.

ووافق المجلس على عدة قرارات مقدمة اليه من المجلس التنفيذى.

كما هنا المجلس الشعب الجزائرى بمناسبة احتفاله بعيد ثورته المجيد.

كما بحث المجلس مسؤوليات وواجبات لجان المجلس.

سرى للغاية

اجتماعات مجلس الرئاسة
القاهرة - قصر القبة فى ٣١ أكتوبر ١٩٦٢
(الاجتماع السابع)

ابراهيم: بكره مسافر بكره انشاء الله.

عبد الناصر: كده؟

ابراهيم: آه.. انشاء الله الصين.

عبد الناصر: ازيك ياكمال؟

حسين: الله يحفظك.

عبد الناصر: كويس؟

حسين: والله كويس.

عبد الناصر: سافرت؟

حسين: الجمعة دى مرحتش أى حته.

عبد الناصر: طب ده كويس. (ضحك)

أصوات: (ضحك)

عبد الناصر: يبقى خير.

حسين: بلاش نروح تانى بقى! (ضحك)

سرى للغاية

عبد الناصر: مسافر حتروح امتى؟

حسين: ده أنا مسافر مع بغدادى.

عبد الناصر: ها؟

حسين: أصل هو ببسأل بيقول عبد الحكيم عنده انفلونزا، بقول له: هو امبارح كان تعبان.

عبد الناصر: وأنا ما عرفت والله إنه كان تعبان، امبارح عيى ومكلمتوش، النهارده الحقيقة أنا كنت الصبح

مشغول للساعة أربعة يادوبك طلعت خدت معايا الجدول. (ضحك)

نتكلم عن الوضع فى اليمن، بالنسبة للوضع فى اليمن كنا منتظرين النهارده يحصل هجوم من السعودية، حسب المعلومات اللى عندنا مفيش أى أخبار على أساس حتبندى فى الليلة اللى فاتت. بيحشدوا فى السعودية قوات سعودية وقوات أردنية وبعض طبعاً قوات يمنية، المفروض كان حسب الخطة اللى احنا عندنا معلومات عنها إنهم لغاية اليومين اللى فاتوا حيدخلوا، كان لازال لغاية امبارح فى السعودية بيقولوا: إن البدر حيدخل على حدود السعودية يعدى الحدود أو حيفضل على خط الحدود، وبعدين بيتدوا يشتغلوا بالنسبة لبعض مناطق خصوصاً على السهل الساحلى بغرض قطع الحديد.

كان فيه خلاف بين سعود وبين البدر، سعود كان عايزه يدخل فى الجبال مقدرش فى الطريق ده، لكن يظهر إن دى الخطة اللى اتفقوا عليها نهائياً أخيراً؛ على أساس إن الحسن هيهجم على صعدة، وعلى أساس الهجوم اللى هناك هيبقى فى الشرق فى مأرب أو فى منطقة الجوف.

النهارده كانت فيه قوات معادية شمال صعدة يعنى قوات الطيران ضربهم، إحنا ملناش قوات فى صعدة فيه قوات يمنية فى صعدة، ملناش إلا الخط اللى أنا قلت عليه الجلسة اللى فاتت اللى هو عمران - زيدية. لكن هو اللى احنا ماشين فيه يمكن عدلناه امبارح بحيث إن احنا نتقدم لمنطقة اسمها بنى عبس أو عبس؛ فيها مطار وفيها الهدف بتاع البدر اللى هو على الساحل.

سرى للغاية

بالنسبة للمعارك اللى حصلت الجمعة اللى فاتت، حصلت معارك فى الجمعة اللى فاتت ابتداء من يوم ٢٢، وإحنا كنا محتلين صرواح وتقدمت كتبية اللى كانت محتلة صرواح كتبية مظلات يعنى حوالى ٢٠٠ عسكرى أو ٢١٠ أو ٢٢٠ علشان احتلال مأرب. إحنا كان فى كلامنا بتبقى صرواح هى المكان الحاكم اللى قلناه الجمعة اللى فاتت بالنسبة لطريق صنعا، واتقدموا ووصلوا قرب ١٥ كيلومتر من مأرب، ووقعوا فى كمين وحصل فيهم بعض خسائر. وفى نفس الوقت القوات المعادية احتلت صرواح فقطعتهم عن صنعا، وحصل امداد للقوة بكتبية أخرى وأسقطت سريتين مظلات لاحتلال صرواح.. ده كان الموقف يوم ٢٢. وأنا طلبت إن احنا نرجع نحتل - القوات بتاعتنا - مأرب متهمناش على أساس إنها جنب بيحان، إن بترجع هذه القوة وصرواح أهم لنا من مأرب. مأرب ماتهمناش ولو إنها كانت على بعد ١٠ - ١٥ كيلومتر، إن منقدرش نقعد فى مأرب أبدا إلا إن مأرب على الحدود مع بيحان، فأى قوة بتبقى هناك بتبقى فى مركز ضعيف جدا من ناحية التموين.

القبائل اللى هناك اللى هى بيقولوا عليها قبائل جهم وقبائل العروش قلبت، وأصبح الموقف الحقيقة بالنسبة لقواتنا موقف مش سليم! الكتبية اللى طلعت علشان الامداد أيضا وقعت فى كمين عند جحانة وحصل فيها بعض الخسائر؛ كان مجموع الخسائر ١٦ قتلى و٦ مفقودين و٢٣ جرحى.. ده مجموع الخسائر كان ده يوم ٢٤.

يوم الخميس ظهر موقف جديد، إن يوم ٢٣ كان يوم الكتبية اللى كانت رايحة لمأرب، رجعت وخذت صرواح وقعدت فى صرواح، والكتبية الثانية وقفت فى جحانة؛ وبهذا خط المواصلات يعنى تقريبا اتأمن. وظهر يوم الخميس موقف جديد مكناش أخطرنا بيه من هناك؛ اللى قوة المظلات فقدت.. هم السريتين المظلات يعتبروا ١١٠ التأمين فقد الاتصال بيهم ومحدث عارف فقدوا! أنا طبعا بقول الموقف بالتفصيل جدا علشان تكونوا على الصورة الكاملة.

هى سرية ولا سريتين؟

صوت: سرية وقول.

سرى للغاية

عبد الناصر: سرية وقول معاهم ١١٠، يعنى يوم الخميس طلوعوا طيارة هليوكبتر تدور عليهم شافوا جزء منهم صغير، يوم الجمعة طلعت كل الطائرات تدور عليهم مكانش فيه نتيجة خالص لغاية المغرب! بالليل الساعة ٨ وصل لنا خبر من هناك إن قوة منهم وصلت الى جحانة - اللي هي تقريبا على بعد ١٠٠ كيلومتر من المنطقة اللي وقعوا فيها - وصلوا ماشيين ومعاهم الجرحى بتوعهم وحتى معاهم قتلى وكان قائد السرية واخذ رصاصه.

الموقف لغاية امبارح كانت كل السرية رجعت ناقصة ٢١، النهارده جاء لنا خبر اللي هم فيه قسم موجود من الـ ٢١، وطلعوا اتصلوا بالقبائل اللي هناك على أساس يعملوا اتفاق معاهم، قالوا لهم على العدد ولكن الاشارة مكانش فيها العدد بالضبط.

كلامهم هم الولاد لما نزلوا المعارك هناك مهباش الحقيقة معارك بمعنى كلمة معارك، فيه عرب موجودين معاهم بعض ناس يآردينين ياسعوديين يامن جحانة معاهم مدافع مكن أو هاون قاعدين على الجبال مختفين. لما نزلت سرية المظلات يعنى نزلت تحت النيران، وبعد كده فيه اتنين يمينيين خدوهم.. خدوا قسمين اللي وصلوهم الى جحانة.

ده الحقيقة الموقف، العملية كده حصلت يعنى سوء حظ إحنا لما طلعتنا لمأرب وخدوا صرواح ونزلنا المظلات وبعتنا، حصلت العملية دى كلها بهذا الشكل؛ يمكن خسائر تعتبر كثيرة، ولكن فى نفس الوقت أنا بعتبر إن يمكن ربنا أراد لنا ناخذ درس فيها بحيث إن احنا يعنى آه.. طبعا معرفة الأرض. وسافر عبد الحكيم وشاف الأرض وطار عليها كلها وراح صرواح أخذنا صرواح - السعوديين بيقلولوا إنهم أخذوا صرواح - راح صرواح وراح جحانة وشاف كل القوات بتاعتنا.. القوات برغم ذلك روحها المعنوية عالية.

هو طبعا يمكن مفيش اتصال لاسلكى مع المظلات لأن صرواح كانت جنبهم على بعد ١٠ أو ٥ كيلومتر، لو كانوا راحوا هناك كانت الكتيبة الثانية رجعت، هم كانوا متصورين إن الكتيبة طالعة لمأرب وهم اتزنقوا ففضلوا بدل ما يطلعوا على صرواح رجعوا على جحانة ومشيووا ١٠٠ كيلومتر، كويس يعنى إنهم مشيووا العملية دى.

طبعا الحقيقة أنا كنت قلق يوم، أحسن يكونوا دول خدوهم أسرى ويودوهم للملك سعود أو كانوا بيقلولوا أبادوا المظلات وكلام بهذا الشكل النهارده؛ على أساس الكلام ٢١ وإن لقوا منهم ناس تانيين معرفش العدد أد ايه. اللي كان جاى من الاشارة كان باين إن فيه مجموعتين موجودين لسه لغاية دلوقتى، عرفوا مكانهم وهيجيبوهم ببيان إن الخسائر أقل.

سرى للغاية

حصل عدد من القتلى فى الضباط يعنى كان ٦ أو ٨ حاجة بهذا الشكل حصلت من الجرحى.

ده الوضع بالنسبة للمعركة اللى فاتت.

بالنسبة للأسرى، حسب معلوماتنا فيه واحد بس خدوه أسير اللى هو أصلا مع الملك سعود، اللى بعنقد امبارح خدوا منه أسامى بعض الناس اللى معاه وأعلنوا عليها فى اذاعة مكة إنهم قتلى... ده إحنا خدناه يعنى وقدرنا نعرف اسم العسكرى الموجود فى نجران. وبعدين الملك سعود باستمرار من أول يوم عمال يقول لهم: عايز أسرى وعايز مصريين لكن لغاية دلوقتى خدوا واحد بس.

طبعا فى العملية دى كلها اذا كان أخذوا واحد يبقى إحنا كنا نتمنى ميحصلش لكن حصل؛ ولذلك إحنا نشرنا بيان إن فيه ٢ مفقودين بالنسبة للعملية على أساس إن احنا نقل عليهم بالنسبة للوضع.

هو طبعا ممكن فى اليمن العمليات تحصل بأقل عدد من الخسائر؛ على أساس نقول إن قبائل اليمنيين بيشتغلوا هناك. يظهر بالنسبة للشغل مع القبائل كان بسيط، واتعملت هيئة دلوقتى ابتدت تشتغل مع القبائل بعنتا لهم ١٠ آلاف جنيه يشتغلوا بيها؛ على أساس إن القبائل اللى مش حتمشى اللى حتعادينا بنحرقها. والقبائل اللى ممكن تعادى هناك هى اللى على الحدود اللى ولاءها لسلطان بيحان وللانجليز. وبعدين اللى قتلوا رئيس قبيلة جحانة قتلوا رئيس قبيلة صرواح كان رئيس قبيلة جحانة موجود مع الناس اللى بيقاوموا معاه وابنه اسمه زايد.. دى العملية اللى حصلت بالنسبة لمأرب والعملية دى يعنى خسرتنا فيها خسائر كبيرة.

بالنسبة لبقية العمل يعنى فى الوقت ده مكانش برضه قوة كبيرة، لكن دلوقتى لينا قوة كبيرة.. بالنسبة لينا لوائين مشاة بالاضافة الى المظلات والى الصاعقة مكانوش موجودين، وصلت عربيات ووصلت أسلحة معاهم، اللواء الثانى وصل عربيات وأسلحة ابتدت توصل؛ وبهذا ببقى فى موقف كويس بالنسبة لأى هجوم من السعودية.

سرى للغاية

هم كل ما يتأخروا يوم الحقيقة يبقى الموقف لصالحنا، دلوقتي عندنا الطيارات
هناك تشتغل النهارده عندنا هناك عدد كبير ابتدى تروح.
ده الموقف.

لما راح عبد الحكيم هناك يتابع برضه ويشوف؛ إن احنا منقدرش نشغل عملية
لوحدنا لازم يكون يعملوا وبيشتغلوا سياسيا مع القبائل.
ده الوضع.. أى أسئلة؟

حسين: هو أنا اللي فاهمه إنهم بتوع الصاعقة دول دبحوا كثير من القبائل اللي هاجمتهم دى.

عبد الناصر: آه.

حسين: الحقيقة آه.. يعنى ضربوهم جامد برضه وأدبوهم.

عبد الناصر: بتوع جحانة.

ابراهيم: جهم.

عبد الناصر: وبتوع جهم لازال لغاية دلوقتي النهارده قالوا: إنهم عملوا اتفاق مع العروشى، لازالت قبيلة
العروشى بين جحانة وبين صرواح كانت غير موالية. قبل ما يجى كان فيه اشارة إن حصل
اتفاق مع جهم اللي هى كان اللي قتل رئيسها. طبعا بتوع الصاعقة اللي بالذات كانوا فى
مأرب حصل عندهم خسائر بالكمين اللي هو لغم انفجرت فيه العربية، ولكن يعنى اقتحموا
المواقع المعادية وسببوا خسائر كبيرة فيهم.

حسين: هى عمليات تأديب تبقى مفيدة برضه على طول.

عبد الناصر: هو لما دخلوا صرواح برضه سببوا لهم خسائر كبيرة.

سرى للغاية

رفعت: أنا لى اقتراح يعنى بالنسبة طبعا للواحد لاحظته، فيه كلام فى البلد يعنى حكاية إن فيه قوات راحت وقد يكون فيه مبالغة فى ..

عبد الناصر: قوات راحت يعنى ضاعت؟

رفعت: آه.. فيه خسائر يعنى، وطبعا الاذاعات الموالية بتقوم بدور فى العملية، وبعض الناس طبعا اللى بيقلوا: إحنا ايه الداعى وايه كان لينا دعوة باليمن وحاجة زى كده! فأنا بقتراح يكون فيه نوع من التوعية لأن فيه صدى لمعركة اليمن.

عبد الناصر: وأنا والله طلبت هذا من بهاء وكتب.

طراف: وكتب كويس بهاء.

عبد الناصر: أول هذا ما اتذاع.

طراف: أول واحد كتب كويس الحقيقة فى الموضوع ده.

عبد الناصر: يعنى مبنى على لما قرريت اذاعات الأردن وبتتكلم إن احنا رايعين ندبح؛ فطلبت من حاتم علشان بالذات بهاء بيكتب عملية بهذا الشكل للتوضيح، هو الحقيقة كده بندافع عن القاهرة فى ..

طراف: ما هو ده المعنى ده الحقيقة لازم ينضرب عليه باستمرار .. يعنى كل الصحف.

عبد الناصر: آه.

رفعت: فأنا كنت بقتراح إن احنا لو نفتح باب التطوع ولو بشكل صورى، معناه إن الشعب متحمل مسؤولية فى المعركة وهو اللى طالب المعركة؛ بحيث إنه ميبقاش بعيد عن المعركة.

سرى للغاية

عبد الناصر: هو لو يبقى فيه تطوع فى السفارة اليمينية أحسن ما نفتح باب التطوع؛ لأن أنا خايف النهارده بعد الأخبار اللي اتعملت كان فيه تطوع كبير قوى فى الأول، النهارده فى تقديري إن الكلام ده اللي هو مشى.. عفت مثلا بيقول الجهاد هو ده بيعتوا يجيبوه فجابوه من هناك يسافر قعد يقول مسافر.

حسين: ده صحيح.

عبد الناصر: مخصوص علشان كسر.. قلت وحتى بيقولوا: يعنى عسكريا نجيبه ازاي؟ فقلت لهم: ده ببين إن الكلام كله كذب، فجابوه يوم الجمعة وسافر تانى يوم السبت أو الأحد أعرف سافر بس.

صوت: أظن عمل عملية.

عبد الناصر: ها؟

صوت: هو دخل المستشفى فجبه وسافر.

عبد الناصر: وكان فيه فرصة ماتش والكلام ده ببيان للناس إن الاشاعات دى غلط، لكن لو بيتدى حركة تطوع بدون دعوة بتبقى أحسن.. يعنى بيتدى ناس والشباب وكذا وتبص تلاقى التطوع، واليمينيين والنعمان عندنا يعملها أنور تعملوها مع بعض يفتح مكتب، لكن اذا إحنا دعينا للتطوع قد يعنى يبقى فيه نوع من الكششان.

حسين: القنور.

عبد الناصر: على أساس الأخبار اللي انتشرت.

السادات: بالضبط.

سرى للغاية

عبد الناصر: الكام يوم اللى فاتت فيهم خساير .

صوت: بالضبط.

عبد الناصر: إن من جمعيتين تلاتة كان فيه حماس كبير للتطوع.

رفعت: وبقتح يعنى ايه اللى يمنع إن احنا نعمل مؤتمرات شعبية؟

عبد الناصر: آه.

رفعت: وبعدين دى ممكن تنتقل الى لبنان والى أى بلاد عربية أخرى؛ بحيث يبقى فيه جو فى البلاد العربية زى الجو بتاع سنة ٥٦ يعنى من ناحية..

عبد الناصر: يعنى لو اليمينيين يدعوا الى مؤتمر وإحنا نروح هناك ويحصل كلام، فيه هنا ناس ممكن..
ممكن العمليات دى تحصل يعنى.

رفعت: مؤتمر ..

عبد الناصر: شعبى، برضه لكن لو اليمينيين هم اللى بيكونوا يدعوا متهيألى برضه بيبقى أحسن، بعدين بيبندى زى مؤتمر السويس.. كان فيه مؤتمر فى السويس من ٣ أيام وكانوا اتكلموا فيه اليمينيين وكان فيه النعمان، أنا سمعته فى الاذاعة.. فممكن ترتب العملية.

حسين: هو الحقيقة التطوع والحاجات دى يمكن تكون تفصيل، هو المبدأ إن احنا عايزين جماهير الشعب هنا تبقى مش منفصلة عن العملية من ناحية الأخبار اليومية وحماس الناس بالنسبة للموضوع، يعنى دلوقتى فيه شعور كده بانفصال الناس عن العملية إن زى ما يكون ملهمش دعوة بالعملية دى؛ آهو الجيش راح بيحارب هناك وهنا الناس قاعدة يادوب بتسمع الاشاعات ويتسمع الأخبار.

سرى للغاية

ازاى نضمن الناس هنا يبقوا على اتصال دائم بالموقف ونجر شعور الناس مع العملية؛ هو ده اللي لو حد يقعدوا يفكروا لنا ازاى يتعمل سواء كان اليمينيين يطلبوا تطوع، ومتهيألى مرحلة التطوع تيجى متأخرة برضه شوية عشان متبتديش بالفتور اللي جايز يكون السبب فيه هو الأخبار والاشاعات بتاعة الخسائر الكثيرة.

عبد الناصر: يعنى إحنا الآن مش راضيين ننشر أخبار كذب؛ يعنى هو من جانب سعود كل يوم بيقلوا عملوا كذا ووصلوا كذا، بقالهم بيقلوا وصلوا صنعا من أول يوم والكلام كذب وده بيكشف نفسه، إن احنا كبدنا خسائر وعملنا وعلى بعد ٧٠ على بعد ٢٠ ومحصنين صنعا، متهيألى الكلام ده الناس مبتقلوش إلا الناس اللي بدها تقبله.

صبرى: وتشوفه.

عبد الناصر: علنيا حتى كل متجاهل يعنى اللي بيتكلم الجريدة اللي بتطلع هذا الكلام الوحيدة هي وكالة الأنباء العربية، وقليل اللي بيوصل لهم فى الاذاعة طبعا..

حسين: وفى التلفزيون بيحبوا أخبار.

عبد الناصر: مش عايزين الحقيقة نزل أخبار ونقول إن فيه معارك حصلت بدون ما يبقى فيه معارك.

حسين: لا.. طبعا محدش بيقل كده.

عبد الناصر: وإلا الناس تفقد الثقة؛ لأن فيه حاجة بقى يعنى اللي أنا ملاحظها الكلام اللي قلته لكم النهارده تقريبا يعنى ما عدا الأرقام معروف للبلد كلها أو من باب أولى معروف للقوات المسلحة، ليه؟ الضباط اللي جم من هناك فيه ضباط جرحى جم من هناك كانوا موجودين فى المستشفى وفيه عساكر موجودين فى المستشفى، ويعنى لدرجة تانى يوم مثلا خالد بيقل لى على معركة مأرب وعلى ٢ ضباط أسروهم وهربوا. فعلا حصل، وأنا مكنتش

سرى للغاية

سمعت الموضوع ده وبعدين بالليل عرفت الموضوع! هو عرفوا قبلى! (ضحك) طبعا عرفه قبلى ازاي؟ من واحد صاحبه أبوه ضابط شاف ضابط من اللي بيعملوا، وأبوه جه حكي والولد حكي لخالد! هو فعلا لما عرفت بعد كده إن فيه ٢ كانوا اتأسروا لما راحت الطيارات وضربت فالولاد جريوا - ضابط وشاويش أظن - وبعدين بعض الناس بقى من اللي بيحكوا بعد كده بيضاعفوا من العمليات بيحاول كل واحد يقعد يحكى ويدى.. ففى الجيش كل الكلام معروف يعنى كل العمليات بالتفاصيل معروفة كلها مفيش حاجة مش معروفة.

حسين: لأ.. ده فيه واحد امبارح بالليل جه قال لى على الهجوم بتاع البدر، يعنى فى بيتنا امبارح واحد جه قال لى إن البدر النهارده حيهجم على.. والله!

عبد الناصر: ازاي يعنى محدش يعرف؟!

السادات: محدش يعرف خالص.

عبد الناصر: إلا بعد اذا كان استنتج هذا من كلام راديو صنعا.. واحد يعنى official؟

حسين: لكن مش هو يمكن يكون له قدرة على الاتصال، يعنى هو المقصود إن الناس يبقوا مشاعرهم متصلة بالمعركة مبيقوش كده كأنهم ملهومش دعوة بالموضوع، ازاي بقى؟ يمكن أنور وكمال وحاتم مع حد من القوات المسلحة يشوفوا طريقة ازاي.

عبد الناصر: ياخذ أنور وكمال وإننت معاهم.

حسين: لأ. (ضحك)

سرى للغاية

عبد الناصر: ليه؟ ما هو يعنى نشوف العمليات دى كده نشوف ازاي..

محي الدين: بس موضوع التطوع يمكن جاى متأخر شوية.

عبد الناصر: لأ..

محي الدين: الناس حنتسائل. بعد وفود قواتنا بكميات كبيرة زى ما أعلنوا.

عبد الناصر: هو أنا قصدى لو ناس تروح تتطوع يعنى قصدى بعض الناس يوعز اليهم يروحوا سفارة اليمن يقولوا إنهم عايزين، غير إن احنا نعلن طبعا التطوع.

محي الدين: أيوه.

عبد الناصر: لأ.. لأ.. هو النهارده فتح باب التطوع أنا فى رأى يمكن ميحصلش تجاوب نتيجة الكلام اللي موجود.

محي الدين: لأ.. أنا بقول الناس حنتسائل.. ليه التطوع والحاجة الى الناس فى حين القوات موجودة هناك؟ يعتبروا إن القوات فى صعوبة أو فى ضيق أو فى حاجة زى كده.

عبد الناصر: لأ.. لما يتعمل مؤتمر واليمينيين يعملوا مؤتمر، ويروحوا بعض ناس من عندنا وبعدين بعد المؤتمر يعلنوا إنهم عايزين يتطوعوا، بيبقى ده شئ آخر وبتقال: إن بعد المؤتمر فيه شباب وفيه عمال تطوعوا.. الى آخر العملية دى بتبقى ناحية معنوية أكثر من إن احنا نفتتح باب التطوع.

البغدادي: أنا بعتر فتح باب التطوع مش صح.

سرى للغاية

رفعت: بقتح نقطة ثانية، يعنى ما هو يمكن الناس بتشوف ايه اللي أنا حكسبه وايه اللي حاخسره يعنى من ناحية غير الخسائر فى الأرواح من الناحية المالية بالذات، يعنى فأنا بقتح إن يتعمل فى الجرائد ريبورتاجات عن اليمن نفسها وعن امكانيات اليمن والثروة اللي فيها من ناحية اخبارية بحيث توحى للناس يعنى..

عبد الناصر: هو اتعمل حاجات من دى حصل كلام فى الاذاعة.

الشافعى: كتير.

عبد الناصر: ولكن العملية ماتباناش بشكل إن احنا يعنى..

الشافعى: استعمار جديد.

عبد الناصر: هو النقطة الأساسية نحن ندافع عن القاهرة فى صنعاء.

أصوات: بالضبط.

عبد الناصر: هو ده العمل الأساسى زى يعنى العمليات الأساسية، وبعدين يابتنصر الرجعية يابتنصر التقدمية، انتصار التقدمية انتصار لينا. يعنى امسك النهارده مثلا فى الجزائر، أما بعثوا قالوا: أسعد محاسنة هو رئيس الوفد.. فبن بيلا رفض.. يعنى ده انتصار الحقيقة لينا. فيه معركة طويلة تمتد جذورها من المغرب للكويت، هو يعنى إحنا بنفهم الناس.. أولا الناس لازالت روحها كويسة جدا، طبعا الأوساط بتتكلم نتيجة وصول الجرحى الى بعض المستشفيات والكلام ده، وبعدين طبعا فيه أوساط بيهمها إنها تهول فى هذا الكلام، وبعدين معروف فى العمل الحربى يعنى قطعاً لازم يكون فيه خسائر.

الشرباصى: طبعا هو ده اللي يكتب الآن يعنى.

سرى للغاية

عبد الناصر: نعم؟

الشرباصى: اللى يكتب فى الجرايد ميتعرضش للثروة، يعنى هى مصر بتاريخها كله كانت دائما بتبقى حدودها يافى اليمن يافى البلاد العربية يافى سوريا، فاللى بيكتب يكتب من هذه الناحية على إنه كان دائما مصر بتدافع عن نفسها فى هذه البلاد.

عبد الناصر: ومن أيام صلاح الدين وبعده.

الشرباصى: وقبل وبعد صلاح الدين اليمن كان فيها الملك من ملوك مصر، كانوا دايمًا بيأمنوا أنفسهم فى اليمن وفى الجزيرة العربية وفى سوريا؛ فاللى بيكتب يكتب من هذه الناحية لأن ده.

عبد الناصر: وبعدين انتصار الثورة فى اليمن هى فعلا دفاع عننا.

الشرباصى: دفاع عننا والتاريخ كان دايمًا كده.

عبد الناصر: ممكن..

الشرباصى: يعنى أيام الظاهر بيبرس كانت حدودنا فى اليمن يعنى كان دفاعنا فى اليمن.

عبد الناصر: وأيام ابراهيم باشا.

سرى للغاية

الشرياصى: وقبل ابراهيم باشا يعنى فى التاريخ كله، يمكن ياخدوها على إنها مسألة سياسية لكن قبل ما كانت مصر مستقلة استقلال كامل مش تبع تركيا كانت أيضا حدودنا تعتبر فى اليمن دفاع عنا.

[دخول عبد الحكيم عامر]

عبد الناصر: لا يا راجل ازيك؟

عامر: آه.. والله تعبان.

عبد الناصر: إحنا خلصنا اليمن. (ضحك)

أصوات: (ضحك)

الشافعى: حمدا لله على السلامة.

عامر: الله يسلمك.

عبد الناصر: ممكن يعنى وصلتوا لحاجة بالنسبة للموضوع؟ هو أنا قلت على الخسائر الأولانيين ٦ و١٦ و٢٣، بعدين غير العشرين فيه واحد وعشرين بتوع المظلات، فيه اشارات النهارده معرفش أرقامها بيقولوا فيه مجموعتين.

حسين: ايه ٥ أفراد ولا؟

عامر: ٢١.

سرى للغاية

عبد الناصر: بالنسبة للخسائر بتاعة المظلات قتلى وجرحى.

عامر: ١٦.

عبد الناصر: ١٦؟

عامر: ١٦ و ٦ .. ٢٢.

محي الدين: جرحى وقتلى.

عبد الناصر: ٢٢ جرحى؟

عامر: هو الجرحى..

صوت: ما ده يبقى بقية ٢١ .

عبد الناصر: آه.

صوت: مبيقاش فيه مفقود.

عبد الناصر: لأ.. لازم هم قالوا على القتلى اللي حصلوا كانوا قتلى وسابوهم.

عامر: آه.. فيه ٦.

عبد الناصر: آه.. قتلى.

سرى للغاياة

عامر: ده فى المظلات.

عبد الناصر: ده غير الصاعقة، المظلات غير الصاعقة.

عامر: ده غير الصاعقة.

عبد الناصر: آه.. هل دول حقيقة هم أعلنوا ٢٠.

عامر: ٢٠.

عبد الناصر: كام ١٨؟

صبرى: ١٤.

عامر: ١٤ وأظن ٦ برضه.

عبد الناصر: بيبقى ٢١.

عامر: وعندنا واحد ممسوك، والـ ٥ اللي هم جايبين زائد ٣ بيبقى العدد كمل كده.

عبد الناصر: والجرحى؟

عامر: الجرحى مش عارف.

سرى للغاية

عبد الناصر: هم العساكر معاهم أساميهم؟

عامر: يظهر إن كل واحد معاه اسمه وأقرب الأقارب.

ابراهيم: عشان لو حصل حاجة يعرفوا يتصلوا بيه.

محي الدين: تلاقى كل معاه المحفظة فيها نص جنيه مثلا فنتبين إنها حاجة.

عبد الناصر: قريبه وأقرب الأقربين ومحل سكنه.

محي الدين: حاجة standard.

عبد الناصر: ده أنا اتصورت امبارح إنهم جابوا شوية أسامى. هم كانوا بيتكلموا على النقطة ازاي نوضح العملية للناس بتاعة اليمن كموضوع يعنى، وازاي الحقيقة برضه توقيت العملية فى القوات المسلحة. هو يعنى مفيش حد فى الدنيا فى الحرب بيقول أرقام خسائره بالضبط، وبعدين لو تقول خسائرك بالضبط الناس حتضربها فى أربعة! يعنى لما الهند قالوا امبارح ٢٥٠٠ أنا قلت ١٠ آلاف على طول الحقيقة!

أصوات: (ضحك)

عبد الناصر: لأن ده معروف حتى أيام الحلفا والحرب العالمية الثانية كل واحد لو تعد اللي قتلوهم الألمان يطلعوا ١٠ أضعاف الحلفا وتعد اللي قتلوهم ١٠ أضعاف الألمان! النهارده لو بنعد اللي قالوه السعوديين والجماعة دول..

صبرى: امبارح بس قالوا ١٨٠.

سرى للغاية

عبد الناصر: آه.. وده طبعا بيفقد الثقة فى العملية، يعنى هو على أساس ١٦ فى الساعة و ٢٠ من ..

عامر: المظلات.

عبد الناصر: ٦ من مارب وجحانة ١٦ قتيل وهنا ٢٠.

صوت: ٣٦.

عبد الناصر: ٣٦ مع ٦ مفقودين مع ٣٦ يبقى ٤٢، منقدرش نقول هذه الأرقام الحقيقة ولاّ آيه؟

طراف: بس يعنى ذكر إن ٢ مفقودين.

عبد الناصر: فى العملية؟

طراف: الناس آه.. يمكن ده برضه يخليهم يعتقدوا إنه ده كويس.

عبد الناصر: هو الحقيقة العملية دي كانت special يعنى متكلمناش أبدا عن العملية، أول مرة حطينا الملك سعود مسك واحد - ما هو الملك ممكن يمك واحد تانى فيعمل عليه مؤتمر صحفى - فقلنا ٢ مفقودين يعنى.

حسين: هو منقدرش نقول كل ده، لكن لازم يطلع حاجة وإلا الناس طبعا ما هم متوقعين إن لازم يحصل خسائر، ده من قبل ما يحصل اشتباك الناس قالوا: إن فيه خسائر فلانم يحصل برضه.

سرى للغاية

طراف: يعنى إحنا حنقول بأى صفة دلوقتى؟ هل نقول إن احنا بصفة رسمية مشتبكين؟ العالم عارف إن احنا بنحارب، لكن إحنا حنذيع عندنا ونقول إحنا يعنى بيقى ايه موقفنا إحنا بنقول ليه؟ يعنى مش فاهم!

عبد الناصر: لا من ناحية الحرب إحنا بنحارب بناء على الاتفاقية اللى بينا وبين اليمن.

حسين: ده معروف فى الدنيا ده رسمى يعنى.

عبد الناصر: وإحنا النهارده..

الشرباصى: بناء على الاتفاقية..

عبد الناصر: آه.. لكن العملية مكناش عارفين الحقيقة، ولكن عبد الحكيم من بدرى داخل بيقى ازاي وبيعمل إن احنا بنغطى ده وبنجهز؟

حسين: وده جزء يعنى هو الأساس ازاي مشاعر الناس نخليها مع الموضوع، ومنخليش الاشاعات هى اللى تطفى على الكلام.

طراف: تعبئة الرأي العام بالنسبة للعملية كلها.

عبد الناصر: وتقعدها مع عبد الحكيم.

حسين: ما هو لازم نقعد مع عبد الحكيم برضه فى العملية.

عبد الناصر: بعد كام يوم يسافر.

سرى للغاية

السادات: حاضر.

عبد الناصر: هم النهارده بيقولوا: إنهم مع قبائل جهم.

السادات: خولان تحل..

عامر: الزيدى اتقتل.

السادات: خولان تحل لو اتفقوا معاه.

عبد الناصر: والعروش بتصلح..

عامر: والعروش بتصلح الموقف.

عبد الناصر: معرفش هو تغيير الحكومة بتاع النهارده ده والكلام ده..

السادات: هو اللي بعثنا عليه ياريس.

عبد الناصر: لكن هو كويس يعنى؟

السادات: متفق عليه ياريس.

عبد الناصر: حد من اللي هنا راجع؟

السادات: من اللي هنا الإريانى بس.

عبد الناصر: الإريانى؟

سرى للغاية

السادات: أما الباقي فكلهم قاعدين، واتكلمت أنا مع الجافى امبارح والجافى مفيش حاجة أبدا راضى وتمام وقاعد مفيش حاجة.

عبد الناصر: يعنى تعملوا له مكتب فى القيادة.

السادات: الجافى بالذات.

عبد الناصر: واشتغل كويس مع الولاد.

عامر: الجافى اشتغل فى الحديد كويس.

عبد الناصر: يعنى هو فى الجيش لو بيهتموا بيه لأنه حبيقى ضابط.

السادات: هو جاى ضابط.. آه.

عبد الناصر: هو جاى وزير دفاع.

عامر: هو على هنا يخليه يقعد معاه.

عبد الناصر: آه.. قول لعبد المجيد يقول لعلى عشان يعمل له مكتب ويدي له عربية ويعمل له بدل.

عامر: وبعدين بقول لهم: سايبين الدنيا وبتتكلما فى كلام فاضى.. اقتصاد ايه؟ قلت له: إنت ياأخى شوف القبائل عشان يشتغلوا.

الشافعى: هى دى كانت نقطة مهمة تلاقيها.

عامر: وبعدين أنا قلت لهم: اذا كان فى ظرف أسبوع مش حتجيبوا ناس عشان يستلموا صرواح أنا حسحب قواتنا، يعنى قلت له: إحنا المفروض كونا نحتل مراكز ونروح ونقعد.

سرى للغاية

السادات: تعز.. قبائل مراد.

عامر: قال: من فترة مجهزهم وخلص وحيطلعمهم ومواعدنى فى ٤ أيام حيروحو صرواح، وإنه حيعمل حرس وطنى فى الحديدية. قلت له: إنتو بتاخذوا الحاجة تانى يوم بيبيعوها! قلت له اللى حيعمل حرس وطنى لازم من القوات، مش تجيبوا لنا عيل بتاع ١٢ سنة و ١٠ سنين ولا ١٤ سنة أدى له سلاح!

ابراهيم: يجيبوا مقاتلين من بتوع القبائل.

عامر: ولازم تتقوا الناس كلها.

السادات: هو كل ده حنتفق عليه مع جزيلان.

عامر: وقال: إحنا مستعدين..

عبد الناصر: ما هو جزيلان حيعرف.

السادات: جزيلان هو وزير الحربية، هو عنده كل هذا وعايز يعمل كل هذا هو..

عبد الناصر: حيمشى امتى؟

السادات: هو المفروض إنه يمشى على طول ياريس يعنى.

عبد الناصر: نجهز له رسالة..

السادات: طيب والاتفاقية بعثها لك يا حكيم.

عامر: اتفاقية ايه؟

سرى للغاية

السادات: الدفاع المشترك؛ عشان نقول لنا رأيك فيها عشان حياخدها معاه جزيلان.

عامر: آه.

عبد الناصر: هى على أساس اتفاقية..

السادات: آهى ياريس وبعتنا منها لعبد الحكيم.

عامر: طب متحطش فيها..

السادات: هى..هى.

عبد الناصر: دفاع مشترك بس هو جزيلان طلب كده لما جه وقالوا: عايزين الاتفاقية.

عامر: فدى أهم نقطة الحقيقة إنهم يشتغلوا فى القبائل الموالية ليهم، يسلموها ويشغلوها ضد القبائل المعادية.

السادات: بس انشاءالله كمان كام يوم الرئيس لما يكون مسافر انشاءالله..

رفعت: بالنسبة يافندم لموقف انجلترا بالذات فى المعركة.

عبد الناصر: هو كلام الانجليز مع الدكتور فوزى إنهم عايزين يهدوا يعنى زى كده، وبعدين كان ده بناء على كلام الأمريكان. وبعدين الحقيقة الواحد حس إن فيه تغيير فى موقفهم، وأنا بعتر ده كان يمكن بناء على طلب فيصل أو ممهدينهم مدينهم أمل إن حيقدرنا يقبلوا الوضع هناك، وإن التسرع فى الاعتراف قد يساعد الحكومة.

الانجليز طبعاً خايفين على عدن، النهارده الكلام فى البرلمان إن الاتحاد ببأجلوه وعدم خوض أى شئ فيه؛ معنى هذا إنهم عايزين يضمنا عدن بالذات لأن عدن المستعمرة الباقية الحمایات مش مستعمرات. معنى هذا إنهم لو عملوا الاتحاد وانهار الاتحاد كله بينضم لليمن، لكن اذا فضلت عدن لوحدها كمستعمرة والباقي حمايات فإذا حصلت

سرى للغاية

انهيارات فيها والناس طلبت الغاء الحمایات وانضموا لليمن، بيبقى لازالوا محتفظين بعدن..
ده السبب الحقيقة فى العملية دى.

لكن الانجليز فيه واحد اسمه ماكلين خبير أصلا فى حرب العصابات رموه فى
يوغوسلافيا فى الحرب العالمية الثانية ورموه فى البانيا، كان موجود فى عمان وراح الرياض
وبعدين نزل راح بيحان، وبعدين خد ابن سلطان بيحان وبعدين طلع على نجران، وبعد كده
معندناش أخبار عنه! فبرضه باين إن فيه تعاون - وراح مآرب كمان متهياىلى - فيه تعاون
يعنى قطعاً الانجليز يعنى لازم بيشتغلوا عن طرق كثيرة.

نزلوا الأمريكان، الطيارين كلهم اللي بيشتغلوا هناك أمريكان سواء قوات أو أسلحة
ممكن فى منطقة نجران أو منطقة جيزان.. هل ده اللي كنت عايزه بالنسبة لانجلترا ولا
حاجة تانى؟

رفعت: لأ.. يعنى أنا بقول: هل ممكن إن احنا بطريق غير مباشر نهدهم بالبتترول فى المنطقة؟

صوت: متساوئش.

رفعت: زى سنة ٥٦ يعنى؟

عبد الناصر: العملية صعبة جداً، لأ.. وعندنا امكانية إن احنا نهدهم البترول، وده بيخليهم يعنى عندهم
fears أكثر منذ العملية نهدهم بالبتترول مثلاً.

رفعت: آه.

عبد الناصر: أنا فى رأى إن احنا فى أى عملية اذا كت بتتكلم سياسة متخدش العملية..

رفعت: لأ.. أنا بقول بطريق غير مباشر يعنى يفهموا..

عبد الناصر: ده معنى هذا إنهم سيقضوا على جميع العناصر الوطنية اللي موجودة فى مناطق البترول
بسرعة عشان ميدوكش أى امكانية؛ وده بيقتضى على الحركة الموجودة فى الدمام والظهران
ويقتضى على ناس كتير فى الكويت وعلى برضه البحرين؛ لأن هو ده اللي عملوه بعد ٥٦
قضوا على عناصر كتير فى المناطق دى، فإذا هددنا تانى يوم بتتخذ اجراءات سواء

سرى للغاية

مباشرة أو غير مباشرة للقضاء على العناصر الوطنية.. هو فى العملية دى التهديد متهيألى
يضر مايفيدش.

عامر: نههد السعودية والأردن مش بالبترول لو إنهم دخلوا واشتغلوا هو ده اللى..

رفعت: لأ.. يعنى أنا بدى أشعرهم إن تدخلهم فى اليمن حىكون خسارة مش فى اليمن بس.

عبد الناصر: بنبان إن احنا فى المنطقة بالذات فى الخليج والكلام ده، وده مش من المصلحة إن احنا
نكشفهم.
لأ.. هو قصده بالتدمير.

رفعت: آه.

عبد الناصر: حىروحوا ينسفوا العناصر الوطنية اللى ممكن تعمل العمل ده.

السادات: بالضبط.

عبد الناصر: يعنى فى السياسة العافية شىء..

أصوات: (ضحك)

معى الدين: لازم تتحسب.

عبد الناصر: ما إحنا يعنى يهمنى الحقيقة إنهم يجمدوا موقفهم.

عامر: السعودية، إحنا نضرب فى منطقة عسكرية..

عبد الناصر: اذا هم دخلوا.

سرى للغاية

رفعت: أو على الأقل نكون مستعدين.

عبد الناصر: يعنى هو فيه بينهم وبين الأمريكان تعاون متبادل يعنى بيدي أسلحة، وإحنا عندنا كلام من الأمريكان إن هم حيثدخلوا اذا حصل شئ تجاه السعودية.. برضه مندرکش.. يعنى نحاول. السبيل الوحيد الحقيقة لتحقيق جميع الأهداف السياسية الموجودة إن ثورة اليمن تثبت وتقف على رجليها، وهو ده السبيل الوحيد.

حسين: هو الموضوع بتاع القبائل اللي هناك برضه إنهم يعملوا جيش يمنى وينظموا قوة يمنية كويسة تقدر تشيل السلاح؛ يعتبر إن هو ده اللي يثبت الثورة اللي هناك ويشيل عبء كبير من على قواتنا، وميديش مجال أبدا لأى حد إن هو يتدخل طالما هم لسه مضربوش بالطيران، وأخطر حاجة يتدخلوا بيها بالطيران من السعودية.

عبد الناصر: لأ.. ما هو إحنا الجمعة اللي فاتت قلنا هذا القرار وكنا جاهزين حتى واقفين هناك..

حسين: دى بقى إن لو دخلوا فيها مفيش فيها كلام.

عبد الناصر: لازم نتدخل لازم قاعدة الطيران تدمرها.

حسين: الحاجات الثانية والله يتسرربوا وياخدوا فوق دماغهم.

عامر: العملية هتطول.

حسين: آه.. خايف إنت يطول الزمن يعنى؟

عامر: آه.. بنتكلم على الوقت.

سرى للغاية

حسين: يعنى يمكن decision دلوقتى منقدرش ناخده، ننتظر اذا كان فيه حاجة نشوفها اذا كانت نتيجتها ايه نبقى نفكر.

طراف: هل العوامل الجوية ملهاش تأثير يعنى اذا كان فيه أمطار ملهاش تأثير على العمليات فى الفترة اللى جاية دى؟

عبد الناصر: هو هناك يمكن يبقى فيه برد شوية.

عامر: مفيش أمطار.

عبد الناصر: برد شوية، وبعدين ممكن تجتمعوا هناك فى القيادة مرة فى الأسبوع غير الاجتماع اليومى..

عامر: آه.

عبد الناصر: مفيش داعى نجمع مجلس الدفاع دلوقتى، وبتبحث العملية من ناحية من الناحية المالية - وأنا اتكلمت فيها - الناحية المالية من العمليات المطلوبة.

عامر: موجود فعلا خطة ليها.

عبد الناصر: فممكن تبحثوا الموضوع.

بالنسبة للروح المعنوية هو شاف القوات اللى اشتركت واللى حصلت فيها خسائر.

عامر: شفت قواتنا كويسة وروحها عالية ومتحفزة وشرسة.

عبد الناصر: لكن هو طلع بيان من البدر النهارده وأعلن فيه إنه داخل.

آه.. طبعا هم كل ما يتأخروا متهيألى فى صالحنا إحنا دلوقتى القوة فى العمق..

عامر: لوا.

سرى للغاية

عبد الناصر: لوا مش ٢؟

عامر: اللي هو الصاعقة.

عبد الناصر: لأ.. القوة المشاة.

عامر: المشاة ٥ كتائب، فيه برضه ٤ على الساحل وواحدة جوه صنعا.

عبد الناصر: عندنا في عمران؟

عامر: عندنا في عمران كتبية.

عبد الناصر: أى حاجة بالنسبة..

حسين: لو كان البدر حيثقدم عن الطريق الساحلى ممكن الاستفاده من القوات البحرية.

أصوات: آه.. طبعاً.

عبد الناصر: هو الحقيقة من ناحية وجهة النظر العسكرية هو أسوأ الحلول هو إنك تبعد عن الساحل؛ لأن القبائل معادية والأرض مكشوفة ٢٠ كيلومتر سهل ساحلى.

حسين: بس الحلول بالنسبة له؟

عبد الناصر: آه.. بالنسبة له.

سرى للغاية

حسين: أنا بقول: دى مصيدة كويسة أى قوة كويسة.

عبد الناصر: الانجليز خرجوا.. حتى النهارده سامى بيقول لى خايف تكون المعلومات دى fake!

السادات: آه.

عبد الناصر: بس ايه كونها trick ثم موصلوش الى درجة إنهم..

حسين: بس جايز يكون معاهم خبرا انجليز.. أنا بعتمد إن قطعنا معاهم خبرا انجليز.

البغدادى: على أساس تبقى صعده يعنى..

عبد الناصر: لأ.. أصل الـ flow بتاع المعلومات واصل الى هذه الـ conclusion وبعدين الـ discussion اللى بينهم إن هو بيقول له إنزل الساحل باينة وإحنا عندنا المعلومات دى.

حسين: آه.. خلاص.

عبد الناصر: ده الحقيقة اللى بيخلى العملية مش معقول إنها..

صبرى: التشوين كله فى جيزان.

عبد الناصر: التشوين كله فى جيزان، ميزة جيزان الحقيقة إنها حوالى ٨٠ كيلومتر..

صبرى: من صنعاء.

سرى للغاية

عبد الناصر: داخله فى قلب اليمن عن نجران، فإذا هو خد ميدى بيبقى على طول من جيزان بيدى لميدى وعلى طول بيدى لحرص.

الشافعى: هو ده باين كان فيه فى الصحف الانجليزى بيتكلموا فى الموضوع ده؛ على أساس إن السهل الساحلى هو الأمل الوحيد، وزى ما عمل سعود فى سنة ٣٤ بالضبط.

عبد الناصر: وبعدين هنا فيه معلومات السفارة الانجليزى بيقلوا: إن الجماعة دول ماشيين وإنهم مصممين يدخلوا على الطريق الساحلى.

حسين: وبعدين أى قوة مدرعة نظامية هناك تمسح أى حد يتقدم على الساحل.. فرصتنا يعنى أنا بعنقد.

عبد الناصر: خصوصا الساحل، وبعدين هو معتبر إن المحابشة معادية لينا ومعتبر عبس معادية لينا، وقطعا اذا نزل فى السهل الساحلى حيعمل على اباده القبائل الموجودة دى، يضربها لأنها قبائل مش معاه ميهموش اللى يموت فيها.

حسين: خصوصا حنة فيها مطار لو حنة فيها مطار تبقى شنيعة.

عبد الناصر: عبس فيها مطار..

حسين: أصل عيب إن ياخدوا حنة فيها مطار.

عبد الناصر: مفيش مطار يسمح للطائرات المقاتلة أبدا هناك.

سرى للغاية

حسين: آه.

عبد الناصر: غير الـ Yak ، طائرة جديدة بيستخدموها اسمها إيه؟

عامر: اليوشن ١٤ اللي كانت عندهم.

صبرى: Mid Helicopters.

عبد الناصر: بس سعود بيقول: إن احنا مش عايزين ندخل حتى لا ندخل فى حرب لا يعرف إلا الله مداها!

أصوات: (ضحك)

عبد الناصر: ما هو قايل كده للبدر فى جواب ليه: إنك متدخلش بعربيات من عندنا خد نفسك وادخل واطلع فى الجبال، والتانى بيقول له: ندخل بعربيات، بيقول له متجرجناش فى حرب لا يعرف إلا الله مداها. بعد كده حيزقوه يحطوه على حدود اليمن ويسيبوه لازم من عندهم، وهو عايز يدخل يعنى بيزق فى الراجل إنه يدخل وعايز يورطه. الحقيقة وهو الحسن لو اتساب، العمليات اللي مع الحسن سعود باعت يقول: إن هذا الامام غير مقدم! (ضحك)

أصوات: (ضحك)

سرى للغاية

حسين: على الحسن؟

السادات: على الحسن. (ضحك)

عبد الناصر: ويظهر إن هذا قبل ما يطلع البدر، يظهر إن هذا الامام غير مقدم لأنه جرى من صعدة وقعد فى نجران، وكل يوم سعود باعت له طول النهار يكتب والراجل يقول له: طب هات لى عربيات.. جاب له عربيات، قال له: بلاش عربيات جيب لى جمال جاب له جمال، وبعدين قال له: طيب حرد عليك.. مردش، وبعدين قال له: ده أنا متعور! فالراجل باعت بيقول: يظهر إن هذا الامام غير مقدم الظاهر مفيش فابدة يطلع فى ايد حسن.
ثانيا: البدر..

حسين: البدر أنيل من الحسن.

عبد الناصر: أنيل.. آه.. شالوه بالطيارة وإحنا كنا رايعين دمشق وكانوا حتى قبل ما نقوم للاذقية قالوا لنا: ماتقوموش! وأنا سألت بغدادى.. هل نقدر نقوم؟ قال لى: ممكن. كان ألف قدم سحب واطى، فأنا قلت: بنطلع والله وإذا كنا منقدرش ننزل بنرجع تانى. كان معانا البدر، وصلنا فوق دمشق مبقيناش عارفين ننزل مفيش فتحة فى السحاب تبين، ففضلنا لافين تلت ساعة فوق دمشق وأنا قاعد والبدر أدامى بقى.. (ضحك)

أصوات: (ضحك)

البغدادى: صحيح.. صحيح.

عبد الناصر: يعنى فقد النطق!

سرى للغاية

أصوات: (ضحك)

عامر: وبعدين أنا شفت سنان.

حسين: مين.. مين؟

عامر: موجود آه.. فى صنعا.

حسين: مين ده؟

السادات: سنان.

عامر: وبعدين من مناقشتنا مع عبد الرحمن قال لى: بصراحة أنا الأول سبت السلال لغاية ما يتورط.

عبد الناصر: لأ.. هو أصل كمان البيضانى ميقدرش يشتغل..

السادات: اطلاقا.

عبد الناصر: وبعدين النهارده لأول مرة من ألف سنة يوصل شوافع الى صنعا!

السادات: بيشتغل بخبث بس مش كويس.

سرى للغاية

محي الدين: لكن سنان مش من خولان؟

السادات: سنان خولان.. آه.

محي الدين: وخولان اللي عمل العملية دي.

السادات: نصها.

عبد الناصر: هو خولان اللي عند الجوف مش كده؟

عامر: آه.

عبد الناصر: مش خولان اللي عند صرواح أصل خولان دي مجموعة قبائل.

السادات: ٣ - ٤ مجاميع، فيه خولان فى الشمال كمان عند سعود.

عبد الناصر: آه.

عامر: هو كان الكلام عن الفلسفة الاقتصادية والكلام ده.

محي الدين: هو ما فى مانع الكلام عنها بس لازم يبقى شغل أساسى هناك.

عبد الناصر: هم شالوا محسن العينى.

السادات: محسن العينى.. رئيس الوفد فى الأمم المتحدة.

عبد الناصر: أى أسئلة بالنسبة لجحانة، جهم؟ (ضحك)

أصوات: (ضحك)

سرى للغاية

عبد الناصر: بالنسبة للموضوع الثانى اللى هو موضوع الهند والصين، بالنسبة للهند والصين إنا من الأول واشتركنا فى العملية وبعدين أنا ادبت اقتراح بالانسحاب الى المواقع اللى بدأ منها القتال وايقاف النار والانسحاب، وبعدين ١٠ كيلومتر أو ٥ أو أى حاجة منطقة حرام ثم التفاوض، ثم قلت لهم: أنا مستعد حد بيروح - اذا كنتوا بنوافقوا - وقلت: إن على ممكن يروح فى الحال هناك الى بكين ويتكلم ويتفقوا، نهرو تقريبا وافق، هو بيقول.. مش كده.

صبرى: هو قال عموما يعنى.

عبد الناصر: لكن الصينيين رفضوا الاقتراح امبارح، وأنا قلت لهم: إن هذا الاقتراح بيضر بيكوا لأن حتى نهرو كان عايز يشتري أسلحة مننا لأنه مش راضى ياخذ مساعدة من أمريكا، وكان من ٨ أشهر عايز يشتري أسلحة. الحقيقة أنا قلتها لهم لأن عندنا بعثة هنا دلوقتى من الهند بتشتري أسلحة. كلام معقول وتضطروه دلوقتى إنه بيمضى، وحتى فى موقف كوبا مقدرش يتكلم بصراحة لأنه مزنوق، وبتاخذوا على الناس اللى خدموكوا زى كريشنا من أول يوم، النهارده مشى!

محي الدين: خلاص؟

عبد الناصر: طلع مشى!

صوت: فيه حملة ضده مش..

البغدادى: لأن مادافعوش عنه.

عبد الناصر: لأ.. نهرو دافع عنه ولكن يعنى..

البغدادى: بيلقى اللوم عليه.

سرى للغاية

عبد الناصر: هم باعتين بيقولوا: ثبت إن سياستكوا صح، وإحنا - هم اللي بيقولوا - وإحنا سياستنا كانت غلط، وانتو بتنادوا بالسلام وبتبنوا قوة مسلحة إحنا بننادى بالسلام والمفاوضات واحترام المواثيق وأدينا.. دول باعتين يشتروا منا الدبابات القديمة!

السادات: يانهار أبيض!

عبد الناصر: وطالين مدافع رشاشة من عندنا وبنادق قديمة وهاونات قديمة وعازين كل الأسلحة القديمة اللي عندنا ياخذوها. يعنى بالنسبة للهند..

السادات: دولة كبيرة!

عبد الناصر: هم بعثوا من ثلاث أشهر وإحنا وافقتنا، وفيه بعثة هنا جه واحد وجاى ١٠ عشان يعاينوا الأسلحة وبيأخذوا السنوريون. والكلام ده متفقين مع الروس على إنهم يدونا عندنا T54 يعنى عدد كبير من T50، وبعدين الحقيقة الجرايد فى الهند هاجمتنى كثير الجمعة اللي فاتت بعض الجرايد! (ضحك) على أساس بلدنا بعيدة.. يعنى آدى الموقف آدى الصين آهى هاجمت علينا وعملت لنا ايه! الحقيقة دول الحيا.. عبد الناصر اللي احنا سنة ٥٦ بالضبط كل حاجة وعملنا وسوينا ومابعثش حاجة! هم الجمعة دى ابتدوا يهاجموا.. جريدة Express.

صبرى: أيوه.

عبد الناصر: وبعدين امبارح مدراس وبعدين كذا جريدة.. جرايد ايه يا على؟

صبرى: لأ.. Indian Express.

عبد الناصر: هو إحنا عاملين بيان على أساس النهارده، "واصل مجلس رئاسة الجمهورية فى اجتماع اليوم برئاسة الرئيس جمال عبد الناصر بحث النزاع القائم بين الهند والصين، ودرس آخر التطورات لهذه المشكلة البغيضة التى تهدد بقيام حرب شاملة بين الدولتين. وأصدر المجلس البيان التالى، كانت الجمهورية العربية المتحدة تتابع باهتمام وقلق بالغين أنباء الخلاف بين الهند والصين حول خلاف الحدود، وكانت ترجو ألا تتطور الأمور بين

سرى للغاية

الدولتين الى حد استخدام القوة، إلا إن حوادث الاصطدام والاشتباكات التي وقعت على الحدود من الجهة الصينية فى العشرين من أكتوبر ٦٢ ساعدت على اتساع الخلاف آخذاً بشكل النزاع المسلح؛ مما كان له وقع أليم على شعب الجمهورية العربية المتحدة الذى تربطه بالشعبين الهندى والصينى روابط الصداقة والتعاون الوثيق، ولم يكن فى وسع الجمهورية العربية المتحدة إزاء خطورة الموقف بين الدولتين أن تقف فى صفوف المتفرجين.

وعليه فكان على الجمهورية العربية المتحدة أن تسارع وتقوم بدورها فى العمل الإيجابى باتخاذ الخطوات اللازمة من أجل وقف هذه الاشتباكات المسلحة وإزالة شبح الخطر المتزايد؛ حتى يساعد ذلك على إيجاد حل سلمى للمشكلة والقضاء على أسباب النزاع بين الهند والصين، ولكل منهما مكانة تقدير كبيرة لدى مجموعة الدول الأفريقية - الآسيوية. وكان قد أبرق الرئيس عبد الناصر فى الحادى والعشرين من أكتوبر الحالى برسالة الى كل من شواين لاي والبانديت جواهر لال نهرو رئيس وزراء الهند للتوفيق بين الدولتين، ويعرض عليهما وضع كل امكانياته ومعه - معاك الصورة عايزين نغير ومعه دى - "متعاوناً مع رؤساء" بدل ومعه.

صبرى: آه.

عبد الناصر: هى اللى بتدى الحساسية فى الخطاب.. متعاوناً مع مش كده.

صبرى: آه.

عبد الناصر: "قبول جهود التوفيق بين الدولتين، ويعرض عليهما وضع كل امكانياته متعاوناً مع رؤساء دول عدم الانحياز فى افريقيا وآسيا فى خدمة السلام بين البلدين. وفى الوقت ذاته وعملاً بسياسة تبادل الرأى والمشورة بين الدول الصديقة فى كل ما يطرأ من أحداث، فقد بعث الرئيس جمال عبدالناصر الى رؤساء دول وحكومات كل من: أفغانستان واندونيسيا والجزائر والسودان" .. السودان وافقوا؟

سرى للغاية

صبرى: آه.. أنا زودتها، هم قالوا لى أول امبارح: إنهم مستعدين يتعاونوا.

عبد الناصر: "والمملكة المغربية وسيلان وغانا وغينيا وكمبوديا ومالي؛ بغية القيام بجهد مشترك تقوم به دول ميثاق الدار البيضاء ودول عدم الانحياز فى افريقيا وآسيا لدرء الخطر القائم على حدود الهند والصين، وتبديد شبح الحرب المائل هناك حتى يحل السلام فى القارة الآسيوية. ومما ضاعف الأمل عند الجمهورية العربية المتحدة" .. ومعها، أنا شايل ومعها دى عايز أحط حاجة بدل ومعها متعاونة بقى أو التى تتعاون أو "ومما ضاعف الأمل عند الجمهورية العربية المتحدة والدول الافريقية والآسيوية ما بدى من روح الاستعداد الذى وضح من رد كل من شواين لاي وجواهر لال نهرو الى الرئيس عبد الناصر؛ فقد رحب كل منهما بأى خطوة تراها الدول الصديقة لحل هذا النزاع" .. بدل بأى خطوة قد تراها بجهود الدول الصديقة لحل هذا لنزاع علشان محدش يوافق على أى خطوة مثلا دلوقتى.

"كما شرح كل من الزعيمين الهندى والصينى وجهة نظره ازاء المشكلة القائمة بين البلدين حول الحدود، ودرست الجمهورية العربية المتحدة الأمر بكل نواحيه على ضوء الرسائل التى بعثت بها الصين والهند ورسائل رؤساء الدول الافريقية والآسيوية ودول عدم الانحياز الى السيد" .. هو مش كل الحقيقة الدول الآسيوية. آه.. "ودول عدم الانحياز الى السيد رئيس الجمهورية.

وفى السادس والعشرين من أكتوبر الحالى بعث الرئيس جمال عبد الناصر برسالة الى كل من البانديت نهرو وشواين لاي يقترح ما تراه الجمهورية العربية المتحدة أساسا لهذه المشكلة، ويتلخص هذا الاقتراح فيما يلى:

سرى للغاية

أولاً: إيقاف القتال فوراً.. الذى بدأ فى ٢٦.

ثانياً: عودة قوات كل من الجانبين الهندى والصينى الى المواقع التى كانت تحتلها قبل الاشتباكات المسلحة".

حسين: امتى.

محي الدين: أكتوبر بقى.

عبد الناصر: لأ.. يعنى لحظة واحدة، هو هنا قايل عند الخط الذى كانت تعسكر فيه يوم ٨ سبتمبر الماضى، هو جواب شواين لاي لى بيتكلم على ٢٠ أكتوبر، وجواب نهرو بيتكلم على ٨! هو ٨ زى ٢٠ مش كده؟

صبرى: آه.

عبد الناصر: بنقول: "التى كانت تحتلها قبل الاشتباكات المسلحة التى بدأت يوم ٢٠ أكتوبر".

صبرى: أيوه.

عبد الناصر: أى عند الخط الذى كانت فيه يوم ٨ سبتمبر فيبقى أخذنا ده وأخذنا.

صبرى: أيوه.

عبد الناصر: ده وبعد الاشتباكات المسلحة الأخيرة.

سرى للغاية

صبرى: أيوه.

عبد الناصر: لأن فيه اشتباكات مسلحة من سنة ٥٩.

صبرى: أيوه.

عبد الناصر: فيبقى "التي كانت تحتلها قبل الاشتباكات المسلحة الأخيرة التي بدأت يوم ٢٠ أكتوبر أى عند الخط الذى كانت فيه يوم ٨ سبتمبر". وبعدين بنقدر ندى تصريحات للصحفيين إن نهرو بيطالب بقبل ٨ سبتمبر يعنى بحيث بيان..

صبرى: الفرق.

عبد الناصر: أش أ بنشرح.

ثالثا: وهنا بقى فيه حنة ناقصة من الاقتراح اللى احنا حطيناها إن على "ويمكن الاتفاق على الانسحاب من هذا الخط".

سرى للغاىة

صبرى: هو ده الاقتراح اللى أنا بعته للهند.

الشافعى: لمنع الصدام فى المستقبل.

عبد الناصر: هل الهند ترفض الانسحاب؟

صبرى: لا.. بالعكس ده مصلحة الهند بقى.

عبد الناصر: لكن أنا بعته للصين.

صبرى: آه.

عبد الناصر: يعنى "ثالثا: تحديد منطقة حرام تفصل بين قوات الدولتين" .. مش كده؟

صبرى: تفصل بين الجانبين.

البغدادى: مناطق نزاع يعنى.

عبد الناصر: مش مناطق نزاع، "تحديد منطقة حرام تفصل بين قوات الدولتين".

سرى للغاية

محي الدين: يتفق عليها.

عبد الناصر: بس كده متهيألى.

صبرى: كده أحسن برضه.

عبد الناصر: آه.. ثالثا: قيام مفاوضات بين الجانبين لتسوية جميع المسائل المتعلقة بالنزاع بالطرق السلمية..

صبرى: آه.. مفاوضات! (ضحك)

عبد الناصر: فيه ممكن مفاوضات أثناء الحرب بالطرق بالوسائل؛ أصل ممكن المفاوضات تجرى والحرب شغالة.

حسين: آه.. بس بدال ما إحنا قلنا الاقتراحات اللي فاتت لو انتفدت يبقى خلاص.

عبد الناصر: لأ.. على أساس إن أثناء المفاوضات ميبتديش واحد يخبط موقع.

الشافعى: آه.

صبرى: وده اقتراح نى وين النهارده.

عبد الناصر: أنا مقرتش.

صبرى: نى وين موافق على كل اقتراحاتنا ما عدا وقف القتال فورا.

سرى للغاية

عبد الناصر: ليه؟

البغدادى: لأنه عايز يكسب نقط بقى.

صبرى: لأن تقديرى أنا إن الصين ضد الفكرة لأنه ايقاف القتال..

عبد الناصر: موافق على الرجوع وعلى ٨ سبتمبر؟

صبرى: أيوه.

عبد الناصر: الله طب ازاي حيرجع من غير..

حسين: من غير ما يوقف قتال؟

صبرى: لأ.. هو معنى هذا يعنى إن..

حسين: عايزينهم يفقدوا خسائر كبيرة؟

عبد الناصر: آه.

صبرى: العملية بقى حنتفاوض على إنه يرجع.

عبد الناصر: بتفاوض ويدوله نقطة تانية.

صبرى: والقتال داير بيتفاوض.

سرى للغاية

عبد الناصر: على نقطة رجوع.

صبرى: على ٨ سبتمبر.

عبد الناصر: حنتقاوض على ايه اذا كان الاتنين بيقلوه هو ده..

حسين: يمكن عايز يديهم درس قبل ما..

عبد الناصر: الوسائل السلمية معناها إن محدش.. هو بيتقدم.

حسين: موقفه أحسن.

عبد الناصر: ده اسمه ايه ده أنا بعث له قلت له: منيش فاهم الجواب اللي إنت بعته لى بيقول: إن عايزين يرجعوا..

صبرى: line of action.

عبد الناصر: line of action control. جالى السفير الروسى وبيقول لى: إنهم مش عارفين يتدخلوا ودلوقتى الصين عايزة line of action control. قلت له: ايه هو؟ قال لى: اللي وصلت له القوات. قلت له: لا.. منيش فاهم line of action النهارده بقى! قلت له: ايه line of action control؟ قال لى: كده. قلت له: جواب شواين لاي بيقول: لأ.. مش ده، ده الـ line بتاع ٩ أكتوبر سنة ٥٩. ما حد عارفه ايه! يعنى جواب شواين لاي الحقيقة بيقول لى: إن اقتراحك يمكن هيحطنا فى موقف أصعب من اقتراح نهرو! ليه مش فاهم برضه..

سرى للغاياة

البغدادى: نهرو بيقترح إنه يبدأوا من مناطق..

عبد الناصر: اللى قبل ٨؟

البغدادى: اللى قبل ٨ طول ما فى مسافة..

عبد الناصر: لا.. لأ.. هو اللى عايز كده الصين.. المواقع اللى هى يوم ٨ الصين واخدين واكلمين من أراضى الهند ٣ - ٤ ميل مش كده؟

صبرى: أيوه.

عبد الناصر: فالصين بتبقى برضه محتلة الهند، بعد كده الصين باستمرار كانت تقول ننسحب ٢٠ ميل بقى من الخط.. مش فاهم؟

صبرى: آه.. ليه بقى؟ لأنه هو حصل هجوم هندى؛ بعد ٨ سبتمبر الهنود احتلوا بعض مواقع كانت محتلاها الصين.

عبد الناصر: يعنى أحسن له يوم ٨ مش ٢٠؟

صبرى: لأ.. مش عموما.

سرى للغاية

عبد الناصر: لأ.. ٨ أحسن من ٢٠.

صبرى: ٨ أحسن من ٢٠.

عبد الناصر: بالنسبة..

الشرباصى: للهند.

عبد الناصر: لأ.. للصين.

صبرى: للصين.

عبد الناصر: كمان؟

صبرى: أيوه.

عبد الناصر: طيب يبقى هنا إحنا محددين أى "عند الخط الذى كانت فيه القوات" - نزود القوات والله -
"الذى كانت فيه قوات الجانبين" مش كده؟ قوات الدولتين يوم ٨ سبتمبر.. ده فى ثانيا.

صبرى: اللى كانت تعسكر فيه أولا.

عبد الناصر: "الذى كانت تعسكر فيه".

بعدين، "ثالثا: تحديد منطقة حرام تفصل بين قوات الدولتين.

سرى للغاية

رابعا: قيام المفاوضات بين الجانبين لتسوية جميع المسائل المتعلقة بالنزاع على الحدود بالوسائل السلمية.

وأبرق الرئيس جمال عبدالناصر بهذه المقترحات الى رؤساء دول وحكومات البلاد غير المنحازة فى افريقيا وآسيا التى تشاركه الرأى والجهد فى إحلال السلام بين الصين والهند محل النزاع". بدل ما نقول بلاد غير منحازة نقول: "بلاد" .. يعنى غير المنحازة ما بيجى اسمه ايه بيقول لك: أنا غير منحاز! هنا بورقية!

"وان رئيس الجمهورية العربية المتحدة وأعضاء مجلس الرئاسة وهم يكتبون التصورات ويدرسون كل الخطوات التى تتخذ فى هذا السبيل، يرون أن المقترحات التى تقدم بها الرئيس جمال عبد الناصر الى كل من الطرفين المتنازعين تعتبر أساسا صالحا - بدل أساسا لدرء الخطر - أساسا صالحا للوصول الى حل سلمى لدرء خطر الحرب المتزايد بين الدولتين".

بدل لدرء الخطر المتزايد خطر الحرب المتزايد بين الدولتين ماشية؟ ولأ هو الموجود لغاية دلوقتى مش حرب بيعتبروه حوادث حدود.

عامر: الحرب الشاملة تقوم على..

عبد الناصر: مافيش طيران ولا فيه حاجة لسه. "ولووقف القتال الناشب على حدودهم وإيجاد سبيل لحل المشكلة عن طريق المفاوضات السلمية، بدلا من سفك الدماء بين أبناء الشعبين الصديقين اللذين ربطت بينهما أعمق الصلات منذ قديم الزمن، ويقومان اليوم بدور سلمى" - بلاش سلمى هنا - لأن هو "بدور كبير فى الكيان الآسيوى - الافريقى"؛ لأن سلمى متناقضة مع اللى حاصل مش كده؟

صبرى: أيوه.

سرى للغاية

عبد الناصر: "وإذا كانت الجمهورية العربية المتحدة تؤمن بأن مبادئ باندونج التي تدعو دول العالم الى حل المشاكل الدولية عن غير طريق القوة، فإن الجمهورية العربية المتحدة أشد ايمانا بضرورة تطبيق هذه الدعوة، خاصة بالنسبة لمشكلة تقوم بين دولتين من دول ميثاق باندونج نفسها هما الصين والهند، وقد ساهمت كل منهما بنصيب كبير وجهد عظيم فى اخراج هذه المبادئ واعتناقها.

وتؤكد الجمهورية العربية المتحدة إنها لن تألوا جهدا فى سبيل بذل كل المحاولات للإبقاء على الصورة الرائعة للتضامن الافريقي - الآسيوى؛ حتى لا تشوبها قطرات الدم ومعارك القتال بين دول من مجموعة الأمم الساعية للسلام".

حسين: هو فيه نقطة فى الآخر فى الاقتراحات، مش كانوا بيتفاوضوا قبل كده محصلش مفاوضات بينهم قبل كده أبدا فى الموضوع؟

عبد الناصر: اتفاوضوا ١٠ سنين!

حسين: يعنى عايز أقول: اذا كان هم اتفاوضوا قبل كده وفشلوا وبعدين إحنا بنقول يتفاوضوا مرة تانية، هل مش ممكن اقتراح لجنة من كذا دولة تساعد فى المفاوضات دى؟

محي الدين: تحكيم يعنى مثلا.

حسين: تساعد فى المفاوضات، على إن المفاوضات قبل كده ما هى طبعا مانجحتش؛ طب ما هو ايه احتمالات النجاح فى المستقبل؟ إن كان فيه حد بيدخل زى لجنة تحكيم آسيوية أو لجنة محايدة يعنى بيان هنا..

سرى للغاية

عبد الناصر: ما هو باين إن الدول ممكن واحد منهم يقول لنا هذا الكلام، وبعدين سوريا اقترحت كلام بهذا الشكل وبعدين إحنا نقوله.. خالد العظم!

حسين: أنا معرفش!

عبد الناصر: يبقى واخدين موقف خده خالد العظم، الفرق بينا وبين الدول إن دولة وافقت قالت أنا باقترح دولة قالت إحنا بنقترح لجنة تحكيم ودولة قالت بنقترح كذا ودولة قالت بنقترح كذا. الدول الغربية خدت موقف الهند، الدول الشرقية ساكتة الدول اللي جنب الصين خايفة من الصين ومش قادرة تفتح بؤها. دول عدم الانحياز إحنا الحقيقة بنزء فيهم وحتى كثير يعنى بيردوا ردود! إحنا دخلنا دور ايجابي فى العملية، كنا نقدر نقول إن احنا نعطف على الهند و.. الى آخره أو إن احنا ضد الكلام ده، لكن ده فيه جوابات يوميا بينا وبين نهرو وبيننا وبين شواين لاي، أما إحنا أعلن إن احنا بنتوسط وإحنا بنعمل وإحنا بنسوى واتصلنا بالدول فأعلن.

فخالد العظم من يومين راح جاب سفير الصين وسفير الهند وقال لهم: إن احنا عايزين نقترح توسط.
وبعدين فيه دولة تانية قالت إنهم بيقترحوا توسط.. الجمهورية العربية المتحدة وكانت دول آسيوية كمبوديا ولا سيلان، فيه الاقتراح جاهز.

حسين: هو لو تيجى من حد تانى برضه كويس.

عبد الناصر: آه.. وبعدين فيه آلاف الاقتراحات بس محدش سافر الحقيقة فى العملية، يعنى امبارح شايف بتاع الصين ويوم الجمعة شايف بتاع الصين ويوم الخميس شايف بتاع الهند، يوم الجمعة على شاف بتاع الصين. وبعدين الحقيقة هو الغرض من ده إن الهند يعرفوا إن حينش هذا الكلام، هم مبسوطين قوى بالكلام اللي طالع فى الأهرام النهارده. متهيألى هل ده بالنسبة للهند تعتبره كافي ولا ايه؟

سرى للغاية

محي الدين: هم يرضوا بيها؛ ده اقتراح الصين ينسحبوا ٢٠ كيلومتر من خط القتال الحالى.

عبد الناصر: لأ.. لأ.. لكن ما أنا كنت فاهم ده السفير الروسى..

أصوات: (ضحك)

محي الدين: أنا باتكلم الجرايد بس يعنى.

عبد الناصر: هم بيقترحوا من شواين لاي line of action control. ما أنا شرحته دلوقتى هو الخط اللى كانوا فيه فى أكتوبر سنة ٥٩؛ معنى هذا مكماهون بالنسبة للشمال custom design بالنسبة للشرق ده شرحه برضه. أنا مش فاهم لغاية دلوقتى بس line of action control.. الكلام ده بتاع الهند.
أنا قرئت أصلى كل العملية الجمعة اللى فاتت..

صبرى: هو معنى فض ٥٩ الحقيقة إنه الصين بتساوم الشرق قصاد لاداخ اللى هى العملية أساسا.

عبد الناصر: ترجع فى الشرق؟

صبرى: ترجع فى الشرق لخط ماكماهون، وفى نظير إنها تاخذ منطقة لاداخ اللى هى متاخمة لكشمير.. وعشان كده الهند رافضة هذا.

البغدادى: وبعدين يظهر موقف باكستان كمان..

صبرى: آه.. ما هو الصين سكتت باكستان بإنها بتتفق معاها!

سرى للغاية

البغدادى: والأمريكان بعثوا له والانجليز بعثوا له اذا كان عايز ياخذ لاداخ.. الصين.

صبرى: وفيه مفاوضات ماشية.

عبد الناصر: بورما.. الصينيين عملوا اتفاق مع بورما وعملوا اتفاق مع نيبال وعملوا مفاوضات وتسويات مع باكستان وعزلوا الهند، وبعدين ابتدوا وحشدوا قواتهم فى الحدود.
عايز ده ولا عندك؟

صبرى: عندى.

عبد الناصر: مفيش داعى أقرأ الجوابات والكلام ده عمليات يعنى طويلة. نهرو بعث لكل الناس جوابات بما فيهم بن جوريون رئيس وزراء اسرائيل، بن جوريون رد عليه امبارح.. برقية الى شيرى نهرو رئيس وزراء الهند ردا على برقية نهرو التى طلب فيها تأييد اسرائيل للهند فى النزاع الحالى فى الحدود مع الصين تقول - رويتر - "إن بن جوريون أبلغ نهرو أن اسرائيل تتبع التطورات على الحدود الهندية باهتمام بالغ، وإن اسرائيل تقدر كل التقدير ضبط النفس الذى تبديه الهند كما اتضح خلال المراحل المتعددة للنزاع على الحدود". وأضاف "إننا نشعر أنه يجب تأييد أى اجراء يساهم فى تخفيف حدة التوتر على حدودكم".
يعنى متهياالى كلامنا أحسن قوى من كلام بن جوريون، وتضيف رويتر.. هل الكلام ده بقى حيزعل الصينيين تفنكر ياعلى؟

صبرى: الموقف ده؟

سرى للغاياة

عبد الناصر: هو مخالف لوجهة نظر الهند برضه لكن هو..

طرف: أقرب للصين.

السادات: اللى حيش يتوسط مش ممكن حيرضى الاتنين!

عبد الناصر: وبعدين أنا قلت لهم امبارح: ولو قلت بعت شواين لاي طب قولوا لنا ايه الحل؟ متهيألى مش حيقطعوا يعنى.

صبرى: الصين؟ معتقدش يعنى.

عبد الناصر: يعنى هم عملوا فينا طبعاً عملية بكداش وإحنا لعنا لهم أبوهم!

صبرى: هم مش حيصطدموا معنا أبداً لأن هم دلوقتى أساساً عايزين يعزلوا الهند.

عبد الناصر: وبعدين إحنا الحقيقة مدخلناش لوحدها، لما جينا ندخل روحنا جايبين معنا كذا دولة وبانين داخلين وبنبعت لهم كل البرقيات وكل الجوابات وكل العملية وبانين إن فيه أخذ وعطاء، كل الناس اللى هنا بيصطدموا معنا.. عندك نكروما وافق على وجهة نظر..

صبرى: أبوه.

عبد الناصر: كيتا موافق امبارح على المقترحات، سيكتورى مردش رد كافي.

سرى للغاية

صبرى: سيكتورى قال: حيجمع اللجنة السياسية والمكتب السياسى.

عبد الناصر: بن بيلا باعت موافق.

صبرى: وبعدين النهارده نى وين بتاع بورما يعنى الحقيقة تقريبا موافق.

عبد الناصر: نى وين تقريبا موافق، بندرانىكا كاشة شوية!

صبرى: آه.. اندونىسيا اللى متكلمش خالص.

عبد الناصر: اندونىسيا مردش علينا؛ لأن هو اندونىسيا واقعين مع الصين دلوقت وواقعين مع الهند.

السادات: مع الهند؟

عبد الناصر: واقعين مع الهند بقالهم سنة، وأنا معلوماتى دى من الـ Observer، فيه مقالة كانت فيها يوم الجمعة اللى فانت بتبين الـ clash اللى حاصل بين الهند واندونىسيا underground من غير اعلان عنها. وقطعا رأيى كانت اندونىسيا فى معركتها مع الهند عايزه تعتمد على الصين وبهذا فسوكانو مقالش حاجة.

طبعا بتضيف رويتر.. "بن جوربون انتهاز الفرصة وعبر عن موقف اسرائيل فى نزاعها على الحدود مع الدول العربية إنها تقف مع نهرو؛ على أنه يجب على جميع الدول أن تتبذ استخدام القوة أو التهديد باستخدامها فى العلاقات الدولية. وإنما قد اقترحنا لهذا السبب على جيراننا العرب نزع السلاح نزعا شاملا وهى اسرائيل والدول العربية تحت اشراف متبادل، ونحن نرى فى هذا سبيلا لمنع الحرب".

سرى للغاية

أصوات: (ضحك)

عبد الناصر: مدلوش حاجة!

الشرباصى: عايز ياخذ!

أصوات: (ضحك)

عبد الناصر: البيان ده حد له وجهة نظر على اللي فيه؟

حسين: لا.. كويس.

عبد الناصر: من رأيى أنا بعد كده قد نضطر نأيد الصين أكثر شوية يعنى متهيألى نأيد الهند.. ده الواحد لخبطونا!

أصوات: (ضحك)

عبد الناصر: الهند لأن نهرو الحقيقة أما تقرا جوابه بيقول اقتراحك! يعنى الحقيقة ببيان يعنى كل الجوابات هنا رايحة وجاية.

محي الدين: تعبان أصلا.

البغدادى: كل آمالهم بالجو اللي حيساعدهم فى تجميد الموقف.. منتظرين الجو.

سرى للغاية

عبد الناصر: مين؟

البغدادي: الهند يعنى كل آمالها فى إن الجو..

صبرى: ما وقف القتال تقريبا.

عبد الناصر: الرد بتاع يوم ٢٨ بعد الاقتراح لما راح لنهرو الجواب من السفير؛ باين إنه معندوش مانع فى الاقتراح.

التانى بقى فى جوابه يعنى الحقيقة مش موافق؛ يعنى قعد شرح فى العملية وبعدين مش موافق على الاقتراح!

وبعدين فى نفس الوقت برضه إحنا حننشر إن احنا اتفقنا معاهم فى التلات أشهر على صفقة الأسلحة، وأنا قلت للسفير الصينى امبارح: إن احنا فيه اتفاق، وهم على أساس مش عايزين يشترروا فبيطلع موضوع الهند إن احنا مدينهم سلاح وكذا، بتبنى عليهم الحملات الحقيقة اللي ضدنا بناء على اتفاق التلات شهور.

بعد كده بيبقى بالنسبة للموقف الدولى معروف الكلام ده، وأنا كانت جات لى رسالة من كنىدى قلت عليها الجلسة اللي فاتت، بيعت له الرد عليها وفى نفس الوقت حبعت لخروشوف رسالة بالنسبة لموقفه الأخير؛ يعنى من مصلحتنا إن احنا بنقول له: إن احنا بنقدر موقفك فى عدم الحرب.. والكلام ده.

وبعدين أنا فى رأى إن بنقول برضه: إن احنا بحثنا الموقف وإحنا بنقدر الجهود اللي قامت بيها الأطراف المعنية لتجميد الاشتباكات؛ بحيث إن احنا بكره لما نبعت رسالة ممكن على طول ما حيذيعوها فى نفس اليوم من راديو موسكو. (ضحك) وفى كلامك بنقول إن احنا ضد القواعد وضد حل المشاكل بالقوة.

صبرى: أيوه.

عبد الناصر: بعد كده.. فيه أى أسئلة لى بالنسبة للموضوع غير السد العالى؟

سرى للغاية

رفعت: فيه استفسار بس..

عبد الناصر: أيوه.

رفعت: هل احتمال إن الغرب يعتبر نفسه انتصر في معركة كوبا؟ ولو إن هو منتصرش لكن يبدو إن ده يآثر على موقف انجلترا وأمريكا بالنسبة لمشكلة اليمن بالذات.

عبد الناصر: هم كاشفين الغرب زى ماهم كاشفين الروس زى أنا ماكاشفهم! معروف التهديدات والكلام ده كلام يعنى ويعتبر إنهم عملوا عملية كوبا على هذا الأساس؛ يعنى أنا من ٥٦ عارف الروس وأول ما يطلعوا انذار وأقول: المشكلة انتهت.. خلص. (ضحك)

أصوات: (ضحك)

عبد الناصر: و٥٦ الموقف، شكرى القوتلى بعت لى رسالة سنة ٥٦ يوم ٥ وقال لى: إنه قعد مع زوكوف وكذا وكذا وقال لهم علشان يساعدونا، وإنهم رفضوا وقالوا: منستطيعش إن احنا نعلن حرب عالمية وحنبعت لكم تأييد، وبيقول للمارشال زوكوف: قول لى أنا حوصل ازاي وأساعد ازاي؟ وبعدين يوم ٦ - الكلام ده يوم ٥ كان نتيجة اجتماع يوم ٤ والبرقية دى جت يوم ٥ - يوم ٦ بالليل بعد ايقاف القتال فى الأمم المتحدة وبعد انهيار عملة الاسترليني والكلام ده، إدوا الانذار بالصواريخ.

فى عملية العراق، لما أنا رحى موسكو قعدت مع خروشوف ١٠ ساعات فى فيلا خارج موسكو عشان يساعدونا يدينى كلمة اذا حصل عدوان على سوريا أو العراق وإحنا حنشتبك يساعدنا.. ١٠ ساعات! ورجعت سوريا ومقولتش.. قلت: إن الروس معانا وإن دخلوا وعملوا ايه وقلت للوزرا عشان يطلع الكلام من بره والتانيين ادونى وعد وادونى كذا على أساس الحقيقة الوضع كان يعنى مفيش حاجة!

وفى رأى بالنسبة لروسيا، إنها لن تدخل فى عملية توصلها الى حرب عالمية لأن هم خطتهم إنهم يكسبوا المعركة بالوسائل السلمية بواسطة الغزو من الداخل، والدليل على هذا برلين.. إدوا على برلين كذا انذار إن اذا محصلش كذا حيعترض. وأنا كان رأى باستمرار إن ده هجص كل الانذارات هجص وكل الكلام ده هجص! وبعدين هم ماشيين بهذه الطريقة ومن كتر الضرب والطريقة بتاع التفكير بتاعهم متهيألى اتكشفوا، وإلا كنيدي مكانش خد العملية بهذا الشكل. وبعدين هو الوضع بيختلف فى دولة على حدود روسيا

سرى للغاية

بالنسبة لفيتنام بالنسبة لكذا لكذا لكذا؛ لأن على طول يقدر يزق صواريخ وأسلحة عن أى دولة ثانية.

رفعت: لأ.. أنا بقول يعنى الغرب منتصر.

البغدادى: يساعده يعنى.

رفعت: يقوم ده يخليه ياخذ موقف مثلا فى موضوع اليمن.

عبد الناصر: هو الغرب واخذ موقف فى موضوع اليمن، لكن أنا فى رأى الموقف مش التدخل المباشر الموقف هو تسليح حسين عشان يدخل، لكن كونه يتدخل مباشرة فى اليمن الغرب أنا يعتبر بعد حتى موقف السلام اللي وقفه خروشوف بيبقى سياسيا موقف غلط جدا، لكن هذا لا يمنع إنه يدى أسلحة للسعودية ويدى أسلحة للأردن.

وبعدين يعنى أنا مثلا متصور الغرب النهارده بي فكر فى كلامهم؛ إن اليمن لابد أن تكون لها دولة تعتمد عليها خير ليهم أن تعتمد علينا من إنها تعتمد على روسيا. دى فيه وجهة نظر النهارده موجودة وبيتكلموا فيها من ناحية برضه أهم هنا فى القاهرة، وإن يعنى لو حصلت مصيبة لكن أسهل من إن كان يقوم نظام زى كوبا بيعتمد على موسكو. الفرق بين اليمن وبين..

عامر: كاسترو.

عبد الناصر: اليمن بيقول: حبقى سياسة محايدة، الحقيقة كاسترو أنا بعتبره إنه ضاع فى العملية دى وانتهى؛ لأن يعنى حلقوا له دقنه خالص!

سرى للغاية

أصوات: (ضحك)

عبد الناصر: إحنا قلنا: بنحيد كوبا الكوبيين زعلوا جدا مننا، قلنا لهم: نعمل اتفاق فى الأمم المتحدة بتحييد كوبا - ده كان أول اقتراح لى - وإن الأمم المتحدة تدى هذا وتمشى قاعدة جوانتانامو وقاعدة كذا.. زعلوا قوى قوى ورفضوا، وبعدين قال: ده قالوا إن قبلوا ده عايزين تأكيد من الأمم المتحدة.

حسين: من كنىدى؟

عبد الناصر: من كنىدى.. عدم الهجوم، وبعدين بعد جوانتانامو قعدوا! فالحقيقة لو كانت جوانتانامو قصد الصواريخ كانت تبقى مقبولة بالنسبة للعالم أكثر من تركيا قصد الصواريخ. خروشوف بهذا الحقيقة رد، مكنتش متصور إن حد يدخل حرب نووية لأنه حيكسب ايه؟! بنتمسك بقى فى الغرب الموقف النهارده فيه رأى عام كتير بيقول: إن خروشوف عمل سلام، الشرق فيه هجوم.. يعنى النهارده الشرق هو اللى فيه هجوم أكثر من الغرب! الصين النهارده مهاجمة العملية وامبارح مهاجمة وأول امبارح مهاجمة. ناس كتير فى الصين عايزة الصين نظريا تحارب لأن الصينية اللينينية بنقول: إن الاستعمار يجب القضاء عليه.

السادات: انتهى كاسترو خلص!

حسين: يستاهل والله العظيم! يعنى خسر الجلد والسقط!

عبد الناصر: وقوفه غلط، طلعا كدابيين وقف مندوبهم وقال: معندهمش والتانى قال: مفيش! ولذلك هو بيقول له: الحاجات اللى إنت خايف منها فكها وامشى.. مش كده؟

سرى للغاية

صبرى: آه.

عبد الناصر: لكن هى كانت تجربة الحقيقة درس سياسى بديع يعنى وايقاع العملية كان سريع، وبعدين هم كاتبين ازاي كنيدي اشتغل فى العملية الـ New York Times فى مقالة كاتبها واحد اسمه براون على ازاي اشتغلوا فى العملية، وازاي قسموا أنفسهم staff وحتى بيقولوا: إن القرار اللي اتخذ قرار غير ديمقراطى لأن الرئيس لا استشار وزارة ولا استشار حُلفا ولا استشار حد! وطبعا بيقولوا بعد العملية ما نجحت وراح جايب الناس وعامل teams وقسموا أنفسهم teams قالوا: دول ببيعتوا جوابات، الجوابات اللي جات لنا مش كاتبها كنيدي ولا حاجة ده ببيعت جوابات لدول مجلس الأمن وده بيتصل بالسفرا وده بيتصل بكذا وده بيجيب النواب، وأشلتون راح على حلف الأطلسى وعملوا staff work والحقيقة كلهم .top.

محي الدين: ماشين ماشية كويسة قوى.

عبد الناصر: واشتغلوا فى العملية.

محي الدين: والغرب أيدهم على طول.

عبد الناصر: وبعدين أخذوا القرار، وبعدين جابوا النواب وقالوا لهم: أخذنا القرار والعملية كذا.. كذا.

محي الدين: بس هو خروشوف حمى كوبا بالعملية.

حسين: هو اللي غرقها برضه!

سرى للغاية

طراف: أعتقد إن النظام حينها في كويا في فترة قصيرة بعد العملية دي.

عبد الناصر: لأ.. طلع كاسترو من العملية وبقت..

السادات: دي حطمع العناصر الغربية غير كاسترو في العملية.

عبد الناصر: أى أسئلة؟

صبرى: التجربة أثبتت فى الفترة ما بعد القانون ١١٨ لما طلع بالنسبة لتأميم ٥٠٪ من قطاع المقاولات، إنه طبعا كلنا عارفين اللى حصل من رفع الأسعار وعدم تنفيذ جزء كبير من الخطة. وبعدين الحقيقة الملاحظ دلوقتى إنه المقاولين يمكن بيحصلوا على أرباح أكثر بكثير مما كانوا يحصلوا عليها لما كانت الشركة ١٠٠٪ بتاعتهم.

خطورة العملية دي هي الحقيقة فى إن لما ترتفع الأسعار ٢٥ و ٣٠ و ٤٠ وفى بعض الحالات وصلت لـ ٦٠٪ من الأسعار الحقيقية، إنه لما نحط ١٠٠ مليون جنيه للخطة بناخد شغل بيساوى يمكن ٦٠٠ ألف جنيه يعنى ٦٠ مليون جنيه؛ ومعنى هذا إنه الفلوس بتتوزع على بعض الناس الأفراد الفرق ده كله.

فأثير الموضوع والسيد وزير الاسكان أيد هذا الوضع، وإدى أمثلة واضحة عن بعض العمليات باين فيها مغالاة كثيرة فى الأسعار، قيل: إنه السبب فى هذا إن العمليات كثيرة وضخمة، وإن المقاولين بيرفعوا الأسعار علشان مايخدوش العمليات. ولكن رد على هذا يعنى إنه مش رد مقنع؛ لأنه أفهم إن المقاول يقول إنى أنا مخشش ولكن ميحيش يحط سعر أعلى لأنه قد ترسى عليه العملية وبعدين بالتالى بينفذها فى النهاية، أو قد يعطى العذر فى التأخير عن تنفيذ العملية بيتأخر فيها شهر أو شهرين أو ثلاثة ولكن عملية السعر الحقيقية عملية أساسية، وقيل أيضا إنه الأسعار ارتفعت فى بعض الحالات.

فأنا كنت عملت دراسة بواسطة شركة مصر للأسمنت المسلح، أنا أعتقد إنها أحسن شركة موجودة فعلا فى المقاولات عندنا وفيها staff كويس ومؤمنة من زمان وشغلها سليم. اتضح من الأسعار بتاعتها إنه فى فترة السنتين اللى فاتوا لا يجوز أبدا أن ترتفع الأسعار أكثر من ١٥٪ عما كانت عليه سنة الأساس نتيجة زيادة أجور العمال أساسا لما المواد كلها أصلها مسعرة. فاتناقش الموضوع وفيه بعض اقتراحات قدمت، كان من

سرى للغاية

ضمنها إن احنا بنؤمم ١٠٠٪ وبنأخذ المقاولين كمستشارين ويشغلوا بالماهية والعلوة على أساس حجم العملية. ولكن أعتقد إن دا مش هيجل المشكل؛ لأن النهارده العملية مابتبانش فى الدفاتر.. عملية الأرباح دى، وإذا كان برضه بيقال: إنه الأرباح ما هتيجى الضرايب تأخذ منها، يعنى إذا كان بيكسب ٥٠٪ أو ١٠٠٪ ما هانكلها فى الضرايب ولكن..

عبد الناصر: فى الاحتياط.

صبرى: أو فى الاحتياط آه.. ولكن الواقع إن العملية مابتبانش فى الدفاتر، العملية إنه بييجى بيزود سعر العملية لكن أرباح الشركة بتفضل زى ما هى ليه؟ لأنه بيدى من الباطن العمليات. وأغلب هؤلاء المقاولين فتحوا مكاتب صغيرة من الباطن لأولادهم أو بأسماء ناس أصدقائهم، وبييجى يقاول على العمليات اللي من الباطن ويقتسم الفائض أو زيادة فى السعر مع المقاول اللي من الباطن، ودى مابتبانش لا فى دفاتر ده ولا فى دفاتر ده! فالضرايب مش هتحل المشكل، وفى رأى أيضا إنه المشكله بتاعت التأميم ١٠٠٪ مش هتحل المشكل؛ لأنه هيستمر المقاول يشتغل مع مقاول الباطن حتى لو كان مستشار للشركة، فعملية التأميم ١٠٠٪ مش هتحل المشكل فى رأى انما..

عبد الناصر: ده هيجرنا فى العمليات الصغيرة!

صبرى: آه.. وهنخش فى عمليات فرعية طويلة أوى وعمله كبيرة أوى. هو الحل العملى الوحيد بعد المناقشة؛ هو إنه بنحدد أسعار للمباني وتكلفة المباني، دى أول حاجة وممكن دى عملها بسهولة جدا بواسطة الأجهزة القانونية الموجودة فى وزارة الاسكان، بالتعاون مع الشركات الجدية زى شركة مصر للأسمنت المسلح. والمباني معروفة ومعروف دلوقتى يعنى حتى فى السوق المبنى فوق المتوسط المتر المربع كذا والمبنى المتوسط المتر المربع كذا والشعبى المتر المربع كذا، وممكن أوى إن العملية تحدد أسعارها.

دى قد تدفع الناس أو المقاولين إنهم فى فترة ما يهزوا السوق ميخشوش، لما أحدد له السعر وأقول له: تخش بالسعر ده يتوقف لغرض هز السوق أو هز الخطة. فبرضه ناقشنا النقطة دى، وجدنا إنه الحل العملى لهذا إن وزارة الاسكان بتأخذ سلطة بتكليف الشركات بعمل؛ يعنى مايقدرش يرفض العملية. هو بيكلف شركة بإنها بتروح بتبنى المدارس فى المنطقة الفلانية بالتكليف، ولا يخش فى عملية مناقصة وعملية قبول سعر إلا

سرى للغاية

بعد ما بيتدى يشتغل، وبناء على السعر المحدد بيعطى التكاليف بتاعته زيادة ٣ % أو ٤ % أو ٥ % حسب الاتفاق.

وإذا كان فى خلال تنفيذ العملية بعض الأسعار ارتفعت أو بعض المواد ارتفع سعرها أو بعض التكاليف زادت، ممكن أوى إنه يبقى فيه لجنة تحكيم فى هذه الحالة تحكم إذا كان فعلا السعر زاد ولا لأ.

وبعدين النقطة الثالثة اللي أثيرت وكانت أثيرت قبل كده فى مجلس الوزراء قبل التشكيلات الجديدة، إنه بنقسم قطاع المقاولات الى عدة مؤسسات متخصصة برضه زى الصناعة وغيره، من إن تبقى المؤسسات متخصصة قطاع أو مؤسسة للمباني مؤسسة للمرافق أو الأعمال المدنية ومؤسسة special زى الخرسانات الجامدة والحاجات الضخمة؛ لأن الحقيقة إن القطاع دلوقتى فوق ٨٠ شركة تقريبا؛ يعنى من المستحيل فى رأيى إنه مؤسسة واحدة تقدر تسيطر على كل هذه العمليات وتراجع ميزانيات، وخصوصا عمليات بهذا الشكل فيها صعوبة قوية جدا.

ده الحقيقة اللي وصلت اليه المناقشة من حلول، وإن إتوافق عليها بنحط القرارات المنفذة لها لبدء تنفيذها وتجربتها فى فترة السنة الجاية علشان نشوف ايه الثغرات الثانية.

البغدادى: بالنسبة للقطاع الخاص بيدخل المناقصة وعارف إن القطاع العام بيدخل، فبينزل هو ١ أو ٢ % عن القطاع العام ويدخل المناقصة، ويعلموا العمليات وبيكسبوا مكاسب ضخمة جدا. الحل إنه تتعمل مؤسسة نوعية بحجم المؤسسة الكبيرة ضخمة جدا، وبعدين بيتعمل مكاتب فنية لعمل مقايسة لكل عملية مستقلة، وتبع الوزارة بنتاخذ فى المؤسسة والمقايسة حسب مواد البناء الموجودة والمسعرة فيحدد نوع..

صبرى: السكة الحديد بيعمل فعلا كده دلوقتى.

الشافعى: فى المناقصة مباشرة.

البغدادى: كلها يعملها فى المكتب وجيب المقاولين يقول: ده سعره كذا ليه؟ ده أسعار المواد آهى وتقسم العملية عليهم. لأنهم قطاع عام إنت بتاخذ المباني الفلانية وإنت بتاخذ الجزء الفلانى وإنت بتاخذ الجزء الفلانى، وبعدين بيفرق بس الموقع بتاع العملية بس. لو مشيت العملية دى والمفروض كانت تمشى. انما اللي بسمعه إنه مثلا وزارة الاسكان عملت المكتب ده، لكن بيتجى مثلا المؤسسة تقول لها: نفذى بالتكاليف دى، بتقول لها: إنها متقدرش تنفذ!

سرى للغاية

فممكن بقى اقتراح أمر التكليف، وأنا بعمل دراسة العملية دى برضه؛ لأنى لما سمعت من القطاع الخاص بيقولوا: إن بيعيبوا على القطاع العام بارتفاع الأسعار ومصطنع، وإحنا بنحقق أرباح نتمشى مع القطاع العام، فابتديت أجمع بيانات ومعلومات عن الموضوع ده.

حسين: الموضوع بتاع المقاولات، هو قطعاً أنا متوقع كان من زمان العملية بتاعة إن المقاولين يحاولوا إنهم يكسبوا عن طريق القطاع العام، يكسبوا من العمليات مش عن طريق إنهم يطلعوا أرباح للشركات؛ بدليل لما جم قالوا لى: عايزين نحدد لهم ٥٪، قلت لهم: ٥٪ إيه! طب ماهو مش هتطلع حاجة أكثر من ٥٪، لكن عمليات حاتيجى من مقاول الباطن. وبعدين عملنا لجنة فى كل محافظة ولجنة مركزية فى وزارة الاسكان والمرافق علشان تقدير الأسعار.

فالأسعار بقت تقدر برضه متر الزلط فى القاهرة غير متر الزلط فى السويس غير متر الزلط ومتر الرمل فى كل حته من دول مختلف عن التانى؛ علشان السعر الحقيقى بتاع المتر مش فى القيمة بتاعته بل فى عملية النقل بتاعته من مكان الى آخر، فبقت تيجى الأسعار برضه فيها ارتفاع سواء كان فى لجان المحافظات. وبعدين اللجنة المركزية هنا نقول: اذا كان الناس بتاع المحافظات بيقولوا كده أمال إحنا هنقدر نراجع ازاي؟ لكن لما كان بيقد ويدقق ويتيجى لجنة محايدة خالص ويقعدوا ويعرفوا التفاصيل بتاعة كل عملية كانوا بيقدروا يحلوا المشكلة.

عملية إن إحنا نجيب جميع العمليات الللى فى القطر هنا فى القاهرة علشان لجنة تبت فيها أنا باعتقد إنها عملية مستحيلة؛ علشان دى فيها الوحدة الريفية الللى بتتكلف ٢٠٠٠ - ٣٠٠٠ جنيه فى محافظة، وعندنا منهم ٤٠٠ وحدة وعندنا كذا مدرسة؛ يعنى حجم العمليات الللى بتتعمل النهارده فى بورسعيد فى حته واحدة فى مكان واحد ممكن الاتفاق على جميع الأسعار، وعلى طول مجموعة مقاولين ومجموعة كبيرة ومهندسين كتار بنقدر ننفذ أى عملية control فى جهة واحدة.

لكن النهارده العملية دى كبيرة جداً، ويمكن بالتدريج اللجنة المركزية مع المؤسسة يتفقوا على أسعار خاصة بكل محافظة؛ أسعار المواد أساساً كذا وفى كل محافظة تبقى كذا بس دى عايزة وقت.

بالنسبة للفترة الللى فانت ازاي نحسب الفلوس؟ الحقيقة هى عايزة حل قانونى يعنى ازاي نلزم للناس بعد هذا التقدير إنهم يأخذوا بالفلوس الللى تقدر مش بالحاجة الللى حصل فيها اتفاق؟ وأنا قلت لهم: جميع العقود الللى اتعملت مع المقاولين متعتبرش عقود نهائية!

سرى للغاية

كان فيه اقتراحات، ازاي بقى نفذ الأصول اللي هنوصل اليها من لجنة فنية مع كل محافظة مش كل مشروع وبعدين كل مشروع؟ دي أنا باعتبار إنها عملية مستحلية!

البغدادى: الوحدة اللي اتبنت واتكلفت أد كده من ٣ سنين اتكلفت أد كده..

حسين: أنا باقول: كل محافظة تقريبا يبقى لها أساس، لكن لو عملنا كل مشروع يعنى هتبقى عملية كبيرة جدا. ازاي ننفذها بالنسبة للى فات عايزة حل قانونى ملزم بالمؤسسة، ازاي نلزم كل شركة من الشركات نقول لها: إنتى مرتبطة بهذا الثمن والتمن اللي إنتى عملتى بيه العقد ده كان ثمن مهواش معقول.. عايزه قرار.

بالنسبة للمستقبل، فيه مشروع معد فى وزارة الاسكان خاص بتقسيم المؤسسات التقسيم النوعى، وأنا أول لما رحى الوزارة كنت باقتراح من قبل ما أروح وزارة الاسكان إن يبقى فيه مؤسسات فى المحافظات. اتعطل هذا الموضوع، لكن فيه مشروع قانون بامكان عمل مؤسسات محلية فى المحافظات هتحل مشاكل كثيرة جدا، مش المؤسسة اللي هنا هى اللي هتحل كل المشاكل.

النقطة الثانية اللي كنت اقترحتها من الأول خالص تحديد الأسعار، يعنى تثبيت أسعار مواد البناء يعنى ميبقاش فيه يوم النهارده الخشب بكذا وبكره الخشب بكذا أى اختلاف فى الأسعار..

عبد الناصر: بيتأخروا عن استيراد الخشب لمدة شهرين أو يسيبونها فى الجمرى!

حسين: أو النقل، يعنى مرة فضل الخشب فى الجمرى لغاية ما هد الرصيف بتاع الجمرى! فى الوقت اللي مافيش ناس عندهم خشب، وبعدين الحديد مثلا قعد.. أفندم؟

عبد الناصر: شركات معينة هى اللي بتستورد؟

حسين: آه.. وحتى يعنى ساعات بيحى الخشب ويقعد يتكدس على الرصيف ويتهد الرصيف وميدخلش جوه، أو نستنى منخدش تصريح بالحديد لغاية ما البلد دي يبقى البناء موجود وكل المواد موجودة ما عدا الحديد أو ما عدا الأنابيب بتاعة السلك اللي بيحط فيها سلك

سرى للغاية

الكهريا.. أنابيب الرصاص اللى بنحط فيها سلك الكهريا.. البناء جاهز ماعدا سلك الكهريا
فسياسة..

عبد الناصر: مش بتعملوها؟

حسين: لا.. بنعملها.

عبد الناصر: أمال ايه؟

حسين: لا.. ده إحنا بنعملها، يعنى مافيش بقى ارتباط بين الجهات وبعضها؛ وزارة الصناعة هي
اللى تقول تجيبوا حديد ولأ متجروش حديد، نستنى على ما يتاخذ تصريح يبقى فات الوقت
بتاع البناء يبقى الناس واقفين ماعدا الحديد.. بتحصل سوق سودا فى الحديد.
فبيتهيالى إنه لو اتعملت سياسة الاستيراد بتاعة المواد، علاوة على الانتاج بتاع
المواد الحالى الكفاية لمواد البناء وتثبيت الأسعار.. يعنى برضه أصل العملية حصل فيها
كلام كتير عملية تثبيت أسعار مواد البناء؛ طب ليه نخليها ترتفع؟! طب ما إحنا نقدر نقدر
نثبت السعر؛ علشان منديش مجال لما بيرتفع السعر ١٠٪ فى المادة الخام الـ ١٠٪ دى
يمكن توصل لـ ٣٠٪ أو ٤٠٪ على بال ما يوصل فى العمارة!

صبرى: هو عمر ما حصل أى تطور فى أسعار المواد.

حسين: لا.. ده حتى فى المواد المحلية بيحصل فيها ارتفاع فى الأسعار بدون مناسبة.

البغدادى: الأسعار السنة دى أرخص من السنة اللى فانتت بالنسبة للحاجات المستوردة.

صبرى: آه.. كله.

سرى للغاية

حسين: أنا باقول: تثبيت، يعنى حتى لما تكون أرخص أنا مادام عامل خطة وعاملها على سعر معين أنفذ على السعر ده وآخد أنا الفرق أحطه كاحتياطي بتاعى اذا كانت الخطة بتاعتي معموله. يعنى دى الاقتراحات بتاعتي إن يبقى فيه مؤسسات محلية فى كل محافظة من المحافظات أو حاجات قطاع عام، برضه القطاع الخاص أهو ١٠٠ ألف كفاية أو لو فكرنا إن احنا نزود شوية على ١٠٠ ألف، لكن متهيألى إنه كفاية التقسيم النوعى بتاع المؤسسات والتقسيم بقى بتاع التحديد للأسعار يكون فى كل محافظة مش فى كل مشروع.

صبرى: الدراسة جاهزة بتاع كل محافظة.

البغدادى: لأن دلوقتى الشركات بتاعة القطاع العام بتأخذ الميزانية، كل واحد ليه عربية والمرتببات زادت ومش عارف ايه والحاجات دى..

عبد الناصر: العربيات.. أصول كل واحد يركب عربية - طبعا ده خارج موضوع مناقشة - لازم أى واحد تخصص له عربية يدفع عليها، يعنى عربية فى الشهر بتتكلف أكثر من ٣٠ جنيه ولا ايه؟

طراف: لا.. دى عملنا لها مخصص مقدرين لها ٤٠٠ جنيه مقابل ثمن العربية.

عبد الناصر: ساعات السواق بياخذ البنزين ده ويبيعه عملية يعنى! أو نملكهم العربيات ويدفعوا تمنها بالتقسيط.. عملنا ده فى الرياسة هنا.

صبرى: وفى المخابرات ماشية.

عبد الناصر: آه.. واتطبقت ونخلص من العملية دى، لكن النهارده كل واحد عايز يجيب عربية ويبقى مشروع للبحث..

حسين: هو فيه نقطتين نسيت أقولهم برضه لو كان الموضوع ده خلص.

عبد الناصر: كنت بتقول العربية، وايه تانى.. والقرايب أى واحد يعين أقاربه.

صوت: أيوه.

سرى للغاية

عبد الناصر: عملية تعيين القرايب وبعدين اللايحة والكلام ده كله لازم تضبط التعيينات والمكآفات والعمليات.. هى دى الحقيقة وبعدين المصاريف الادارية.

صبرى: هى اللايحة هتريح.

عبد الناصر: مش هنقدر نضبط المصاريف الادارية إلا اذا كنا الحقيقة ماسكين العملية ماسكة مضبوط، وبعدين نشوف المصاريف الادارية وبنعمل ليها متابعة فى الخطة، واذا أى حد عمل زيادة فى المصاريف الادارية - إحنا عملنا كده السنة اللى فاتت - بنؤاخذه وبنشوف زادت ليه.. هى دى ناحية مهمة.

حسين: موضوع التكليف هو مش هيختلف كثير عن الوضع الحالى، ما هو الحكاية مدام مبتديش الفرق مبيجيش فى الأرباح ما هو فى التكليف ده يقول لك: أنا أيضا هجيب مقاولين..

عبد الناصر: هيقول لك خسرت!

حسين: خسرت، آه.. يعنى التكليف ما هيجبلك الدفتر والفواتير زى ما بيحبها دلوقتى.

صبرى: لأ.. التكليف هو لعدم التهرب من تنفيذ، يعنى ايه اللى بيحصل النهارده؟ لما تقول له: هانزل لك السعر الأسعار الفلانية، تيجى تقول هاطرح عملية بنا فلان محدش هيتقدم ويزنقك فى التنفيذ!

البغدادى: افرض خسر فى العملية دى مين هيدفع له الخسارة دى!؟

صبرى: فيه لجنة تحكيم.

حسين: ماهو النهارده فيه لجنة تحكيم ما هو النهارده مافيش عقد نهائى خالص مع الناس، وأنا متكلم مع محرم وقايل له: تشوفوا نعمل اجراء قانونى علشان نلزم الناس بالكلام لكن التكليف متهاىلى مياحش.

سرى للغاية

صبرى: التكليف ده علشان الهزة اللى هتحصل فى الفترة.

حسين: لأ.. أصل علشان إن احنا ندى أمر تكليف cost pass ده مبيجلبش حل بالنسبة للرخص.

صبرى: لا.. لا.. مش عشان الرخص.

حسين: آه.. علشان تنفيذ العملية يعنى هو فعلا ماشى فى عملية تكليف، يعنى مدير مؤسسة بتجيبه بتقول له إعمل كذا بيخلى الشركة تعمل العملية.

النقطة الثانية: إن جهات رسمية يعنى مصالح ووزارات تقوم هى بإنشاء أجهزة للعمل للتنفيذ المباشر؛ يعنى لازم يبقى فى القوات المسلحة أجهزة للقيام بالأعمال المباشرة. عندهم مشاريع فى سنين كثيرة جاية، يقدروا يعملوا جهاز يقوم بنسبة كبيرة من المشاريع دى للتنفيذ؛ من غير ما يدي للمقاولين أجهزة للتنفيذ المباشر، تنشأ فى الوزرات على أساس برضه جايز إنها مؤسسة أو شركة أو حاجة.

عبد الناصر: كل واحد هيعمل لنفسه جهاز، يبقى هذه الشركات اللى بتنفذ ما حد هايديها حاجة أبدا! يعنى والله مندخلش فى تجارب جديدة فى هذه الناحية قبل مانشوف التجربة اللى احنا ماشيين فيها..

حسين: كان ماشى مع الكلام اللى سيادتك اللى قلته.

عبد الناصر: إنت بتقول كل وزارة تعمل هيئة!

حسين: آه.. كل اللى يقدر يعمل مؤسسة.

عبد الناصر: كل واحد هيقول لك يعمل مؤسسة!

حسين: أجهزة.. علشان نكثر أجهزة.

سرى للغاية

عبد الناصر: أنا باقول الكلام ده قبل التأميم إن كل وزارة تعمل مؤسسة؛ تعالى النهارده وزارة الصناعة هتعمل مؤسسة ومش هتدى ولا شركة حاجة، وزارة تانية تعمل مؤسسة ومنديش ولا حد أى حاجة ويبتدوا يخدوا الناس من المؤسسات التانية. الكلام ده كنا بنقوله قبل التأميم عندنا النهارده حوالى ١٥٠٠ شركة.

حسين: بس هم ماهماش كفاية يعنى برضه.

عبد الناصر: كنا نعمل مؤسسات جديدة تابعة للوزارة.

حسين: هى دى النقطة.. نحاول نعمل مؤسسات جديدة.

عبد الناصر: أو نعمل شركات جديدة، لكن لو ابتدينا نعمل الحربية تعمل والصناعة تعمل والمواصلات تعمل والتعليم تعمل كل واحد عنده المبانى؛ تبص تلاقينا الحقيقة عندنا كل واحد هيستورد معدات وكل واحد هيعمل كده تلاقى تقف العملية.

حسين: هما دول الموضوعين اللي كنت قلت عليهم.

الشافعى: هو يمكن نقطة زيادة العمل عن طاقة الأجهزة اللي بتنفذ؛ دى نقطة يمكن أساسية وده يتطلب إن احنا برضه نزود عدد المؤسسات علشان تقدر تغطى.

عبد الناصر: تمشى مع الخطة السنة الجاية.

الشافعى: وبعدين النقطة التانية: عملية القطاع الخاص اللي لسة موجود حاليا، هو ده اللي بيدى الفرصة اللي هو أقل من ١٠٠ ألف أو أقل من ٣٠ ألف قبل كده؛ هو ده اللي بيدى الفرصة فعلا علشان النفوذ خارج حدود الأسعار، يعنى طريق التهرب أو طريق التبديد بالتالى تساعد على زيادة..

حسين: لا.. ازاي؟ يعنى وجود قطاع خاص فى هذا بيسبب عرقلة؟

سرى للغاية

الشافعى: لأنه بيدى من الباطن، أصل هو مش على مستوى المنافسة فى المؤسسة الكبيرة لأ.. ده على الأقل إنه ١٠٠ ألف أو ٣٠ ألف علشان يقبل وسيلة خروج..

حسين: بس ده عمليا بينقص الأسعار.

البغدادى: اللي بياخد من الباطن ده واحد تانى.

عبد الناصر: بتاع الخشب بتاع الكهريا..

صبرى: ده ملوش دعوة بـ ١٠٠ ألف.

عبد الناصر: المقاول بيعمل ايه؟ بيحى بياخد البيت ده عايز بينيه بيروح بيتفق مع أى واحد بتاع كهريا بيقول له ركب الكهريا، ويتفق معاه ويزود فى الأسعار.. يتفق معاه ويتفق مع الأدوات الصحية.

الشافعى: اللي هى حاجات تفصيلية داخل المقولة نفسها.

عبد الناصر: فى الأعمال اللي جوه.

صبرى: وماتباننش فى دفاتر ولا فى أى حاجة.

ابراهيم: هو ده أساس المشكلة. مافيش غير إن احنا نجيب المقاولين الصغيرين من دول ونعمل منهم مؤسسة؛ يعنى إن معملناش مافيش فايدة كل الحلول هتدوخ وتقف على مافيش غير المؤسسة.

عبد الناصر: هنعمل مؤسسة للأعمال..

صبرى: هو طبعا النقطة دى أثرت برضه، لكن هتاخذ وقت طويل وضرورى طبعا إن احنا نوصل لدرجة إن احنا بيبقى عندنا أجهزة مقاولات للأعمال الفنية أو الأعمال التفصيلية اللي بتخش جوه المباني، ولكن ده هياخذ وقت.

سرى للغاية

عبد الناصر: بتاع المياہ بتاع المواسير بتاع الحاجات دى.

البغدادى: هو بيضطر يديها من الباطن يعنى لو اداها من الباطن..

ابراهيم: إذا كان بيستفيد من العملية دى - زى ما بيقول على - بيستفاد استفادة مستترة لأنه مش لاقى مقاولين برضه.

عبد الناصر: ما هو إحنا الخلل برضه فى الشركة نفسها هو بيعمل ايه؟ مجلس الادارة والكلام واللى اتعينوا دول بياخدوا ماهيات وبيشتروا عربيات والعمليات دى، لكن أى مقاول بيروح أصلاً بيتعامل مع مكتب كهربا ومكتب كذا ومكتب أدوات صحية بيروح للجماعة دول بيشاركهم.

ابراهيم: بياخد فاتورة.

عبد الناصر: وبيتفق معاهم إنه هو مشارك فى رأس المال وبيتفق معاهم على زيادة ١٠٪ أو ٢٠٪، وبعدين بيعمل عمليات عند ده وده يدى ده وده بيدى ده وبهذا يبقى هو بياخد الربح زايد فى التكاليف من العمليات دى؛ وإذا هو بيطلع سمسرة فى العمليات من كل عملية.. هى دى المشكلة.

ابراهيم: دى أساس المشكلة، اذا كان هو بيستفيد فإذا فرضت عليه سعر هيقول لك: مقاولين الباطن مش لاقيهما مايبدونيش الأسعار المناسبة!

عبد الناصر: لازم نكون جاهزين نعمل المؤسسة فعلاً.

حسين: فيه نقطة أخيرة ياريس، كنا عاملين قانون اسمه قانون الاهمال من قيمة ٣ - ٤ .. ما عرفش صدر ولا ما صدرش؟ كان ده أساساً محطوط فيه نظام المقاولات بتاع أى واحد فى شركات ولا فى مؤسسات ولا أى حاجة بيلعب بأموال الدولة.

عبد الناصر: بس هى العملية لسة عايزة كلام.

حسين: لا.. ما هى دى برضه نقطة تخوف.

سرى للغاية

عبد الناصر: يعنى لسه أنا شايف إن احنا هنعيد النظر فى الأسامى تانى ومجالس الادارة والعمليات دى كلها، وأنا متهيألى إنه لم العملية اللي اتعملت فى ١٩٦١ برضه عايز وقت لأن العملية ماهياش سهلة فيه عناصر كتيرة من الأول موجودة.

حسين: قطعاً النهارده بامكاننا نحكم على الناس بالأسعار اللي قدمت فى السنة اللي فاتت، يعنى فيه ناس جد وكويسين ومقدمين أسعار كويسة وخذوا عمليات من أحسن ما يمكن، وفيه ناس عندهم مبالغات ونقدر نحكم عليهم بالأسعار المقدمة.

الشافعى: وفيه هنا برضه نقطة يمكن قالها كمال قبل كده اللي هى نظام الأسعار، ويعنى الحقيقة إن الواحد أميل الى إن السعر يبقى موحد ويبقى متوازن، وفى الحقيقة يعنى فى يوغوسلافيا عاملين كده. علشان يقدرُوا يضبطوا ميزانيات الوحدات كلها، فبيوحدوا حاجتين.. السعر الخام وسعر القوى المحركة؛ لأنه بعتبر دى مش داخلة فى جهد الشخص فى إنها قريبة أو بعيدة، فبيحطها نقطة أساس بتخلى الميزانيات فى مواجهتها عملية أبسط.

عبد الناصر: بس مين بيثبتها بيبقى السعر واحد؟

الشافعى: بيوحدها على أساس تغطى بعضها كلها.

عبد الناصر: فيه فرق بين التوحيد والتثبيت.

الشافعى: لا.. هى توحيد السعر فى كله.

محي الدين: الأخ كمال بيقول: تثبيت.

الشافعى: لا.. هى توحيد.

حسين: التوحيد مستحيل فى الرمل والزلط والعملية دى لا يمكن أبداً، الأسمنت هو اللي متوحد.. النهارده الزلط والحاجات دى سعره أساساً فى نقله ومتقدرش توحد.

سرى للغاية

عبد الناصر: هل إحنا نقدر نوحده؟

صبرى: مشكلة. التوحيد بالنسبة لمناطق سهل كل منطقة..

حسين: هو فيه اقتراحات كويسة فيها امكانية استخدام المواد المحلية أو استبدالها عن مواد كانت بتستعمل قبل كده؛ مثلا كان فى مطروح بيحبوا الرمل من اسكندرية علشان بينوا فى مطروح، وكانوا بيقلوا: إن الرمل اللي هناك مينفعش، لكن بإضافة زيادة نسبة الأسمنت مثلا فيه بنسبة كذا أو بإضافة حاجات أمكنهم إنهم يستغنوا عن الرمل اللي كان بيحى من اسكندرية، بقى الرمل يستخدم محليا. فيه حاجات بالشكل ده ممكن إنها تتجهز وانشاء معامل طوب محلية؛ مثلا لقينا فى محافظات بينقلوا الطوب من مديرية لمديرية أو من مديريتين لمديرية.

السويس مثلا كان فيه خطة علشان يتعمل مصانع طوب، وقلنا لمؤسسة مواد البناء علشان يعملوا مصانع طوب محلية هناك. فالعملية توفير المواد المحلية فى المحافظات، من ضمن الخطة بتاعت توفير مواد البناء وتخفيض أسعار النقل وتوفير حتى وسائل المواصلات بتاعتنا، بدل ما ننقل رمل وزلط مسافات طويلة وطوب وحاجات من دى، يبقى نقل الحاجات المهمة والحاجات الثانية بنحبيها محليا.

محي الدين: هو بس النقطة الخاصة بتقسيم المؤسسة الحالية الى عدة مؤسسات، يمكن ده ميكونش فى الصالح لأنه وجود مؤسسة واحدة يسمح بتنفيذ خطة المقاولات أحسن مما يكون موجود عدة مؤسسات، ويحدث تضارب وخط بالنسبة للشركات وبالنسبة للأجهزة الفنية وبالنسبة للفنيين الصناع الصغيرين.

الاتفاق اللي احنا كنا اتفقناه فى اجتماع الأخ بغدادى واخوانا كانوا موجودين، إنه المؤسسة تكلف فى إنها تعمل تخطيط لاحتياجات قطاع المقاولات بالكامل، وتجهز المواد وكل الاحتياجات دى قبل الخطة قبل الدخول فى السنة المالية، وتوفر هذه المواد بالاتفاق مع مؤسسة التجارة علشان نقدر نثبت الأسعار بالنسبة لكل شركة من شركات المقاولات.

على ضوء الكلام ده يمكن يكون من الأصلح إن احنا نقسم المؤسسة الحالية الى عدة مؤسسات فرعية؛ بمعنى إنه لازم يكون فيه مؤسسة من فوق تكون قابضة. لو تصورنا إن احنا نعمل مؤسسات أخرى لازم تبقى فى مؤسسة من فوق قابضة، وهى تخطط وتنسق كل المسائل الخاصة بقطاع المقاولات؛ لأن مافيش جهة أخرى تقدر تعمل هذه العملية،

سرى للغاية

أقصد إنه يبقى sub organization يعنى تبقى مؤسسات فرعية منبثقة من المؤسسة الكبيرة.

أفكر الاقتراح بتاع الأخ كمال خاص بمؤسسات فى كل المحافظات، والاقتراح كان شركات تتبع على ما أذكر المحافظات تخصص.

ويمكن فى هذه المرحلة بعد مرور تقريبا سنة من التجربة، يمكن يكون من الضرورى تخصيص مجموعات من الشركات لقطاعات، ولكن أنا خايف من إنه يتوجد أكثر من مؤسسة للمقاولات فى السوق، وتكون النتيجة يمكن تضارب وعدم تنسيق وفقدان لعملية التخطيط الخاصة بمواد المقاولات وتوفيرها.

صبرى: هو كون بتبقى مؤسسات فرعية أو غير فرعية ده بيتوقف على مقدرة المؤسسة الحالية، إنما المؤسسات النوعية ماهى تتبع الوزير والوزير هو اللى بينسقها زى كل الوزارات؛ بيكون المجلس معاه وهو اللى بينسق هو اللى بيطلب المواد والحاجات دى كلها، زى وزير الصناعة ما بيعمل فى المؤسسات بتاعته الصناعية كلها. أما بالنسبة للتوزيع الجغرافى، يعنى ده لا يمنع أبدا التوزيع النوعى لأنه فى المحافظة الواحدة فيه مبانى المدارس ومبانى عادية وفيه مرافق وفيه مصانع، والتخصص هنا النوعى يعنى المفروض إن المؤسسة اللى بتبنى المصنع متكونش..

عبد الناصر: ياريت إن ممكن فى المحافظات يبقى شركات ومؤسسات.

صبرى: يعنى هما الحاجتين لازم يمشوا.

حسين: هم المحافظين بيطالبوا من زمان لأن فيه ناس متحمسين للموضوع، بس مشروع القانون كانت المؤسسة الكبيرة بتعارضه والأخ زكريا زمان مكانش موافق عليه ففضل يعنى..

محي الدين: دلوقتى.. آه.

حسين: دلوقتى بقى فيه امكانية إنه يمشى يعنى أنا لأمس الحاجة..

محي الدين: لا أنا مش موافق واضح من كلامى يعنى! (ضحك)

سرى للغاية

حسين: يعنى فالعمليات النوعية فعلا هى النهارده المؤسسة وهى غير قادرة، ويعنى الله يكون فى عونهم استحالة إنه يقدر يلم فى العمليات الكبيرة والعمليات الصغيرة، ولما نيجى نبت فى الموضوع مش ممكن!

عبد الناصر: العملية بتاعت السنة دى كام مليون؟

صبرى: ١٣٠ مليون جنيه.

عبد الناصر: السنة الجاية هتزيد.

حسين: فوجود كذا مؤسسة كل واحدة متخصصة فى عملية..

عبد الناصر: مع عمل الاتفاق مع المحافظين فى الشركات الصغيرة، إنه عمل المحافظات فى المدارس..

حسين: فى الحاجات الصغيرة دى.

صبرى: يعنى الحاجتين لازم يمشوا سوا.. توزيع جغرافى مع توزيع نوعى.

عبد الناصر: بس مافيش دراسة عامة عن الشركات الموجودة فى القاهرة، وتكون دى فرصة..

حسين: ماهو ده اللي كلف كتير برضه لأن الشركات كانت بنتجى لها.

عبد الناصر: إحنا نضيف أفراد بالنسبة للشركات وممكن ندخل مقاولين.

صبرى: فى ناس طالبة النهارده..

عبد الناصر: فى شركات القطاع العام فيه ناس ببيعتوا للنهارده.

سرى للغاية

صبرى: فيه ٢٥ شركة already جاهزة النهارده علشان تخش.. يعنى هيوصل النهارده لـ ١٠٠.

عبد الناصر: لو نعمل فى كل مؤسسة فرعية بقى كل محافظة دى تبقى أحسن.

حسين: هو طبعا فيه محافظات مش هنقدر نعمل فيها مؤسسة لكن اللى يقدرنا..

عبد الناصر: إيه هى المحافظات؟

حسين: فيه كتير، ما هو المحافظات هيقدرنا يعملوا مؤسسات فدى تشيل من علينا عبء كبير عن المؤسسات الكبيرة. وهو المشروع اللى موجود فيه كمان امكانية إن ولو إن التأثير نوعى، لكن لفترة معينة ممكن إن مؤسسة تقوم ببعض أعمال توكل اليها ممكن تكون أصلا فى قطاع مؤسسة أخرى؛ يعنى لو وجدت مؤسسة فى محافظة أسوان بتقوم بعمل كبير، لو مافيش مؤسسة ثانية ممكن فى فترة انتقال بيحصل فيه شوية تعاون بينهم.

الشافعى: هو بقى فيه نقص فى الفنيين..

محي الدين: المهندسين مثلا؟

الشافعى: آه.. على كل المستويات.

رفعت: فيه ملاحظة عامة بالنسبة لشركات المقاولات بالنسبة للعمال بالذات، إن هم ما بيعملوش عقود دائمة مع العمال حتى شركات القطاع العام كلها عقود مؤقتة، رغم إن العمال بيبقوا قاعديين يمكن ١٠ و ١٥ و ٢٠ سنة فيها وبيشتغلوا معاهم على أساس إن كل عملية بتبقى منفصلة عن الأخرى، يعنى دى ظاهرة موجودة فى شركات المقاولات..

الشافعى: بيتهربوا بيها من التزامات القوانين العمالية، بس دى هاتيجى بالتدريج.

رفعت: شركات القطاع العام بالذات.

سرى للغاية

حسين: أصل فى الموضوع ده، حتى الموضوع استغربت له وهم بيقيموا الأعمال بتاع الشركات وبيقولوا: إد كده للعمالة وأد كده للمصاريف الدورية دى والحاجات دى. المقاول الكبير هو معندوش عمال، ده هو عنده مهندسين والمكتب بتاعه وشوية ملاحظين لكن العامل عند مين؟ عند بتاع الأسمنت اللي بيععمل أساسات واللى بيععمل أسمنت وبتاع البياض وبتاع البلاط؛ يعنى ماهماش عمال عند المقاول الكبير دول عمال عند المقاولين الثانيين الصغيرين.. واخذ بالك ياكمال.

البغدادى: لا الشركات عندها ورش وعندها..

حسين: حتى لما تيجى تاخذ بند الأجور فى البنا تلاقى بند الأجور بند صغير، الأجور الحقيقية بتاع العمال اللي بيبنوا مش طالع فى بند الأجور بتاع المبانى عشان الأجور دى جاية فى..

صبرى: بيحمل على المواد.

حسين: المواد الوسيطة، الأجور بتاع عمال البنا فعلا داخله فى المواد الوسيطة مش داخله فى بند أجور، حتى بقيت استغرب قلت لهم: إنتو لازم برضه عملية الأجور دى تبان. هم أغلبهم ماعندهم مش عمال العمال دول عند مقاولين الباطن.

صبرى: فيه بقى نقطة أخيرة فى الموضوع ده هو برضه أثرها كمال دلوقتى، بتاعة قانون الاهمال فى حاجات already انتفشت يعنى مش انتفشت يعنى فيها سرقة أو بتاع وحاجات؛ يعنى فيه حاجات ظاهرة واضحة وعندى مثل واضح. وبعدين وزير الاسكان بيطلب بحل مجلس الادارة نتيجة هذا، والمثل واضح كان فى بنى بنك التسليف تقدمت ٣ شركات شركة قالت ٤٠٠ ألف وشركة قالت ٥٠٠ ألف وشركة قالت ٦٠٠ ألف يعنى الشركة بتزود يعنى.

يعنى فيه شركة مش عارف أساميهم بالضبط، لكن فيه شركة رسى عليها العطا مثلا ب ٤٠٠ ألف، وهى أحسن شركة مقاولات يمكن تقريبا مش شركة تافهة بتاعة مختار ابراهيم، والباقي بقى اللي كانوا متقدمين شركتين مقدم ب ٥٠٠ و ٦٠٠ فهو بيقول: مش ممكن أسيههم لازم آخذهم ازاي؟ بييجى يقول لى..

سرى للغاية

حسين: طبعا.. الرجل اللي ٦٠٠ ده حرامى قطعاً!

الشرياصى: متقدم فى السد العالى بـ ٥ مليون وواحد بـ ٨ مليون! ما حسبتاش التانى ليه؟ وبعدين يحصل فيها تخريب أو متفدثش كويس.

صوت: الكلام عن الاهمال.

عبد الناصر: على اعتبار إن الوزير مسؤول أماننا عن تنفيذ الخطة، وبعدين يجب أن يكون رأيه محل الاعتبار بالنسبة للعمل مع مجالس الادارة وبحيث إن مبعثروش إن هم خسرانين. والحقيقة إنه رأى إعادة النظر حتى فى كل مجالس الادارة، مش بس مجالس الادارة كلها الحكومة وحاجات كثيرة أوى فى العقود ونعرف أولنا ايه وآخرنا ايه. فالنهارده لما بييجى وزير يقول لك: إن مجلس الادارة ده مش متعاون وأنا هضطر أشيله، باشوفه لكن لو أديها له مبدئياً هو مبيشلش بيبقى غير مسؤول.. يعنى هو مسؤول عن تنفيذ الخطة أو غير مسؤول؟

أنا بعتبر يعنى الوزير بيكون مسؤول لأن احنا فى يناير لازم تاخدوا بالكم من دلوقتى هنا المتابعة، وباريت دلوقتى نقدر نناقش المتابعة عن الـ ٣ شهور. وإنتمو قبل يناير بـ ٣ شهور تبتدوا تناقشوا من دلوقتى.. مين المسؤول عن تنفيذ الخطة؟ باعتبار الوزير، فإذا كان الوزير مانفذش الخطة وقد ينتج عن هذا إن هو لما بيعمل ويقرر إنه يحضر قرار يعنى إنه اذا ناس متعاونوش معاه إنه.. ما عرفش ايه رأيكم؟

محي الدين: بس هو امكانيات المتابعة الموجودة النهارده فى المؤسسات مهياش واضحة، وعملية المحاسبات لغاية دلوقتى ما انتظمتش، بس ايه اللي عرفنى اذا كانت الشركة دى أكملت ولا ما أكملتش؟ أنا بأتكلم عموماً أنا ما عرفش التفصيل الخاص بالشركة دى بالذات وأنا بتكلم عموماً.

عبد الناصر: أنا بأتكلم مبدأ إن من حقه إنه يرفض تقرير مجلس الادارة وإلا يعنى الوزير مياحاسبش؟ وهو هيطلع قرار من هنا من مجلس الرئاسة بتعيين الأعضاء أو كرشهم فيطلع قرار جمهورى، بس لازم نختار من الوزراء لأن ده ممكن يعنى مش تعيينه مؤيد. وبعدين أنا فى رأى إنكوا قعدتوا ٦ أشهر علشان تعينوا الناس وفى الآخر عيتنوا علشان العملية متأخرش، متهيألى العملية دى تحتاج لإعادة نظر فى هذا الموضوع بالنسبة أيضاً للناس التانيين اللي تحت. يعنى حتى أبسط وزير عنده شركة مش منسجم مع صاحب الشركة لا يعتنى بيه ولا يديله

سرى للغاية

تقارير متابعة ولا عايز يعمل معاه حاجة.. هل يجوز هذا؟! وإلا بقول لك: بيبقى الوزير هنا غير مسؤول وقف الترشيحات للمؤسسات كلها، أنا يعنى أنا مع الوزراء شلت ترشيحات ناس يعنى كله.

حسين: بخصوص الموضوع اللي أثرتة سيادتك دلوقتى بتاع الخطة، سامع إن فيه الاعتمادات الاضافية اللي كانوا بعض الوزرا طلبوها هنا عشان تكلمة أعمال كانت أيضا من السنة المالية اللي فانت لسه ما صدرتس لغاية دلوقتى، وعلشان كده فيه مقاولين ليهم فلوس ومش لاقينها، أو فى المحافظات فيه عليهم فلوس للناس مش عارفين يسدوها لهم بتاعة الأعمال اللي كان المفروض إنها تتم السنة اللي فانت المفروض إنهم كملوها ومحصلهاش ميزانية والوزرا أثاروها. أنا سمعت الكلام ده النهارده فأحب أقوله.

عبد الناصر: التعليم يعنى؟

حسين: يعنى سمعت إن التعليم وحاجات زى التعليم وما عرفش ايه تانى.

صبرى: ماهو الكلام ده اتقال وزندو رد عليه الجمعة، قال لهم: إن الاعتمادات موجودة بس إطلبوا.

حسين: محصلش ده فى أثناء مناقشة الميزانية هنا كان فيه مبالغ سقطت اتحسبت على إنها مشروعات كانت مفروض هتتنفذ السنة اللي فانت، ومتعملش ترتيبها فى اقرار الميزانية السنة دى وبعدين اتصدق على الميزانية. طب بس الأخ على يسأل بس يشوف اذا كان فيه حاجة زى كده.

صبرى: موجودة.

سرى للغاية

البغدادى: هو بالنسبة للسنة الثانية المفروض هو فى الشهر الأول يكتب تقرير، لغاية كده ماكتتبش التقرير.

عبد الناصر: فى الخطة السنة اللي فاتت؟

البغدادى: كانت السنة الأولى، السنة الثانية لسه المفروض يعنى كان معد فماعرش ايه الى أخره؟ بالنسبة لخطة الخمس سنوات التالية، الخطة المفروض ترسل للوزارات على أساس تبتدى تجهز مشروعات لأنها هتاخذ على الأقل سنتين وإلا هنتزق يعنى فى آخر لحظة، وبالتالي على سبتمبر كان المفروض يقدموا مشروعات مقترحة.

عبد الناصر: طيب مشروع السنة الأولى اللي احنا عايزينه اللي هو بعد ٣ أسابيع؟

صبرى: بتاع السنة الثانية؟

عبد الناصر: يجى لنا بعد ٣ أسابيع يتوزع علينا.

صبرى: ٣ أشهر! قالوا لي إنه مش هيجوز قبل ١٠ نوفمبر.

عبد الناصر: اللي يهمننا السنة الأولى دلوقتى يجى لنا بعد ٣ أسابيع، تصور إن احنا فى السنة الثانية! (ضحك) السنة الثانية يجى لنا بعد ٣ أسابيع، موضوع خطة السنة الثالثة بييجلنا فى شهر يناير أو فبراير.

البغدادى: دى المتابعة؟

عبد الناصر: الخطة.

سرى للغاية

البغدادى: لا.. الخطة السنة الثالثة.

صبرى: السنة الرابعة.

عبد الناصر: السنة الرابعة يجى لنا فى فبراير لأن هتدخل بيه فى الميزانية فى يوليو والميزانية بتخلص فى مارس، بيحى لنا فى أول فبراير.

البغدادى: وخطة الخمس سنوات التالية.

عبد الناصر: خطة الخمس سنوات التالية بقى بيحيلنا بيذكروا يعنى..

معى الدين: كان عامل فى ديسمبر ٦٣ أو حاجة زى كده.

عبد الناصر: بالنسبة لاقتراحات الأخ على عن المقاولات، فيه حاجة؟ ماشى الكلام ده بإضافة المؤسسات فى المحافظات؟

صبرى: أيوه.

ابراهيم: بس مؤسسات المحافظات مفكرش هيخش فيها الشركات يعنى بتاعت بنائة المصانع.

حسين: لا.. دى الحاجات الصغيرة.

ابراهيم: دى حاجات صغيرة سكنية..

حسين: والوحدة الريفية؟

عبد الناصر: دى بتبقى مثلا المجارى اللى اتبنت.

سرى للغاية

حسين: فى كل المنشآت الصغيرة والحاجات الصغيرة والمستشفيات الصغيرة والمدارس والحاجات دى.

عبد الناصر: فيه مواضيع تانية؟

صبرى: موضوع القطن ماشى دلوقتى، الأسبوع ده كان كويس عدى المعدلات العادية.

عبد الناصر: موقف العملة؟

صبرى: هو دلوقتى طبعا الموقف تعبان كالعادة فى أوائل السنة الزراعية، ويعنى الموجود فعلا حوالى ٧٠٠ و ٨٠٠ ألف جنيه.

عبد الناصر: يعنى هو ده اللى بيزود التصدير.

صبرى: هو أنا فى اللجنة الاقتصادية قلت لهم: بيتدوا يحطوا أهداف جديدة، مش الأهداف المحسوبة فى الميزانية أهداف أكثر بعد دراسة الفترة اللى فاتت؛ لأن فعلا باين قوى فيه امكانيات للتصدير أكثر مما قدر فى ميزانيات بتاعت السنة دى، وأساسا طبعا هو الحل الوحيد اللى قدامنا هو التصدير لمواجهة العملة، وفى قطاع الصناعة بالذات.

محي الدين: المواد المصنعة بالذات.

صبرى: المواد المصنعة، لو وازنا الصناعة باحتياجاتها بتصديرها بيبقى انتهى المشكل بتاع العملة.

عامر: المقارنة بالسنة اللى فاتت، ارتباطات القطن فى التصدير بالنسبة للسنة الجاية؟

صبرى: الارتباطات لسه لغاية دلوقتى مش ماشية جامد قوى بالنسبة للعملة الحرة، يعنى بنتكلم ولكن ابتدت الارتباطات تزيد شوية برضه فى الفترة الأخيرة يعنى ماهياش بالمعدل اللى احنا كنا منتظرينه.. الأسعار بتتحسن.

سرى للغاية

حسين: هناك صلة بين قفل بورصة مينا البصل وبين عدم التعاقد الكثير، ويمكن على التسويق الداخلى برضه فيه مذكرات متقدمة فى هذا الموضوع، اذا كان حتى أظن جت لك من مصطفى دراج ومن مين والله مايمنعش إن احنا نعيد البحث فى الموضوع أو نفكر فيه.

البغدادى: موضوع خاص بالقطن برضه المصنوع محليا وتصديره ومشاكله، يعنى الموضوع ده ناقشناه كثير مع مصطفى دراج.

صبرى: والرز تم تقريبا خلص كله.

حسين: المضارب بقى هى اللى عليها..

صبرى: بتشتغل بكامل طاقتها.

حسين: هو المذكرة الأصلية فيها معلومات عن هؤلاء الناس.. المذكرة.

عبد الناصر: وأنا مضيت الاقرار السنوى كلمت سامى أنا.

حسين: أصل أنا بس اللى صعبان على إن واحد انتظم فى العملية دى ظلم كبير قوى كنت أتمنى إنه ميتظلمش.

عبد الناصر: مين اللى انتظم؟

حسين: محمود نور الدين حسن ناصر ده بقاله من شهر يونيه قاعد فى بيتهم، الحقيقة أنا غلطان فى هذا الموضوع اللى حاولت إنى أبعده عن المحافظ، أنا كنت معتقد إنى أنا هبعده لمدة شهر أو حاجة علشان كان بينهم خلاف للغاية ما يتعين فى المجلس الجديد؛ فاللى حصل إنه اتاخر القرار بتاعه.

عبد الناصر: يعنى أنا لى رأى والله إحنا نعيد النظر فى جميع مجالس المحافظات ورؤساء المدن، يعنى عملية كلها لازم قبل عملية الاتحاد فالحقيقة أنا كنت مضيت هذا القرار امبارح.

سرى للغاية

حسين: سوء الطالع بتاعه.

عبد الناصر: بالنسبة لبقية العمليات، بالنسبة للقضية هل حد له كلام فيها؟

الشرباصى: واحد متخصص فى النصب وليه حكاية زيها علشان مجوز سورية ومراته مش عارفة حاجة.

محي الدين: لا هو الضابط طلع براءة. المطلوب بالنسبة للتانى بالذات، وهى برضه العقوبة شديدة عليهم يعنى ٣ سنين فى عملية أونطة يعنى!

الشرباصى: واحد نصاب آهو واحد بيقول لك اختصاصى فى النصب!

الشافعى: ينتهزوا فرصة إنه يهودى..

محي الدين: هو كده، انتهزوا فرصة إنه يهودى وابتدوا يركبوه العملية!

عبد الناصر: مين معترض على التفسير؟

الشافعى: لا.. ملوش لازمة.

عبد الناصر: مين معترض؟ مين مع التخفيف؟

حسين: هو فيه فى الموضوع رقم ٢: صرف ملابس المضيفات والموظفات، متهيألى موضوع زى

ده يعنى فيه حاجات اللى جاية من المجلس التنفيذى مشروعات صرف ملابس للمضيفات

والموظفات الاستعلامات فى محطة كذا، متهيألى مثل هذا الموضوع اذا كان كده مافيش

داعى إنه بييجى هنا أو يفوض المجلس التنفيذى باقرار عملية زى دى.

عبد الناصر: على أساس ننظمها، يعنى مواضيع ايه اللى هيتحط فيها.

سرى للغاية

حسين: لا.. ما هى تمشى آه..

عبد الناصر: مادام اتفقنا عليه من جليستين إن احنا هنبحث الاختصاص وايه هنا وايه هنا وبدل ما ناخذ حاجة حاجة كده ونقول دا يطلع من هنا، فيه عمليات كلها واحد اللي هو صرف ملابس المضيفات.

صوت: الميزانية على فكرة.

عبد الناصر: ماهى دى فلوس كده ماهى عايضة حماية؛ تطلع بقرار مش كده؟

حسين: نعم.. بقرار.

طراف: بس اعتمادها من الميزانية.

الشافعى: قانونا.. باصدار القانون بالصيغة المراده.

حسين: قانون؟

عبد الناصر: قانون.. أى مليم بيبقى بقانون، الميزانية بقرار لكن بقرار له أركان بيعرض على مجلس الأمة.

حسين: بقرار مش بالقانون ياريس.. ده بقرار.

عبد الناصر: الميزانية مهياش بقانون الميزانية بقرار.

حسين: يعنى مهياش تعديل فى الميزانية ده قرار مجرد قرار، يعنى لا هو تعديل فى الميزانية ولا حاجة بس هو تصديق بالصرف.

سرى للغاية

- عبد الناصر: تتحمل الدولة نفقات هذه الملابس الى ميزانية المصلحة.. تبقى بقرار؟
- حسين: أيوه.. لكن مبيحصلش تعديل! متأسف مش ممكن يطلع بقانون ده هو له قانون.
- عبد الناصر: الميزانية لا تصدر بقانون حسب دستورنا الميزانية بتصدر بقرار.
- حسين: عايز أقول: إن ده مش تعديل فى الميزانية يعنى ده ماهواش لا قرار بتعديل فى الميزانية ولا هو قانون ولا حاجة، جايز إنه طبعا هيدفعوا فلوس.
- الشافعى: هو رأى المستشار القانونى للمجلس التنفيذى؛ إنه لا مانع من اصدار القانون.
- حسين: أيوه.. يعنى الميزانية مش هتتغير.
- عبد الناصر: إحنا بنقول إنه لازم لها قرار لصرف الملابس مش قانون.
- حسين: قرار عادى.
- ابراهيم: إنت بترخص له إنه يصنع ملابس للسيدات وقرار سلطة يعنى.
- عبد الناصر: بنوافق على القرار وبعدين نبقى نشوف. (ضحك)
- أصوات: (ضحك)
- حسين: الموضوع رقم ٨: بدل طبيعة العمل وبدل الصحرا.. المذكرة خلاف القرار.
- البغدادى: آه.. بالضبط.
- حسين: والمذكرة التفسيرية خلاف القرار، وبعدين فى القرار بيقلوا ٣٥% بدل صحرا و ٤٥% بدل طبيعة عمل؛ ماعرفش هل الـ ٣٥% بدل صحرا هى اللى بتصرف لكل لناس ولا لأ؟ علشان

سرى للغاية

لو كان مختلف عن بدل الصحرا اللى بيصرف للناس اللى موجودين معاهم فى نفس الحتة دى، يبقى فيه تمييز والناس التانية هيشتكوا.

محي الدين: هو ده متعارض مع لايحة المؤسسات صيغة القرار نفسه؛ لأن لائحة المؤسسات بتجمع كل البدلات فى حاجة اسمها بدل طبيعة عمل، فلانم يتقال فى القرار ٨٠٪ بدل طبيعة عمل مايقالوش اسمين. هى اللائحة مسمحتش بانها تنقسم الى إقامة ومش عارف نظام ايه وصحرا ايه والكلام ده؛ هى جمعت ده كله فى حاجة اسمها بدل طبيعة عمل.

عبد الناصر: هل اللايحة دى موجودة ولا لا؟

محي الدين: اللائحة موجودة حاليا؛ ولذلك المذكرة التفصيلية صح بيقول نديهم ٨٠٪.

البغدادى: بيقسموها بينهم على ما يناقشوا المجلس التنفيذى علشان الناس حاليا بياخدوا علاوة.

محي الدين: أنا بتكلم بالنسبة اللائحة، اللائحة جمعت كل البدلات فى حاجة اسمها بدل طبيعة عمل متزده عن ٥٠٪، فوق ٥٠٪ تبقى عن طريق قرار من رئيس الجمهورية.

عبد الناصر: وذلك بحد أقصى للبدلات والخطر والتقسيم والصحرا ووجود حد فى العملية..

الشافعى: هو فى الحقيقة أكثر عدالة التقسيم لبدل الإقامة وبدل طبيعة العمل؛ لأن الإقامة بتبقى فى منطقة أو فى ظروف مثلا فى منطقة مفيهاش مدرسة مفيهاش وسائل راحة مفيهاش سكن كاف، لكن عملية العمل يعنى يتغير مع تغيير اللائحة.

محي الدين: اللايحة متغيرتش لغاية دلوقتى.

عبد الناصر: يعنى هنعمل ايه؟

محي الدين: نقول ٨٠٪ بس فى الصياغة.

سرى للغاية

صبرى: لا.. والله يعنى.

محي الدين: شوف نراجعها مع اللائحة.

صبرى: لأن إن قلت ٨٠٪ هلاقي الباقي كله هيطالب بيها و ٨٠٪ النهارده.

عبد الناصر: إحنا نشوف اللائحة.

الشرياصى: هو بتاع الملابس دي اختصاص المجلس لأنه فتح اعتماد مالى.

البغدادى: أو هو اذا كان حتى قرار جمهورى هي نفس العملية.

الشرياصى: أنا باقول: اختصاص رئيس الجمهورية، عشان كده هو فتح اعتماد مالى فى الباب الأول.

عبد الناصر: هو إحنا الجمعة الجاية انشاءالله بنشوف فيه حاجات اللي بتيجي هنا هنوديهيها المجلس التنفيذى، هو فيه لسه حاجات تانية على كان مجهزها بس أنا مجاتليش فرصة الحقيقة علشان أشوفها.

حسين: نرجو برضه إن الجدول يجيلنا قبلها بفترة علشان هو جالنا امبارح بس.

عبد الناصر: وأنا بقى برضه أفضل أشوف الرول قبل ما ييجى وأحسب كل العمليات، وبعدين إحنا قولنا: ييجى لى السبت والمفروض بقى ييجى لى الخميس.

طراف: هو كان وزع علينا الجدول بدون المذكرات بعت لنا رؤوس الموضوعات.

صبرى: بتوع المجلس التنفيذى.

سرى للغة

عبد الناصر: يعنى المجلس التنفيذى بيخلص الاتنين ممكن نديله التلات والأربع وممكن الخميس، أجيبه لك إنت السبت ويروح يطبع ويوم السبت بالليل يتوزع ويبقى عندهم الأحد والاتنين والتلات أو اذا كان راح الأحد الصبح.

فيه حاجة تانى بالنسبة للقرارات؟ ماشى.

محي الدين: هو موضوع الأنواط والنياشين، هو ده السماح بقرار ولا يعنى متهيألى إن مافيش داعى لعرضها على مجلس الرئاسة؟

عبد الناصر: والله حسب الاعلان الدستورى.

صوت: هل اذا بقرار ولا بإذن مثلاً.

عبد الناصر: هو اللى كان بيمنح رئيس الجمهورية.. ده فى الاعلان الدستورى الكلام ده.

عامر: كل اختصاصات رئيس الجمهورية.

محي الدين: الاذن بحمل وسام أو نيشان ده مش هيطلع بقرار؟

عبد الناصر: وبعدين يعنى لازم بنسمح له.

محي الدين: لكن المسألة رقم ١٥.. قرار بقانون بعدم جواز الطعن..

صبرى: ده تم سحبه.

محي الدين: سحبه.. آه. خلاص.

عبد الناصر: ليه؟

صبرى: لسه كان مشروع ابتدائى.

سرى للغاية

عبد الناصر: حاجة ثانية؟

محي الدين: مذكرة هنا موجودة مستشار من المجلس التنفيذي مذكرة له..

عبد الناصر: حاجة ثانية؟ ٨ مؤجل، ١٥ سحب، ٨ سحب لغاية ما يدخلوه لنا تانى أحسن، الباقي؟

حسين: الموضوع رقم ١٠: الموضوع نفسه اللي بيروح فى المعاشات الحقيقة برضه لو نعمل لنا سياسة فى العملية دي؛ فيه وزارات بتقدم وفيه وزارات مبتقدمش يعنى.

عبد الناصر: مثلا بالنسبة للعسكريين اذا كان فيه استمرار ..

محي الدين: بتبقى مهمة أوى.

عبد الناصر: بيبقى ما عدا ٨ سحب و ١٥ سحب، وبعد كده المذكرة من لجنة السياسة الخارجية عن اختصاصاتها وأسلوب العمل بيها، قبل ما نقرأها والله أنا لى ملاحظة على المذكرة. يعنى هو فيه فرق بين الاختصاصات وفيه فرق بين السياسة الخارجية، متهيألى السياسة الخارجية ممكن باستمرار نعدل فيها كل فترة ويطلع لها ردود بالنسبة للموضوع الفلانى.. وهكذا، وبعدين بالنسبة للاختصاصات هل الكلام ده ماشى ولا لأ؟

طراف: هو فعلا فيه حاجات.

عبد الناصر: طب ليه نحط حاجات غامضة؟! يعنى بالنسبة لى مثلا الحرب ضد الاستعمار.. كلمة الحرب هل تتساب كده؟!

الشافعى: يعنى ده نص من الميثاق، إحنا جينا يعنى الحاجات اللي موجودة فى الميثاق.

عبد الناصر: "تستقى السياسة الخارجية وخطوطها الرئيسية من ميثاقنا الوطنى الذى يعبر عن توجهات ثلاثة رئيسية وهى الحرب ضد الاستعمار"..

الشافعى: "الحرب ضد الاستعمار والسيطرة بكل الطاقات والوسائل لكشفه ومحاربه بكل أنواعه"..

سرى للغاية

عبد الناصر: "العمل من أجل السلام والتعاون الدولي من أجل الرخاء المشترك"، يعنى ايه يعنى لما تقول: وتستوحى من الميثاق؟!

الشافعى: لأ.. طبعا احنا بس الحقيقة عملنا هذا التحديد لمجرد نشوف هنقدر نشغل ازاي.

عبد الناصر: وبعدين "للوصول الى تحقيق هذه الأهداف" ممكن، وأنا رأيى ده بيحى من "المحافظة على الاستقلال والمكاسب اللي حققتها الثورة من الايمان بالاستقلال الوطنى، الايمان بالوحدة العربية، الايمان بالتضامن الآسيوى - الافريقى، الايمان بميثاق الأمم المتحدة والولاء له".. يعنى ايه؟

الشافعى: ده منقول من الميثاق.

محي الدين: هو يعنى نبقى حطينه قدام عيننا.

الشافعى: أصل فى الحقيقة كلمة الميثاق، فى الأول جبنا الميثاق بالنص وبعدين إحنا بنعمل مستخرج من الميثاق، يمكن فعلا هذا المستخرج ميخليش المعانى متكاملة.

عبد الناصر: وبعدين أنا بقرا الكلام ده شئ دشت كده!

الشافعى: هو الحقيقة ده ماكانش فى اللجنة هو كان ملحق بالنسبة للجنة إحنا حطينه أمام..

عبد الناصر: يعنى لما تقرأ الميثاق الكلام ده ماشى، لكن أما تيجى بنتأمل العملية دى وقفنا فى نقط معينة!

حسين: هو فيه نقطة ولو إنها شكلية شوية؛ هنا مكتوب اختصاصات اللجان أنا رأيى إنه مش اختصاصات لجان هى مسؤوليات لجان، أولا من ناحية الشكل بتاع اللفظ واجب اللجنة ايه، وبعدين اتهيالى إن واجب اللجنة حاجة مختصرة خالص غير السياسة الخارجية؛ يعنى هنا إحنا مش بنعمل السياسة الخارجية بنقول ايه السياسة الخارجية النهارده.

سرى للغاية

عبد الناصر: ممكن بكره تيجى اللجنة وتقول لنا ايه صح.

حسين: ابتدينا مشروع بالسياسة الخارجية فى كل نقط الحوار لكن إحنا دلوقتى بنتكلم على واجبات اللجنة، واتهيألى يمكن علشان نوصل لنتيجة فى هذا الموضوع واجبات اللجان هنتشابه؛ يعنى واجب لجنة الخدمات مسؤوليتها تجاه المجلس تساوى واجب اللجنة الاقتصادية تساوى واجب لجنة السياسة الخارجية بس كل واحد فى الموضوع بتاعه. يعنى لو اتعمل اجتماع مشترك بين مقررى مثلا اللجان دى، علشان نعمل صيغة واحدة لواجبات اللجان بيتهيألى يبقى أحسن، ليه بقى؟ علشان خطة العمل بتاعة كل لجنة والسياسة اللي هتعملها كل لجنة، الموضوع ده لسة جى بتاع الزمن لسه هنقعد نعمله يعنى هنقعد نشغل فيه مسافة طويلة. لكن واجبنا ايه تجاه المجلس هو ده اللي نلخصه فى كام نقطة صغيرين. أنا كنت مقدم مشروع..

الشافعى: اللي يهمنى فى الموضوع - اللي فى الصفحة الثالثة - اللي هو أسلوب العمل؛ لأن هو ده اللي تصورنا بيه إن ازاي العمل هيبندى. أما الجزء الأولانى ده محاولة فى تصوير الميادين اللي احنا المفروض إن احنا هنطرقها أو هنشغل فيها؛ فكنا بنتصور إن فى أسلوب العمل يإمّا إن احنا نحلل الأهداف والمبادئ اللي حددها الميثاق، ونضع اقتراحات وخطة عمل على ضوء نتيجة هذا التحليل ومتابعة التنفيذ.

الأسلوب التانى: إن احنا نناقش ونبحث وندرس ما يرد من الأجهزة القائمة؛ لأن احنا طبعا مش هنعمل تكرار فى الأجهزة القائمة لتنفيذ السياسة الخارجية. بمعنى آخر هل اللجنة هتكون منشأة لعمل جديد؟ بحيث إننا نقدر نفكر فى موضوع من الموضوعات اللي المفروض مثلا إن السيد الرئيس كان بيدى فيها قرار نتيجة زوايا مختلفة فى مجال الدراسة ويمكن وقته اليومى مكانش بيدى، تبقى حاجات كده ملهاش رد إلا لارتباطها بعدة مسائل، وكان فى تصورنا اذا كان فيه مشكلة..

عبد الناصر: هو طبعا يعنى أنا فى موضوع الهند ده قرئت كل المشكلة والموضوع كله، وبعدين إنت ما عندكش الأجهزة اللي طبعا هتدى..

الشافعى: هو فى الحقيقة كانت محاولة لتصوير طريقة العمل وأسلوبه؛ يإمّا إن احنا هنجيب الميثاق ونحلل الميثاق ونشوف اذا كان فيه نقط مهياش متغطية أو مأخوذة فى الاعتبار، أو بالنسبة للحاجات اللي ابتدت من الأجهزة القائمة حاليا والمواضيع اللي تكون متشابكة فى عدة

سرى للغاية

جهات مختلفة، ويمكن اللجنة يرسل إليها أى موضوع من هذه المواضيع لتدرسها توطئة للعرض على مجلس الرئاسة.

عبد الناصر: عموماً أنا متهيأ إلى إن النقط دى يعنى متدخلش فى الاختصاصات، دى بتدخل بعد اللجنة ما تتكون بتعرف واجباتها. اتكلمنا على الوضع الفلانى من الناحية الفلانية أو المبادئ العامة يعنى..

الشافعى: أيوه.

عبد الناصر: هى دى الاختصاصات يعنى أسلوب العمل يحتاج الى اقتراحات، وبعدين ممكن كل 6 شهور نطلع اقتراحات. وبعدين إحنا النهارده مطلعين بتقييم بالنسبة لمشكلة الصين، وبعدين ممكن بالنسبة لأنجولا نطلع اقتراحات من هنا وممكن بالنسبة لأى مشكلة عالمية يطلع قرار نتيجة دراسة ومتابعة فى لجان السياسة الخارجية. وبعدين برضه إحنا أسلوبنا الحقيقة اللي هو الأسلوب التنفيذى هيفتلف عن أسلوب لجنة الشؤون الخارجية فى البرلمان؛ لأنها هتبقى مسؤولية السلطة التنفيذية. فإحنا هنا الحقيقة بنقول: إن هى التحضير والدراسة بالنسبة لكل هذا، ثم كل ما يتعلق بسياستنا الخارجية بره فى حدود مبادئنا اللي هى فى حدود الميثاق.. ايه واجباتكم أو ايه اختصاصاتكم؟ إعداد تخطيط واضح للسياسة الخارجية للجمهورية العربية المتحدة.. هو ده لكن..

معى الدين: هو حسب اختيارات البغدادى الأخيرة، كانت بالنسبة للجنة السياسة الخارجية يمكن حوالى بندين ثلاثة مكانتش واضحة. إحنا اجتمعنا وحاولنا إن احنا نعمل development للكلام ده ونوضح ونحطه قدام المجلس..

الشافعى: على أساس إنها ورقة للمناقشة.

معى الدين: إحنا هنتغل ازاي؟ على أساس إن احنا يعنى ناخذ تصديق من المجلس، هل هنمشى فى السكة دى؟

سرى للغاية

عبد الناصر: لا.. يعنى أنا فى رأى اللى بيتم فى الجنوب بالنسبة للاستعمار ..

محي الدين: ده الخطوة الثانية.

عبد الناصر: لا.. لكن لما باجى دلوقتى وأقول حرب ضد الاستعمار، العمل من أجل السلام التعاون الدولى من أجل الرخاء، المحافظة على الاستقلال، مقاومة الاستعمار، الايمان بوحدة الوطن العربى، الايمان بالرسالات السماوية واحترام العقائد الدينية، الايمان بالترابط مع العالم الاسلامى، الايمان بميثاق هيئة الأمم المتحدة والولاء لها؛ دى جمل..

الشافعى: ده مستخرج من الميثاق.

عبد الناصر: العمل من أجل السلام، تمكين الدولة من الاستمرار فى معركة التطور لصالح تقدم الوطن.

محي الدين: أحطها قدامى لما آجى آخذ تقييم بالنسبة لأنجولا.. ضرورى الحاجات دى كلها.

عبد الناصر: نخط الميثاق.

محي الدين: يعنى بنختصر جمل الحقيقة.

عبد الناصر: ده مش من الميثاق!

الشافعى: إحنا كنا حاطين الميثاق الأول وبعدين الحقيقة شلناه. (ضحك)

عبد الناصر: اللى سمع الميثاق وفاكره يبص لده، يعنى قصدى باقول: إن طب ليه الميثاق أول ما أقول الحرب ضد الاستعمار معناها إنى أنا بكره هاخذ الجيش وأقوم طالع على أنجولا وروديسيا الجنوبية؟!!

أصوات: (ضحك)

الشافعى: لا طبعاً.

سرى للغاية

عبد الناصر: جملة جت فى الميثاق محدش يفهمها.. الحرب ضد الاستعمار، متهيألى إن زكريا واخذ القوات المسلحة وطالع على أنجولا!

أصوات: (ضحك)

عبد الناصر: يعنى الحقيقة اللي يقرأها فى الميثاق هى متديش المعنى ده.

محي الدين: بحاول أسترجع أنا الـ ٣ صفحات دول يعنى هو الـ ٣ صفحات دول..

الشافعى: بنبسط العملية.

عبد الناصر: لا.. بتحول السياسة الخارجية الى ميثاق فى السياسة الخارجية بجملة رئيسية لها من الميثاق.. اللي هى "الذى أقره المؤتمر الوطنى للقوى الشعبية كذا".. وبهذا بيبقى الميثاق قدامنا. وبعد كده بقى إحنا الحقيقة فى السياسة الخارجية مش حكومة لسه جاية جديدة النهارده بتوضع سياسة خارجية جديدة؛ لأن احنا سياستنا الخارجية متهيألى معروفة ومحددة حتى الكلام ده لما إنتو قولتوه، وبعدين مافيش كلمة عن فلسطين!

الشافعى: عن ايه ياريس؟

عبد الناصر: فلسطين عربيا.. حتى بالكلام ده من غير حتى ماتوجهه.

الشافعى: لما جينا قلنا: إن ببقى فيه تنسيق ما بين لجنة الشئون العربية..

عبد الناصر: لا.. أنا باقول: إن ده لو انتشر من غير فلسطين..

الشافعى: لا طبعا.

محي الدين: هو مش للنشر الحقيقة.

سرى للغاية

عبد الناصر: يعنى نطلع تبص تلاقى ممدوح رضا كاتبه بعد بكره فى روز اليوسف! (ضحك) مش هنطلع هنا لما أبص لأقيه فى روز اليوسف بعد يومين! وبعدين بعد كده ده الكلام اللي قاله كمال: ايه واجباتكم؟ وبعدين بتيجي تقدموا لنا اقتراحات بالنسبة لكل النقط الموجودة.

الشافعى: اللي هي بالنسبة للميثاق.

البغدادى: الميثاق وبعدين إحنا عايزين نطبق السياسة الخارجية، اللجنة بتتابع لحد ماتطبق السياسة الخارجية طبقا للقواعد.

عبد الناصر: توضع بقى زى ماهو بيقول: "تخطيط للسياسة الخارجية فى حدود برضه الميثاق"، وبعدين المؤتمرات.. كلام معقول، وبعدين "اعداد دراسات تساعد على اقتراح المواقف اللي ممكن نتخذها حيال استراتيجية الدول الكبرى"؛ يعنى اتهيألى ده يعنى ماهى استراتيجية الدول الكبرى؟! (ضحك)

أصوات: (ضحك)

الشافعى: نحاول نذاكر بقى قبل ما نخش فى.. الموضوع ده جديد بالنسبة لنا. (ضحك)

أصوات: (ضحك)

عبد الناصر: وبعدين "استعراض دراسة التقارير والمعلومات التى ترد من الأجهزة التنفيذية".. ماشى، "السياسات المختلفة للمنظمات الدولية".. ماشى، ابراز سياستنا فى المجالات الدولية.. ماشى، أسلوب العمل باللجنة..

حسين: هو ده خاص باللجنة.

عبد الناصر: وأنا اتهيألى يعنى يحتاج اعادة نظر والله.

الشافعى: فى الحقيقة كنا متصورين إن التوجيهات هتكون أكثر من كده! (ضحك)

سرى للغاية

عبد الناصر: هو كده بنزق نفسنا فى حاجات من الأول.. "قبل اللجنة الخارجية ما تجتمع قررت السياسة!" (ضحك) يعنى ده اللي أنا متصوره.. يعنى أنا متصور اللجنة تجتمع وبعدين أدى الميثاق بصورة عامة..

الشافعى: هو ده السبب إن احنا تعرضنا لأسلوب العمل، يمكن إن - زى سيادة الرئيس ما بيقول - إن أسلوب العمل ده بتاع اللجنة يمكن إن احنا برضه عايزين نصور طريقة العمل بتاع اللجنة؛ لأنه هو المفروض الأحداث هى اللي بتحدد السياسة الخارجية فى حدود الأهداف العامة، كل ما تيجى حاجة بتبلور أكثر عملية التطبيق السياسى.

طراف: والله أنا شايف لما وزارة الخارجية باعنت لنا دراسة مفصلة عن سياستها الخارجية واتجاهتنا فى كل ناحية..

محي الدين: ده بناء على طلب اللجنة يعنى.

طراف: لو تراجع ده وتقول لنا هل ده منطبق على اتجاهتنا؟

محي الدين: يعنى المذكرة دى إحنا طلبناها من وزارة الخارجية فى اجتماعنا فى اللجنة يعنى كلمنا عبد المجيد واتصل بيهم، بعد كده لسة ما اتقراش..

عبد الناصر: كويس بقى؟

محي الدين: معمول كويس.

طراف: أنا شفته معمول كويس بس عايزين ست شهور علشان يدرسوا فيه! (ضحك)

الشافعى: لا.. إحنا هنجتمع تانى على أساس هذا التوجيه.

محي الدين: هختصر الكلام ده، هو كان الهدف الحقيقة تحديد حدود عمل اللجنة.

سرى للغاية

عبد الناصر: هل نخليها اختصاصات ولآ واجبات؟

حسين: رأى إننا نخليها انها واجبات اللجنة.

عبد الناصر: مسؤوليات.

السادات: مسؤوليات اللجنة أنسب.

طراف: أنا الحقيقة شايف إن مافيش فرق كبير يعنى ما المسؤوليات هي الاختصاصات؛ يعنى هي لجنة المفروض إنها بتشوف مجال معين من العمل وبعدين بتقدمه لمجلس الرئاسة.

حسين: إحنا بنقول اختصاصات تبقى هي المختصة غيرها غير مختص تبقى هي اللي يتصدر قرارات.

الشافعى: الحقيقة هو المجلس هو المختص أصلا يعنى اذا كانت اللجنة بتعمل..

عبد الناصر: اختصاصات يعنى كلمة بايخة! (ضحك)

السادات: (ضحك) آه.. هو كده.

حسين: يعنى أدى العملية يعنى ندى تعليمات باستمرار مافيش حاجة اسمها اختصاصات.. مسؤوليات باستمرار يعنى العملية..

عبد الناصر: تبقى مسؤوليات بتدى نوع برضه من..

حسين: هو فيه يعنى عندى paragraph صغير ٥ أسطر وبعدين ممكن يتمط شوية، أقرأه يعنى؟

سرى للغاية

عبد الناصر: بالنسبة لكليه يعنى؟

حسين: يعنى ممكن يسرى بالنسبة لكل اللجان نقول مثلا: "مسؤوليات لجنة الخدمات والادارة المحلية تعمل بمثابة لجنة تحضيرية لمجلس الرئاسة للبحث والدراسة واقتراح الأسس التى تبنى عليها السياسة العامة الواجب وضعها موضع التنفيذ؛ بقصد تحقيق التحول الاشتراكى الديمقراطى الذى نص عليه الميثاق بالنسبة للخدمات والادارة المحلية، وكذلك بحث واقتراح وسائل التنسيق بين هذه الخدمات التى تؤديها الدولة ورغبة فى ايجاد التكامل بينها وتلافى التناقض فيها".

وبعدين بأقول: "الأعمال التى تيجى فيها السياسة والخطة الموضوعية لكل ميدان من ميادين الخدمات، ومراعاة انطباقها على ما ورد بالميثاق وضمن تنفيذها بروحه، مراعاة صدور القوانين واللوائح فى الموضوعات المسؤولة عنها اللجنة التى تدعو اليها الحاجة تطبيقا للميثاق نصا وروحا؛ وذلك مراجعة القوانين والقرارات، اقتراح قوانين ولوائح جديدة معدلة لقوانين ولوائح موجودة، العمل على الربط بين القوانين الخاصة بموضوعات الخدمات والقوانين الموجودة، الاتصال باللجان الأخرى فى الموضوعات التى تدعو الى الاتصال باللجان الأخرى، دراسة تقارير المتابعة لتنفيذ الخطط والمشروعات، ودراسة تقارير ديوان المحاسبة فى الموضوعات الخاصة بأعمال اللجنة".

يعنى الكلام اللى هو عمل المجلس بس عايز تحضير، فيه موضوعات فى الخدمات.. "اللجنة هى اللى تقوم بالتحضير للمجلس فى الموضوعات الخاصة بالخدمات، واللجنة الاقتصادية هى اللى بتقوم بالتحضير للمجلس فى الموضوعات الخاصة بالاقتصاد، واللجنة الخارجية بتحضر له". المجلس هنا مسؤولياته قوانين ولوائح وكلام من ده، ودراسة خطة عامة بتبقى هى نفس العمليات دى بس كل لجنة فى الميدان بتاعها.

السادات: تحضير.

حسين: تحضير.

حسين: أنا بوضح له الكلام تحضير يعنى إيه.

عبد الناصر: أى رأى إن أى لجنة ممكن تقترح حاجة وبعدين ممكن بيتعدل هنا الكلام.

سرى للغاية

الشرياصى: هو دلوقتى إحنا عايزين نعرف الحد بتاعنا؛ إحنا فهمنا إن احنا بنحل محل مجلس الأمة مؤقتا، لحد ما يجى المجلس فأنا عايز أفهم اختصاصنا ايه واختصاص مجلس الوزرا ايه، هل أنا هاخذ عمله مثلا ولا هو هييعته وأنا اراجعه بعد كده؟ فبتريحنا لو فهمنا المقصود ايه يعنى.

عبد الناصر: لا.. هو هنا إنتو واخدين اختصاصين.. اختصاص رئيس الجمهورية، واختصاص مجلس الأمة. رئيس الجمهورية مسؤول عن النواب بالتعيين، فإحنا هنا فى نفس الوقت نقدر نقول مسؤولين عن كيفية مباشرة اختصاصاتنا لأن احنا هنصدر قرارات وأى قرار يصدره المجلس التنفيذى إحنا بيبقى لنا رأى فيه. مسؤوليتنا بالنسبة للعمل إحنا كسلطة تنفيذية بنسب التنفيذ فى مجلس الوزرا العمليات التنفيذية اللى هى ماشية، ولكن يعنى السياسة العامة بالنسبة للمواضيع التى يجب أن يصدر عليها توضيح فباقول أنا: مثلا السياسة العامة بالنسبة لآسيا وافريقيا التضامن كذا كذا يبقى موقفنا معاهم كذا وكذا ومع دول عدم الانحياز، وزارة الخارجية بتنفذ هذا أو بتقول السياسة.

بالنسبة للاقتصاد، هى إن احنا بيبقى عندنا انكماش بنرفع سعر الفائدة وبنقل الائتمان وكذا.. الخ، بنرفع أسعار ونزود ضرائب ما هو فى حدود هذه السياسة العامة وهو بيعمل التنفيذ.

طب والقرارات التنفيذية هى اللى تطلع بيها قرارات جمهورية هتجى لنا، إمسك بالنسبة للتخطيط بنقول: إن احنا مثلا فى التخطيط عايزين متابعة ونشوف العمل ماشى لأن اطار الخطة موجود. ثم لازم نقر الخطة، علشان توضع خطة بالنسبة للميزانية لازم نقر ميزانية علشان تطلع ميزانية.

بالنسبة بقى للمواضيع اللى كان بيمارسها النظام الرئاسى، هى مبتدخلش اختصاصات رئيس الجمهورية فهو له اختصاصاته أصلا وفقا للدستور إنه بيطلع قرارات. وبعدين رئيس الجمهورية.. كلام فارغ والكلام ده اللى إنتو شايفينه حسب الدستور رئيس الجمهورية الحقيقة مايش إلا الفترة اللى مجلس النواب فيها بيطلع القوانين، لكن تعالى بالنسبة للعمليات الثانية حسب الدستور رئيس الجمهورية مالوش؛ السلطة كلها للوزارة ورئيس الجمهورية الحاجات - اللى حتى اللى أنا نظرا للخطة فيها - قلنا: تيجى فيها بيوافق على السفر الى الخارج بيوافق على العربيات يوافق على.. لكن مثلا فيه حاجات اختصاصات وزارة أصلا مش اختصاص رئيس جمهورية، المفروض حتى بتبحثها اللجنة الاقتصادية وكان لازم بتحصل موافقة على هذه العملية.

سرى للغاية

وأنا رأيت إن احنا نعيد النظر أيضا فى الاختصاصات فى داخل كل الوزارات؛ إن احنا مشينا على عدم تطبيق اختصاصات كثيرة جدا فى الوزرا، ادينا اختصاصات مجلس الوزرا للوزرا بعد ٥٢ وادينا الحاجات اللى كانت بمراسيم للوزرا.

بدى لك مثل.. اختصاصات وزير الاقتصاد كبيرة جدا، لكن هى مش اختصاصات رئيس الجمهورية ويستطيع وزير الاقتصاد وفقا للقانون سلطته ايه اختصاصاته؟ ٩٠٪ من هذه الاختصاصات مكانش وزير الاقتصاد يعملها إلا أما كان يرجع لى لأنها اختصاصات كبيرة جدا، علما إنه كان بيثوف السياسة يعنى معروف السياسة ايه زى موضوع القطن. يعنى موضوع القطن من اختصاصات وزير الاقتصاد اللى هى اختصاص المجلس التنفيذى النهارده، لكن موضوع لسه السياسة زى سعر الفائدة وسعر العمليات دى اختصاصات وزير الاقتصاد.

زى بيع الذهب، ده بيع الذهب اختصاص وزير الاقتصاد اللى هو الاحتياط، يقدر بكره حسب القوانين يقول لك: من اختصاصاتى ويروح واخذ الذهب بايعه! لكن اللى كان بيحصل إنه ماكانش بيبيع حاجة إلا لما يرجع لى، ليه؟ لأن مثلا مش متصور إنى أبص فى يوم ألاقهم باعوا الذهب وأنا متصور إن ده احتياطى! فأصلا اختصاصات رئيس الجمهورية وفقا للدستور حتى اذا القوانين دى راحت لمجلس الأمة، يبقى مافيش قدامها حتى إنه لو فيه شك إنه يروح مجلس الأمة.. إحنا منقسمين فدا يقولك قانون وده يقول لك قرار.

الشرياصى: لا.. ما هو ده اعتماد مالى.

عبد الناصر: طب اذا هيبقى الشغل ايه فى هذه العملية؟ الشغل الحقيقى أنا مايعتبرش إن احنا فيه حكومة مثلا حتى بعد الاعلان الدستورى، الاعلان الدستورى ملغاش إن برضه رئيس الجمهورية بيمثل السلطة التنفيذية.. رئيس الجمهورية يمثل السلطة التنفيذية مش رئيس الجمهورية بيملك ولا يحكم بس قلنا: بيمثل هذا.

الشرياصى: أهو ده اللى أنا عايز أخرج منه، إن النهارده أى اقتراح زى ما حصل فى الاقتراحات فى الأسبوع الماضى بيوافق عليه المجلس، بيكلم المجلس التنفيذى إنه يتقدم بتنفيذ هذا الاقتراح فى صورة قانون بيعرض علينا أو بأى طريقة كانت.

سرى للغاية

عبد الناصر: وأنا رأيت إن لما يجي الاقتراح برضه بنفضل إن اللجان تدرسه قبل ما نتكلم فيه؛ إفرض إن حد منا قال أنا بقتراح المحافظات تعمل كذا، والله بدل ما نوافق بنقول للجنة الخدمات إنها تبحث ده بالنسبة لكذا وكذا.

الشرباصى: كويس يعنى لينا سلطة الاقتراحات أو عمل قانون وينفذه المجلس التنفيذى، لكن إن أنا أدخل فى التنفيذ بجهاز مثلا أدخل وأنغمس فى التنفيذ! لأن قد تكون المراقبة أو قد تكون المتابعة..

عبد الناصر: يعنى لا .. يعنى ايه تدخل نفسك فى التنفيذ؟

الشرباصى: يعنى مثلا؟

عبد الناصر: إحنا اتكلمنا فى هذا الموضوع أظن فى أول جلسة وكنا واضحين، يعنى أنا مبدخلش فى التنفيذ لكن أقدر أقول النهارده إن نوفر فى المساكن الشعبية ونزود القطن فى المصانع نظرا لأن المؤسسة مش قادرة تدى.. ده موضوع تنفيذى هنا بنقدر نخرج هذا الكلام.

الشرباصى: بنخرج والجهة الثانية اللي بتنفذ يعنى.

عبد الناصر: والتانى بينفذ.

الشرباصى: بينفذ يعنى هو ده اللي أنا عايز أقوله.

عبد الناصر: ولهذا إحنا فى العمليات دى بنقول: إن الكلام ده بيشفه المجلس التنفيذى وبعدين ده يريحنا، وبعدين أنا حاسس مثلا أول مرة من عشر سنين فى الفترة اللي فاتت دى ليه؟ فيه ماكينة ماشية يعنى المجلس التنفيذى يجتمع وبيبحث وبيشوف التفاصيل والدنيا ماشية. برضه كان الأول العملية زى عملية اليمين دى تبص تلاقها معطلانا! يهنا إن الماكينة دى تمشى ومتهيألى بتأثر على سير العمل فى الأجهزة دى، لكن أنا مش هروح أنفذ بس أنا أقدر اقترح.

سرى للغاية

الشرىاصى: هى دى النقطة.

حسين: إحنا بنوجه بناء على اقتراح ولكن لازم نتابع التنفيذ هل تم التنفيذ ولا؟ مروحش أنا أنزل علشان أتابعه..

الشرىاصى: أنا عندى جهازين لمباشرة التنفيذ من أجهزة الدولة قائمة.. ديوان المحاسبة وديوان الموظفين، دول حتى كانوا تابعين زمان لمجلس النواب علشان يبقوا مستقلين استقلال تام؛ هات الجهازين دول اللى هما معاهم أدوات المراقبة، لكن كوني أنا أعمل لجنة تانية وأقول مهمتها كذا والمتابعة مادام هو فيه مجلس! يعنى أنا بتكلم على العموم أنا بتكلم عن نظرية عامة مش عايزين ندخل فيها.

عبد الناصر: أنا بدى برضه والله أفسر الأساس للنظام اللى احنا ماشيين به، الحقيقة رئيس المجلس التنفيذى موجود هنا..

الشرىاصى: نعم.

عبد الناصر: إحنا بالنسبة للتنفيذ بنقرر، يعنى ده كده الوضع بدليل مثلا إن أما بنمشى حاجة بنقول القرار ده بيمشى وينقول على تبحتلى ده تمشى ده، بقى هو كرئيس المجلس التنفيذى بيروح بيرأس المجلس التنفيذى أو فى الوزارات وبيمشى هذه العملية من ناحية التنفيذ. ودى الحقيقة الحكمة فى وضع فى إن رئيس المجلس التنفيذى لابد بيكون المفروض يبقى طبعا إنه هو متفانى فى الكلام اللى احنا ماشيين فيه، ميجيش بقى بيعلن استقلالة من المجلس التنفيذى ويقول: ده أنا رئيس المجلس التنفيذى أعلنت استقلالى من المجلس التنفيذى وبيمشى فى سكة غير السكة؛ لأ.. الكلام اللى احنا بنقره هنا هو مسؤول إنه يطبقه.

وبعدين بالنسبة للمتابعة، زى ما قلت له أنا: هات لنا الخطة الشهر الجاي، هات لنا المتابعة بتاعة السنة دى.. أنا مثلا كنت طالب متابعة ٣ أشهر بعد كذا أسبوع، هات لنا السنة التانية؛ بيروح هو بيعد فى المجلس التنفيذى وهيتكلم وبيبحث الموضوع ده، بتجيله التقارير ببيعنها لنا هنا بناقش الموضوع. الموضوع حصل فيه رأى بنقول لرئيس المجلس التنفيذى: الوزارة الفلانية مامشيتش ويجب كيت ويجب كيت، بيجمع ويقول مجلس الرئاسة قعد وبحث أظن بتقول إنه..

سرى للغاىة

صبرى: توجيهاى مجلس الرئاسة.

عبد الناصر: توجيهاى مجلس الرئاسة، وهذا لا يمنع - وصى ما قلنا - بنطلب أى بيانات عايزينها، لكن مش متصور إن احنا هننزل ننفذ يعنى..

البغدادى: اذا كان فيه مثل معين..

عبد الناصر: آه..

الشرباصى: لا.. أنا عايز أتكلم على العموم، إنه متابعتنا متكنش بطريقة يعنى مساءلة؛ لأن المجلس التنفيذى مستقل وإحنا علينا إن نقترح وهو عليه إن ينفذ.

صبرى: ده واضح طبعا.

الشرباصى: والا هنبص نلاقى نفسنا منغمسين فى التنفيذ، وبعدين لما كل واحد يقول أنا مالى هو مجلس الرئاسة اللى قال كده وهو اللى تدخل وقال أعمل كده!

حسين: طب لا إحنا المفروض نسأل.

الشرباصى: لا.. لا.. أنا مقصدش هذا، مسؤولين إحنا فى الاقتراح لكن التنفيذ هو بينفذ ومسؤول أمامنا فى المتابعة وكمان الميثاق.

عبد الناصر: طب ليه بنقول مجلس الرئاسة؟

سرى للغاية

الشرياصى: لا.. مقصدش هذا، باقول: بيتدخل فى طريقة التنفيذ لكن طريقة التنفيذ هم المسؤولين عنها مسؤولية كاملة.

محي الدين: نتائج التنفيذ لازم يكون ليها متابعة.

الشرياصى: باقول: أنا معملش لجنة عندى مثلا وأقول: هاتوا لى إنتو ليه معملتوش بالطريقة الفلانية؟ أدى النقطة فيه عندى هيئتين مراقبتين.. عندى ديوان المحاسبة وعندى ديوان الموظفين، هؤلاء هما لكن أنا معملش جهاز عندى كل يوم وهاتوا لى فلان وهاتوا لى علان! معملش بالشكل الفلانى ومعملش بالشكل الفلانى ليه؟ يبقى ده تدخل أنا من مجلس الرئاسة فى طريقة التنفيذ.

عبد الناصر: أنا بدى أوضح أنا مثلا كلمت على صبرى وقلت له: إن أنا عندى كلام، افرض هذا الموضوع موجود عند حد منكم مثلا بييجى فى أول الجلسة ممكن إن يبقى فيه كلام عام بنقول: إن حصل إن زى ماسمعت زى ما بيقول كمال بالنسبة للميزانية بالنسبة للانتاج متصدرش وكان ممكن يتصدر، وإن فيه اهمال فى الناحية الفلانية؛ على صبرى مش هيقدر يرد، هنقول له شوف هذا الموضوع وادينا ايضاح عنه فى الجلسة القادمة، بيقول: لا.. مقدرش الجلسة دى ادونى جليستين، هنقول له: وبعد الجليستين.. متهيألى ده اللى أنا متصوره.

وأنا يعنى فى هذا صار إن أنا مش مسؤول عن كل حاجة فى البلد، بقيتم إنتو مسؤولين عن العسكرى اللى بيموت فى اليمن وعن الكيلو اللى بيتباع بسعر أعلى إنتو مسؤولين عنه.. صح ولا لا؟

أصوات: طبعا.

عبد الناصر: يعنى دا مثلا الواحد بيعتبر نفسه مسؤول عن هذا ومسؤول عن ده، لكن اللى أنا متصوره إن إحنا بنوضع سياسة وبنخطط سياسة وبعدين أيضا بنتقدم وبنسأل على صبرى.. هل السياسة اللى احنا عملناها اتنفذت ولا ما اتنفذتش؟ لأن هو أيضا مسؤول كرئيس مجلس تنفيذى وكعضو معنا هنا إنه العملية كذا بتمشى، وده اللى بيحصل فى المناقشات وإذا كنتم تحبوا برضه على صبرى بيقول لكم ايه اللى حصل فى المجلس التنفيذى بصورة أكبر من كده برضه يستحسن.

سرى للغاية

محي الدين: هو بيعت لنا البيانات.

طراف: بس عايزين المذكرات بتاعة الجلسة والمذكرات كمان بتاعة المسائل.

حسين: ميكانيكا هتيجي لنا ياريس المناقشات بتاعة المجلس التنفيذي في صورة اقتراحات بقرارات أو اقتراحات بقوانين.

عبد الناصر: النهارده اللي أنا متصوره إن احنا لازم نعيد النظر في اختصاصاته على أساس برضه فيه حاجات كتيرة من العمل برضه، وأنا متصور إن فيه حاجات كتيرة هتطلع بقرارات؛ يعني النهارده مثلا أنا كنت بأشير الى النقد والائتمان في الدستور بالذات؛ لأن أساس الدولة النقد والائتمان والعمليات دي كلها الحقيقة وزير الاقتصاد يقدر ياخذ فيها قرار حسب الاختصاص فيها. إحنا هنا بنشوفها من الناحية السياسية وبنقول إن الائتمان كذا أو لا، في نفس الوقت ممكن أما بنحط اقتراحات بنديها لعل صبرى بيناقشها وبعدين بييجي يقول لنا: إن فيه اجراء من الناحية الفلانية كيت كيت كيت، قد نقتنع بيها وقد لا نقتنع.

أو زي ما قلنا في أول الجلسة: اذا دعى الأمر الى إن اللجنة بتجيب وزير الاقتصاد عن طريق المجلس التنفيذي يقعد ونتكلم معاه في الناحية الاقتصادية.. اتكلمنا في هذا أظن؟ لكن النهارده الحقيقة فيه برضه العملية عايزة لم اختصاصات الوزراء؛ العمليات حاجات كتيرة نقل موظف، وقد لا يكون القرار الجماعي للمجلس التنفيذي كله قد يكون القرار الجماعي للجنة من لجان المجلس التنفيذي، يعني ايه؟ عاملين هم لجنة كذا ولجنة كذا ولجنة كذا قد يكون القرار المفروض إنه بموافقة اللجنة الاقتصادية، وأنا يوم ما عملت ده في اللجنة الاقتصادية وقلت: إنه حتى بدون حاجة في المواضيع دي والمواضيع دي المواضيع دي..

صبرى: هو الحقيقة يعني الشغل النهارده في المجلس التنفيذي بينقسم الى شقين:

أولا: شق اللي هو القرارات والقوانين، ودي مبأشيرش اليها على أساس إنها جاية أو مطلوب تعديلها، وبناء عليه الرول الحقيقة في المجلس التنفيذي اللي بيتوزع حيجي أو بيرجع تاني اذا حصل فيه بعد المناقشة تعديلات.

سرى للغاية

النقطة الثانية اللى هى الـ general debate: اللى هى المواضيع العامة اللى بتتفتح، وبرضه ماشيين على نفس الطريقة اللى احنا بنمشى فيها هنا اللى هى إن أى واحد عنده أى موضوع بيثيره.

فبيجى موضوع زى مثلا موضوع المقاولات، بثير أنا الموضوع ويتناقش وبعدين مبيتخدش فيه قرار؛ يعنى هو أنا باخد قرار وأكون رأى وبعدين باجى أنا هنا لمجلس الرئاسة باخد فيه توجيه وبناء على هذا التوجيه بعود للمجلس التنفيذى، باقول: التوجيه بتاع مجلس الرئاسة فى هذا الموضوع ناقشناه هو كذا وكذا وكذا؛ فبيتوضع فى صيغة قرارات وقوانين وبتيجى فى النهاية.

أما اذا كان طبعا فيه أى موضوع عام بيثار هنا ويتاخذ فيه توجيهات - زى الأسبوع اللى فات كان فيه توجيهات بالنسبة للمحافظين وبالنسبة لكذا وكل ده فى المجلس التنفيذى - فى أول الجلسة باقول لهم: توجيهات مجلس الرئاسة فى الموضوع الفلانى كذا وكذا، وقد يحدث مناقشة مثلا وينقال فيها مثلا: والله إحنا بنرى تعديل هذا، برجع تانى الى مجلس الرئاسة للتعديل.

عبد الناصر: ممكن طبعا بنقول: إنهم فى هذه النقطة بنعيد النظر فيها.. اعادة النظر فى كذا وكذا..

صبرى: طبعا.

عبد الناصر: وبهذا بتمشى العملية، الحقيقة محناش عايزين تفضل برضه العملية منفصلة خالص. فالعملية الحقيقة إحنا الحقيقة تعبنا من الشغل التنفيذى فى الكام سنة اللى فاتت الحقيقة، (ضحك) وبعدين ده الحقيقة نهانا عن عمليات أساسية أو خلى كل واحد مشى فى سكة. والنهارده بدنا نمسك العمليات كلها كعمليات in general، وبعدين الحقيقة اللى أنا متصوره برضه النهارده إن شغل هذا المجلس هو الشغل اللى أنا كنت بيقوم بيه سواء كان فى الدستور أو مكانش فى الدستور، بالاضافة الى الشغل اللى كان بيقوم بيه مجلس الأمة حتى يقوم الدستور الجديد.

محي الدين: هو ده الموضوع.

عبد الناصر: أظن واضح ياشرىاصى؟

سرى للغاية

الشرياصى: تمام. واضح يعنى.

عبد الناصر: وإحنا الحقيقة يعنى كل ما نمسك المواضيع الأساسية والعملية اللي كنا بنفتقد للعمل فيها بالنسبة ونسب المجلس التنفيذى بيدخل فى المجلس؛ يعنى فيه عندنا موضوع النقابات مثلا واتكلمنا فيها، فيه مواضيع كتير جدا تخص تطبيق الميثاق فى العمليات التنفيذية، بيتحط الموضوع وبعدين فىن بعد سنة عايزين المواضيع دى إحنا اللجان تطلع بيها هنا كاقترحات أساسية، وبعدين أى واحد فى هذا المجلس له الحق إنه يثير أى موضوع ويطلب كتابة قراره من ضرايب الى عزل أى واحد، بيحى واحد يقول: إن عضو هذا المجلس كيت كيت وهو شايف إنه ده انحراف فيجب عزله، الحقيقة فلانم نمشى كده ونشتغل على أسس وعلى قواعد ونحط هذا الكلام موضع المناقشة.

والمجلس لازم ياخذ الحقيقة وضع لأن احنا بننتقل من مرحلة الى مرحلة تانية، وأنا الحقيقة حريص إن المجلس لازم ياخذ وضع القيادة الجماعية الكاملة؛ لأن يعتبر ده هو الأمان لمستقبل هذا البلد، وإلا العملية بتاع العشر سنين اللي فاتوا اللي هى النظام الرئاسى كان ضرورى جدا فى الفترة اللي فاتت الحقيقة، ولكن النهارده وصلنا الى مرحلة لازم نغير ونوصل الى نظام جماعى بكل المعانى.

وأنا رأيى إن مافيش قرار يصدر فى المستقبل وإن جميع القرارات تصدر جماعية؛ يعنى ايه جماعية؟ يامجلس رئاسة يامجلس تنفيذى أو حتى مجلس أمة فى المستقبل أو لجنة فى المجلس؛ يعنى أنا متهيألى فيه قرارات تنفيذية بنعرضها هنا ممكن نعرضها على المجلس التنفيذى.

صبرى: أنا بطلب تفويض من المجلس إن اللجنة الفنية المتخصصة فى الموضوع الفلانى تاخذ قرار فى هذا الموضوع.

عبد الناصر: ولكن نتجنب بقدر الامكان إن ندى تفويض لشخص يعنى على الأقل ٣ ياخدوا؛ وبهذا الحقيقة نبتدى ندخل فى العملية دى ونقدر نطبق الميثاق. طيب بنعيد فى عملية اللجنة بالنسبة للكلام اللي الاخ كمال قاله: إن جميع اللجان إن كل لجنة يجتمع منها واحد.

محي الدين: أصل هو الحقيقة صعب إننا نوضع اختصاصات موحدة لكل اللجان.. أنا باعتبارها مستحيل. وممكن وإحنا قاعدين دلوقت نختصر كل الكلام ده بالنسبة للجنة السياسة الخارجية الى الصفحة نمرة ٢ عدا البند ٤ و ٥، وبعدين بنجى للجهاز التنفيذى فى الصفحة

سرى للغاية

نمرة ٣ فى الآخر وبنفق على الشعب اللى بيتكون منها الجهاز ويبياشر العملية كلها،
والباقى كله نشطبه.

عبد الناصر: نشطب الصفحة نمرة واحد ما عدا..

محي الدين: هنسب سطر من أول "تطبيقا للميثاق الوطنى للجنة".

عبد الناصر: أسلوب العمل فى اللجنة هل لينا دعوة؟

محي الدين: مالناش دعوة.. نشطبه

عبد الناصر: الجهاز التنفيذى للجنة.. بدون ذكر أفراد.

الشافعى: ده واحد يمكن..

عبد الناصر: وكمان سياستنا فى المجال الاسلامى والشئون العربية والشئون الآسيوية.

محي الدين: هو المكتب هيشترك مع اللجنة دى واللجنة دى.. مشترك.

طراف: والمفروض المكاتب دى هتكون مكاتب خبرة ناس متخصصة بحيث إنه هيدى خبرة مقبولة،
ولأ مكاتب موظفين؟ يعنى أنا شايف إنه..

عبد الناصر: اللى أنا شايفه إن المكتب هو اللى هيجهز لك طبعا.

طراف: يبقى أنا شايف إنه هيصعب إن نجيب ناس متفرغين فى الواقع لشغل المكاتب دى، فإذا كنا
عايزين نجيب ناس فى مستوى يصح يكونوا خبراء فى الأفرع المختلفة سواء ده كان محتاج
يبقى فى بقية اللجان؛ فأنا بعنقد إنه يستحسن إن احنا نستعين بناس مش متفرغين على إنهم
يشغلوا كخبراء.

سرى للغاية

عبد الناصر: يعنى هو مثلا واحد بيروح ببقى مندوب.. هو ده العيب! اذا جيببت واحد من الخارجية مش متفرغ وخليته معاك ببقى بيروح هناك - بيحصل بالطريقة اللى احنا عارفينها - هيقعد يقول بقى ده كلام وده كلامه كذا..

طراف: ميصحش إن هم يشتغلوا من غير ما نعلن أسمائهم يعنى.

البغدادى: اذا كان واحد كفاءة فيصح نجيبه متفرغ.

طراف: يجوز يكون بيشتغل فى حته تانية أستاذ فى الجامعة مثلا.

محي الدين: منتدب يعنى يكون متفرغ.

عبد الناصر: ممكن من الأجهزة التنفيذية.

صبرى: هى الأجهزة كلها صغيرة يعنى.

عبد الناصر: لو جيبنا ناس من الجامعة، هيسيب الجامعة؟

حسين: يعنى بيبقى فيه حالات صعبة قوى إننا نجيب فيها يعنى يمكن المتخصص الوحيد فى الجامعة أبقى محتاج له ومينفعش أسيبه؛ يعنى يتساب فى جامعته ويجى ببقى منتدب.

الشافعى: أستاذ غير متفرغ لكن مش العكس.

حسين: وبيتهيالى يعنى إن الخبرات الكثيرة إحنا عايزين سكرتارية فنية، ويجب إن احنا نقنع بأن الناس اللى اشتغلوا معنا بيقوا سكرتارية فنية مهماش مجلس وطنى للخبرة فى شئون عملية معينة المجلس الوطنى..

سرى للغاية

عبد الناصر: ماهى برضه الوزارة عايزة اللى يشغلها، يعنى أى وزارة أحتاج فيها بيانات أبعت وأقول للوزارة: رأيكم ايه فى العملية دى؟ يعنى برضه الأجهزة إحنا بنشتغل بيها.

طراف: طبعا.. تبقى هذه المكاتب سكرتارية فنية.

حسين: يعنى مش مستوى المجالس الخبرة.. آه بالضبط كده.

عبد الناصر: يبقى كده عملنا صدامات لا أول لها ولا آخر.

حسين: إذا حبيننا نجيب خبرات كثيرة بعد كده الخبرات دى فى التنظيمات الشعبية فى اللجان الشعبية فى لجان المؤتمر الوطنى فى عمليات ممكن تبقى نجمع كل الناس لكن إحنا هنا لازم نقنع إنها تكون سكرتارية فنية بس.

عبد الناصر: يعنى بدى لكم مثل عن الرئاسة، فى الفترة اللى فانتت كان بيشتغل معايا على وسامى شرف ومحمد فايق للشؤون الافريقية، وبعدين جبت ناس ووظفتهم فابتدوا يعملوا مشاكل؛ مثلا رياض ابتدى شوية بقى هو بيشتغل شغل وزارة الخارجية! فقلت له: يروح الأمم المتحدة، كان عندى عماد قلت: يخده يوديه الحربية، وكان عندى أبو زيد قلت: ودوه سفير وكان عندى هويدى. طلع فى الآخر كل اللى اشتغلوا فى الرئاسة فى الهيصة دى كلها عبد السلام بدوى كان موجود وكان بيشتغل وحلمى السعيد هم دول.

صبرى: كل الوزارات بتصب..

عبد الناصر: لكن كل ما أجيب واحد يشتغل شغل الوزارة! حتى جيبت يوم وقلت لحلمى السعيد: روح بنك مصر. وده اللى عايز أقوله: لو بيان إن فيه نوع من الازدواج فى الأجهزة بيحصل على طول نوع من.. فاللى موجود دلوقتى عبد المجيد، ولازم وإحنا بنعمل كده على طول بنحط فى راسنا العملية دى.

الشافعى: يمكن اللجان هى العامل الأسمى.

سرى للغاية

عبد الناصر: بعد كده الشؤون العربية، ماشى الكلام ده ولا نعيد كتابتها تانى؟

طراف: والله أحسن كتابتها حسب التوجيه.

عبد الناصر: الشؤون العربية هل فيه حاجة؟ هو فى عملية الاتحاد الاشتراكى كمنظمة سياسية وصلاته بالقيادات العربية الأخرى من خلال نشاطه.. دى بنخليها دى للجنة الاتحاد اللى هى نمرة ٤.

طراف: طيب..

صبرى: وه كمان.

عبد الناصر: ه برضه والله.. السياسة العربية لاستعادة حقوق الشعب الفلسطينى؛ لأن والله لو اتسرب الكلام ده ولقيناها طالع مش كده؟ بدل مايقعدوا يقولوا لنا كلام! والكلام عن غزة وايجاد صلات.. ده بيدخل فيهم، أنا بدى بتوع غزة هم اللى يقولوا هذا الكلام ميطلعش من عندنا إحنا. اتكلمت معاهم لما رحى فى هذا؟

رفعت: يعنى أنا شايف إن هم مش هيقدرنا يشتغلوا برضه.

عبد الناصر: لا.. إحنا هنشغل بس منقولش إن احنا اللى بنشتغل ونشغلهم؛ يعنى مقولش إنى أنا عايز أوجد صلة بين كذا وكذا لا.. أنا باقول لبتوع غزة: يعملوا وأنا قلت لهم هذا الكلام. السياسة العربية لاستعادة حقوق الشعب الفلسطينى.

معى الدين: هنشطب الكلام ده كله فى التفسير.

عبد الناصر: صح ما سياستنا فى حدود الجامعة العربية..

أصوات: (ضحك)

سرى للغاية

رفعت: لا.. يعنى اذا كان فيه موقف مثلا معين فى اجتماع الجامعة.. ده المقصود.

عبد الناصر: كنتوا بتقولوا عايزين تشطبوا ايه؟

محي الدين: تفسير السياسة العربية.. مافيش داعى لـ ٣ أسطر دول.

عبد الناصر: اللى هى ايه؟

محي الدين: بالنسبة للشعب الفلسطينى بعد كده ماهو الرئيس قال عليها: ما فيش داعى أبدا.

رفعت: هو ٤ أو ٥.

عبد الناصر: حقوق الشعب الفلسطينى فى وطنه، بعد كده.. لجنة تطبيق الميثاق.

رفعت: فيه كام نقطة اقترحها زيادة فى عملية توجيه الدعاية العربية.. نزودها.

عبد الناصر: كاشراك استراتيجى ولأ..

رفعت: لأ.. كتوجيه.

عبد الناصر: اكتبولنا تانى يعنى.

حسين: متأسف هنرجع تانى للناحية العربية يعنى مذكرة الناحية العربية، لو نقرا بقى اللى فاضل دلوقتى.

عبد الناصر: مافيش حاجة؟

سرى للغاية

حسين: يعنى منظرها لسة تلاقى اللي عايزة تتراجع تانى.

طراف: عايزة تتراجع أبوه.

عبد الناصر: بنبص على الميثاق وبرضه بنبتدى تطبيق الميثاق زى العملية دى.

حسين: آه.. آه.. ممكن، يعنى المذكرة دى عايزة تتراجع تانى.

عبد الناصر: "اجتمعت لجنة تطبيق الميثاق، ورأت بعد هذا الرأى أن تقترح على مجلس الرئاسة من حيث المبدأ تشكيل لجنة ويعلن عن أسماء أعضائها، تشترك مع لجنة تطبيق الميثاق فى دراسة الميثاق دراسة مفصلة بابا بابا، ووضع المقترحات التنفيذية ووضع خطة تفصيلية للعمل على ارساء الميثاق فيما يحتوى من معانى - ده رأى لجنة تطبيق الميثاق - وذلك لحين قيام تشكيلات الاتحاد الاشتراكى العربى فيما قد يكون قائما من خلال المبادئ والتوجيهات" .. بنسمع وجهة نظركم.

طراف: والله إحنا لما جينا نتكلم مع الأخ كمال فى الموضوع قلنا: يمكن نبتدى بتقديم اقتراحات معينة بنختص بالحاجات الواردة بالميثاق؛ يعنى ضربت مثل بالتأمين الصحى والموضوعات العامة اللي بيصح إنها مذكورة فى الميثاق ونتقدم بمشروعات فيها؛ فوجدنا فى الواقع أن الميثاق فى حد ذاته محتاج منا إحنا إن احنا ندرسه كويس، لأنه برضه لما نبص فى الميثاق هنجد إنه كثير منا مهوماش ملمين تماما بكل المسائل الرئيسية الواردة فيه.

عبد الناصر: كمال حافظه! (ضحك)

أصوات: (ضحك)

حسين: مش بالضرورى يعنى. (ضحك)

سرى للغاية

طراف: الواقع إن الميثاق اتكتب عنه كثير واتكلموا كثير فى المؤتمر، ولكن أنا ملحوظتى على كل الكلام اللى اتقال واللى اتكتب لإنه كان بيتكتب لطبقة معينة من الناس، وإن النهارده أنا لما بقرأ الميثاق - وأنا قريرته ١٠ مرات فى الفترة الأخيرة دى - أنا كل مرة بكتشف فيه حاجات يصح إنها تبرز ويتحط تحتها خط؛ معانى موجودة فى الميثاق مهياش موجودة فى الذهن تتعلق يابناريخنا فى الفترة السابقة القريبة يابناريخنا من بعيد يابخطتنا للعمل فى المستقبل. حاجات كثيرة جدا موجودة، ويصح قوى إن احنا نراجع الموجود حاليا فيما يختص بنظم التعليم بتاعتنا هل هو ينطبق على ما ورد فى الميثاق ولا لأ؟

كان فيه اشارة مثلا بالعلاقة بين ثورة ١٩ وثورة ٥٢ والأسباب اللى أدت الى فشل الثورة ١٩ هى اللى كانت أدت الى قيام ثورة ٥٢؛ ده معنى جديد فى الواقع مطرقتش ومحدث كتب فيه، وهى فترة تاريخية من الاحتلال الانجليزى لغاية النهارده الواقع لم تؤرخ إلا ما قام به عبد الرحمن الرافعى، وانما عبارة عن سرد وقائع ومجابهاش منظمة ولا متمشية مع المعانى اللى يمكن إحنا نحب نبرزها ونبنى عليها جيل جديد متشبع بفلسفة خاصة بالميثاق.

فى كل باب من أبواب الميثاق فيه حاجات من هذا النوع، المقصود فى الواقع إن احنا نستخلص فلسفة من الميثاق يكون مؤمن بيها الناس مؤمن بيها جيل جديد أو مؤمن بيها جيل حالى يكون كتلة تبقى مطبوعة بطابع معين متشعبة بأراء معينة هى الآراء اللى واردة فى الميثاق، وتستطيع إنها تقف فى أى وقت أو فى أى ظروف لتكافح عن المبادئ الواردة فى الميثاق والاتجاهات الواردة فى الميثاق.

عايزين كمان مقترحات من الناس، علينا إن احنا نستخلص من ما بعد الدراسة دى مقترحات معينة يصح نوضعها موضع التنفيذ؛ نحيلها الى المجلس التنفيذى أو نتقدم بيها لدراسات هنا بحيث إنها تنقلب الى تشريعات وتستوجب التنفيذ.

كمان الميثاق فى الواقع يمكن وصل لطبقة معينة من الناس، لكن لغاية النهارده برضه لما أروح فى الأرياف يعنى الميثاق يذكره كميثاق لكن ايه فكرة أى فلاح عن الميثاق؟! يعنى بالضبط معتقدش أبدا حيقدر يدينى الصورة اللى أستطيع أنا أن أزرعها فى ذهنه أو أفهمه بشكل حيوى إن هذا الميثاق هو اللى خلا ايراده زاد وهو اللى خلاه تملك وهو اللى خلاه.. وإنه الميثاق هو وليد السياسة اللى اتبنى عليها إن حالته تتحسن أو هنتحسن أو مشاركته هو فى الحكم.

سرى للغاية

فالواقع إن احنا محتاجين الى هذا، ومنقدرش إحنا لوحدنا نقوم بالعملية دى برضه عايزين ناس معنا، وأنا باقول: منعلنش عن أسمائهم لأنه برضه حايب - زى ما سيادتك بتقول دلوقتى - إن أى واحد بيحى بيعتقد نفسه مقرب وغيره يعتبر نفسه مستبعد.

عبد الناصر: يعنى فيه ناس يشتغلوا.

طراف: آه..

عبد الناصر: فيه ناس من لجنة الـ ١٠٠ وفيه ناس ظهروا من المؤتمر.

طراف: آه.. طبعا كل دول..

عبد الناصر: فيه ناس اتكلموا كويس.

حسين: فيه ناس عبروا بطريقة كويسة وفيه تسجيل لجميع الموضوعات اللي طرحت فى المناقشات، وتسجيل للأسئلة فى الموضوعات.. يعنى الموضوع الفلانى اللي جت فيه الأسئلة دى ايه والأجوبة اللي جت فيه ايه، ومطبوعة فى الاتحاد يعنى ممكن نوزعها كمان.

عبد الناصر: آه..

طراف: أنا كنت عاوز حاجة ومش عارف برضه..

حسين: لا.. لا.. موجودة عندى نسخة كاملة لكل الاخوان.

سرى للغاية

عبد الناصر: كل كلمة اتقالت هناك موجودة.

حسين: والأسئلة ومتقسمة موضوعي.

عبد الناصر: كمال كان عامل ده.. الموضوع الفلانى صفحة ايه الموضوع الفلانى صفحة ايه، كنت مجهز أنا نسخة الحقيقة علشان الرد بسرعة فى المؤتمر يعنى الواحد بدل ما يقعد يدور وساعات تتوه منه الحتة، بعدين ممكن أى أسامى فى هذا أو حد يعنى عنده أسامى.

حسين: هو بس برضه فيه موضوع اللجان الأخرى، كل لجنة تحتط نصب عينها الميثاق ومتهيألى حتمسك الميثاق وحتقليه من ناحية الموضوعات اللى جاية فيها، وبعدين اللجان الشعبية حتشغل فى هذا الموضوع. ومتهيألى إن تشكيل لجنة النهارده لجنة متفرعة من لجنة الميثاق حيبقى.

رفعت: لجنة الرئاسة قصدك؟

حسين: من لجنة الرئاسة دى.

عبد الناصر: لجنة التطبيق.

حسين: لجنة تطبيق الميثاق. فمتهيألى هل فيه داعى دلوقتى من تشكيل لجنة ولا الدراسة الحققة دراسة الميثاق؟ والعملية دى يعنى برضه اللجنة لازم حندرسه بنفسها وبعدين حتلاقى موضوعات حنتعرض على اللجان المختلفة، يإما اللجنة خدت بالها منه أو اللجنة مخدمش بالها منها؛ فهم حيوجهوا اللجان المختلفة علشان يثيروا موضوعات هنا فى مجلس الرئاسة، وبعدين فى التنظيم الشعبى ضرورى العملية دى حيتقال: تطبيق الميثاق كذا وهنتوزع.

سرى للغاية

عبد الناصر: كان عندى اقتراح إن أى حد منكم يتصل بأى ناس فى لجنته، وأنا بدى أقول: أى لجنة تقدر تجيب أى ناس وتتكلم معاهم يعنى.

حسين: آه..

عبد الناصر: ماذا يمنع إن احنا نجيب حنونة بتاعة عبد السميع (ضحك) وليلى!

أصوات: (ضحك)

السادات: وعبد الملك (ضحك)

عبد الناصر: كام واحد من دول اتكلموا كويس بالنسبة للميثاق ويحصل كلام، قد لا تكون لجنة مستمرة للغاية يعنى..

طراف: التشكيلة تتم.

عبد الناصر: آه.. آه..

طراف: تتم التشكيلة.

عبد الناصر: آه.. يعنى فيه بقولك الناس اللي اتكلموا مثلا فيه عندك..

حسين: والله فيه ناس طمعانة.

سرى للغة

عبد الناصر: أبو النصر واسمه ايه ده؟

السادات: جابر.

عبد الناصر: جابر جاد.

حسين: ورفعت اتكلم كويس.

عبد الناصر: ورفعت، فيه هيكل وبهاء واحسان وفيه خلاف اتكلم كويس.

حسين: والله فيه كتير أساميهم موجودة.

عبد الناصر: كمال سعيد، فيه من العمال اتكلموا كويس.

الشافعى: بتاع التأمينات ده اتكلم كويس.

حسين: لا.. فيه ناس كلهم كويسين يعنى التسجيل بتاعهم موجود.

عبد الناصر: فيه اللى هو اسمه بلطيه.

عبد الناصر: بلطيه.

حسين: بلطيه كويس.

عبد الناصر: فيه فهم وبلطية هم الاتنين، لو جيببتوا بلطية من غير فهم بتعملوا لخبطة.

بالنسبة للفلاحين فيه ناس اتكلموا كويس.

سرى للغاية

حسين: هو ابتدائيا فيه مشروع فى الاتحاد القومى دلوقتى بالكلام اللى اتقال للميادين المختلفة، ايه القرارات الخاصة بالميثاق فيه مشروع متجهز ابتدائى فى هذا الموضوع؛ فبقدر أدهولهم والمجموعة دى كلها بتاعة الأسامى دى.

عبد الناصر: مش ممكن الناس تلموهم كلهم مرة واحدة يعنى حتقدروا تلموا مجموعة ثم مجموعة ثم مجموعة؟ يعنى بحيث يعنى تعقد جلسات معاها.

رفعت: يعنى الفكرة الرئيسية بتاعة تبسيط الميثاق وابرار النواحي التطبيقية اللى ممكن تطبق.

عبد الناصر: مين تانى؟

حسين: هو احسان اتجاهه كويس، كان ماشى كويس كان تفكيره كويس طول مدة المؤتمر.

عبد الناصر: لا.. بتكلم عن الأعضاء، وبعدين أنا كنت عايز أعمل من لجنة الـ ١٠٠ لجنة تنفيذية اللى هى بتساوى اللجنة المركزية.. كنا عملنا دراسات، وبعدين عندك مقر مجلس الثورة ممكن تجتمع فيه.

طراف: أظن يعنى أنا رأيت برضه نعمل المكان اللى هو هيكون المقر الرئيسى للاتحاد.

سرى للغاية

عبد الناصر: هو جاهز.. مش مجلس الثورة أنسب؟

محي الدين: آه..

طراف: هو أنسب مكان، بس متهيألى هي مداخل مجلس الثورة أصلها ضيقة يعنى حيبقى مكان شعبي المفروض..

عبد الناصر: لا.. للجنة.

طراف: آه.. للجنة بس.

عبد الناصر: وبعدين اللي أنا بفكر فيه دلوقتي إن بنقل وزارة الارشاد من عابدين وبيدينا الجزء خاص بوزارة الارشاد فى عابدين وينضمه الى مبنى الاتحاد القومى، وده ببقى مقر الاتحاد الاشتراكي يستخدم الجزء اللي من عابدين، والاصلاح الزراعى.. كل واحد بنى على إنه حيعزل وإنه كان راح المبنى الجديد ولاعزلش منه!

حسين: المفروض كان يعزل فى يناير سنة ٦٠.

عبد الناصر: اللي أنا متصوره إن فى عابدين ممكن إن المبنى اللي هناك بتاع الاتحاد القومى، وهو الحقيقة بيمثل حاجة فى وسط البلد شعبية.

طراف: ده كويس الحقيقة.

سرى للغاية

عبد الناصر: لكن المبنى الحالى مافيش حد هيعرف يتحرك فيه.

حسين: آه... مينفعش إلا المكان الحالى كسكرتارية.

عبد الناصر: ينفع مكاتب فرعية، لكن مبدئيا بناخد الجزء الخاص بوزارة الارشاد والجزء الخاص بالاصلاح الزراعى، وبهذا يبقى الحقيقة عابدين ما عدا الحثة بتاعة الحفلات.

طراف: والمتحف.

حسين: متهيألى عايزين حته زى نادى يعنى.

عبد الناصر: لمين؟

حسين: للاتحاد الاشتراكى.

عبد الناصر: لمين حيضره؟

حسين: أى حد يحضر فيه مع بعض الناس، يعنى اجتماعات مع ناس اتصال بناس عمليات بالشكل ده العملية بتاعة كل يوم، هو ضرورى نتصل بالناس وضرورى نقابل ناس كثير، نقابلهم فين ونتصل بيهم فين؟ هل فى المكاتب بتاعة اللجنة فى عابدين ولا فى حته زى نادى كده؟

عبد الناصر: هو طبعا ميزة عابدين فى الحثة بتاع وزارة الارشاد، اذا جم ناس فى الحثة اللى زى حوش دى بتقدر تخرج حتى وتتكلم جوه، اذا حبيت تقابل ناس فيه يعنى فيه أوض لمقابلات كثيرة..

سرى للغاية

الشرباصى: فيه حجرات سكرتارية يعنى.

حسين: هو من ناحية إنه مكان مركزى كويس.

عبد الناصر: إحنا على أساس - زى ما أنا متصور - الحتة بتاعة الكراكون لو نبنى هناك مبنى وفيه قاعة اجتماعات هتكون عملية كويسة، ولآ إنت عندك..

حسين: لا يعنى.

عبد الناصر: هو أنا مستعد أعمل نادى ليه؟ لمثلا لأعضاء اللجنة المركزية اللي هم هيبقوا ١٠٠ بحيث إنه واحد يتعشى زى ماكانوا عاملين نادى محمد على..

حسين: هي ممكن تمشى برضه.

السادات: ينفع لـ ١٠٠ باريس.

طراف: فى جاردن سيتى.. أظن؟

السادات: آه.

حسين: أوتيل متهيألى ينفع برضه علاوة على العملية دى.

عبد الناصر: لكن الحقيقة اللي أنا متصوره إن احنا لو بنيجى على ناصية عابدين وناخذ الحتة اللي فى الآخر دى ونبنى فيها حاجة أو الحتة بتاعة الجراجات.

الشافعى: اللي على الشارع اللي بيطلع على..

سرى للغاية

عبد الناصر: لا.. لا.. الحتة اللي هي فى الحرس آخر الحرس من اتجاه قصر النيل فيه جراج اللي عند التمثال دى.

صبرى: آه.

عبد الناصر: ما عرفش بقى فيها ايه هي دى؟

حسين: اللي فيها جراجات البوليس الحرى.

عبد الناصر: هذه الحتة كويسة.

حسين: حتة كويسة.

عبد الناصر: أحسن.

حسين: هي التوسع الطبيعى للمبنى.

عبد الناصر: فيها عمارة وقاعات ومتهيالى دى أحسن وبعدين بتدى..

حسين: توسع، هي متخدش كتير لكن كويسة يعنى هي استغلالها لازم.

عبد الناصر: أدوار..

سرى للغاية

حسين: يعنى يمكن المهندسين يقولوا ١٠ أدوار ماتتسجمش مع ده، شئ يعنى ده يادوب على قد الارتفاع بتاع بقية المبنى.

عبد الناصر: لا.. ده بالذات ميدان عابدين ده تقدر بتبنى عليه ١٠ أدوار.

حسين: لا.. انسجام المبنى العام والمنظر العام بتاع الميدان اللى بانى فيه ميبقاش المبنى حرس ٣ أضلاع على ارتفاع ٤ أدوار مثلا ٣ أدوار وبعدين جنبه عمارة.

عبد الناصر: لكن متهيألى مبدئيا إن نعقد اجتماعات فى ..

السادات: مجلس الثورة.

حسين: بالجزيرة.

يعنى هو أنا برضه حتى فى الموضوع ده بتاع لجنة تطبيق الميثاق هأتكلم برضه فيه تانى لو سمحت، ما هو اللجنة الشعبية اللى اتعملت النهارده بتاعة الاتحاد الاشتراكى هي المجلس ده زائد.. فلما تبقى لجنة من اللجنة الشعبية أحسن من إنها تبقى من مجلس الرئاسة؛ فيه موضوع الاتصال الشعبى بالناس وفيه تطبيق الميثاق، ده يعنى رأى إن هو ده الوضع الطبيعى أكثر من جزء من لجنة الرئاسة. أما يبقى جزء من اللجنة العليا للاتحاد الاشتراكى هو اللى بيعمل هذا الموضوع ويقعد يتصل بالناس ويعمل هو ده الوضع الطبيعى، لكن أنا مش عايز أمانع ومباقولش إن ممنوع الاتصال.. لا أبدا.

عبد الناصر: أنا متصور إن العملية الأساسية لينا فى الاتحاد الاشتراكى البناء وتنظيم الاتحاد الاشتراكى لمدة سنة حياخد منا جهد دلوقتى.

حسين: ما هو نفس المجلس ده زائد ناس تانية هم اللى حيعملوا العملية دى.

سرى للغاية

عبد الناصر: حتى يتم تنظيم الاتحاد لن تستطيع إنك تشتغل فى لجان تشكل من الأول؛ يعنى تعمل لجنة وعى وبعدين برضه لما تقول إن احنا حنعمل لجنة للشئون الاقتصادية ولجنة لكذا، مش فاهم ايه الحكمة!

حسين: يعنى لما تتصل بالناس باسم لجنة الاتحاد الاشتراكى غير لما أتصل بيهم باسم مجلس الرئاسة ولو إن الاتنين جايز يبدو واحد.

عبد الناصر: فيه مثلا لجنة حوالى ٢٠ من أساتذة جامعة بيجوا يشتغلوا ويفتحوا القوانين ويعملوا حاجات.

حسين: مش المواضيع الفنية، ما إحنا متفقين على المواضيع دى كلها يعنى فى المواضيع الفنية ماشى لكن فى موضوع هو أساسا..

عبد الناصر: ماقلش إن الموضوع أساسى هو الموضوع فنى، هو العمل بالنسبة مثلا عايزين نجيب قوانين يعنى على الأساس الاشتراكى اللى هو يساوى تطبيق الميثاق.. مش كده يعنى؟

طراف: عاوز أقول كمان: مجلس الرئاسة ما هو إلا انبثاق من آخر تشكيل فى الاتحاد الاشتراكى، ده ما هو إلا جزء يعنى منظمين للاتحاد الاشتراكى.

عبد الناصر: هو فى الاتحاد الاشتراكى كعشرين الحقيقة يعنى منقدرش نشغل، يعنى الصين عاملين لجنة دائمة من ٦ يمكن إحنا هنا..

حسين: يعنى هم الناس هم.. هم!

عبد الناصر: بالضبط، بعدين يعنى أنا بطلب أى واحد يجب إنه فى أى لجنة، ماذا يمنع إنى أجب دكتور وتكلمه فى أمور الصحة وتحيب واحد وتكلمه فى شلل الأطفال؟ يعنى العملية غير الدعوة الفنية اللى احنا اتكلمنا فيها الأول الحقيقة.

حسين: أنا برضه نفسى العمل الشعبى ندى له الاهتمام، يعنى لغاية دلوقتى العمل الشعبى مخدش الاهتمام للناس والناس كلها عايزة..

سرى للغاية

عبد الناصر: ويعدين إحنا يعنى ما إحنا الأساس فى العمل الشعبى.
فيه أى حاجة؟

حسين: هو بس موضوع توزيع الاختصاص.. مافيش حاجة الأسبوع الجاى.

صبرى: بالنسبة للصحافة نقول على اجتماع لجنة..

عبد الناصر: قول على المرتبات! (ضحك)

أصوات: (ضحك)

صبرى: أصل اللجنة التنفيذية العليا هتجتمع.

عبد الناصر: لا اتكلم برضه إن احنا بحثنا فى تطبيق الميثاق.
ويعدين حد عنده كلام تانى؟

صبرى: اليمن.

عبد الناصر: ايه؟

صبرى: اليمن دلوقتى بيان المشير بس.

محمى الدين: هو الموضوع الرئيسى الصين والهند الحقيقة.

صبرى: آه.

حسين: لو انتقال كلام يطمئن الناس عن اليمن.

عبد الناصر: طبعا يعنى نتكلم بالتحديد.

سرى للغاية

صبرى: أيوه.

عبد الناصر: فيه حكومة قوية من الثورة من كلام المشير عامر بعد زيارته لليمن، والمعارك اللي أذاعها راديو مكة وراديو عمان.

حسين: وزيارته للقوات فى الأماكن الأمامية..

عبد الناصر: القوات فى صرواح.

حسين: آه.. يعنى دى بتدى..

عبد الناصر: وقال إنه زار القوات فى..

السادات: جحانة.

عبد الناصر: لا.. بلاش دى. وانه زار المناطق اللي على الحدود كلها.

صبرى: الحدود الشمالية.

عبد الناصر: وزار المناطق الشمالية، بس يعنى منقولش حاجة محصلتش لأنهم هيسمعوها فى الاذاعة.

حسين: بلاش تحديد للمناطق.

عبد الناصر: صرواح.

حسين: صرواح بالذات.

سرى للغاية

عبد الناصر: لأن هم قالوا، وشاف يعنى قوانتا الموجودة.

الشافعى: روحهم المعنوية.

عبد الناصر: قوات الجمهورية العربية والقوات اليمينية.. ج ع م - و ج ع ي.

أصوات: (ضحك)

عبد الناصر: وأى عدوان هى مستعدة لدحره، كويس؟

أصوات: أوى يعنى.

عبد الناصر: بالنسبة للخطة، يعنى درس المجلس الخطة بتاعة السنة الأولى من كذا لكذا والخطة بتاعة السنة الرابعة من كذا لكذا. هل نقول إن احنا مثلا بحثنا موضوع كوبا وإن احنا بنقول موقفنا؟

صبرى: هنقول سيادتك: نحن نقدر الجهود التى بذلتها الأطراف المعنية بإزالة التوتر.

عبد الناصر: آه.. بس أصل الجهود المعنية دى أصلها كلمة لها..

أصوات: (ضحك)

السادات: عايمة!

عبد الناصر: سلام عليكم.